

Po Coyenein Jesucristo Pia Peitorobiwi Tatsi Pexeinya Coyenein Exana

Meje yabara xua Lucas yabara tina xua Nacom yabara tsiw_unae muxu duta xua itorobina jiwitha pia Pejumope t_unax_u tatsi.

¹ Xam, Teófilom, tajiton cata tinatsi. Bayatha copiya matha cain cata tinatsi icha diwesi. Barapo diwesitha yabara catsipaebatsi daxita po coyenewan xua Jesús exana. Cata tinatsi bayatha daxita xua po mataqueitha Jesús tamropata pitaba po coyene xua peexanaewa, matautano xua pecuidubiwano, xua beya yacui weraweracanaya po mataqueitha poxonae athabe juinya. ² Poxonae pew_unaeya tsane xua Jesús athabe icha, matha pia peitorobiwi itapeta. Jesús cuiduba barapomonaе xua Nacom pia Pejumope t_unax_u tatsi pia peayapus_uwatha tatsi. Jesús cata barapomonaе po coyenewan xua Jesús petaexanaenexa tsainchi. ³ Poxonae Jesús equeicha as_u, poxonae bequein t_upa, bapoxonae Jesús tsita nait_uta barapomonaetha. Cuarenta po matabibetha Jesús tsita nait_uba ducuaenaebiya barapomonaе. Petsita nait_uba ducuaenaebiyaexae pijimonaе, barapoxonae pijimonaе yaputainchi xua xaniwaicha bara pet_upaein equeicha as_u. Jesús barapo pia peitorobiwi yabara cuiduba po

coyene Nacom waba jiwi petanaexanaenexatsi pijimonaе pomonaе itorobiya peewatsixae.

⁴ Poxonaе cataunxuae awiya Jesús pia peitorobiwi bar_u nacaetuta ducuaenaebiya, Jesús barai, jeye:

—Ab_u jopa paponaeinde Jerusalén tomara weya. Paeware xua Nacom Taxa bayatha yabara paca tsiw_unae muxu duta. Taxa namchi: ‘Tajumope t_unax_u itorobicaein’, jei. Baraxua bayatha paca tsipaebatsi. ⁵ Barapon Juan bautisaba _u meratha. Ichitha tsiwiyo bayiyo bexa tsane Nacom pia Pejumope t_unax_utha tatsi paca bautisabina. Pacata patsina Nacom pia Pejumope t_unax_u tatsi painya paca bar_u poponaenexa tsane, jei Jesús pijimonaetha.

Meje yabara poxonaе Jesús athabe icha

⁶ Poxonaе Jesús pia peitorobiwi bar_u nacaetutatsi Jesús yainyabatsi pia peitorobiwi, jeichichi:

—Jesús, pata Necanamataxeinaem, ¿methaunxuae anoxuae exanaename xua Israel nacuapiwi equeicha xeinaena itorobiya pia pepa peewatsinchi? jeichichi Jesús pijimonaе.

⁷ Jesús jume nota pijimonaе, jeye:

—Paxam jopa paca itac_upaeyo xua painya neyaputaewa po dapae poxonaе Nacom peexanaewa tsane baxua, matautano xua po mataqueitha poxonaе peexanaewa tsane. Saya meisa Taxa xeina peayapus_u itorobi coyenewa, po peayapus_u itorobi coyenewatha xua peexanaewa baxua. ⁸ Poxonaе Nacom pia Pejumope t_unax_u tatsi pacata patsina painya nepaca bar_u poponaenexa xua baroxonaе

peayapusawa painya nexeinaenexa. Tajume diwesi painta papaebiname Jerusalén tomaratha, Judea nacuathano, Samaria nacuathano, daxita carepaya taju nacuantha, jei Jesús.

⁹ Poxonae Jesús baxua najume weta, Jesús athabe caichatsi Nacom. Jesús pia peitorobiwi taeumeinyatsi. Barapomonae tsaquinaebowa tane xua Jesús matawacaicha duneicatsi. Equeicha Jesús jopa taetsi. ¹⁰ Poxonae awiya came barapomonae necotumeinya itaboco, barapomonae jemeicha caquita umenarucupatsi pon xua nacueyatabe, ponbe xua pemainya paparuwa penama xatatsinbe. ¹¹ Baraponbe Jesús pijimonae tatsi baraichi, jeye:

—Ja, pomonae Galilea nacuapiwi pam, ¿eta xua metha came awiya paitaboco necotumeinyame? Bapon Jesús, pon xuaunxuae athabe icha painya xamtha, bexa tsane equeicha patopaetsica, barapocotsi jata coyeneya ichi tsane ichaunxuae aunxuae icha ichi, poxonae athabe icha.

Meje yabara poxonae Jesús pia peitorobi jiwí tatsi Matías itapetatsi Judas pecoutha petanacuichiwa tsainchi

¹² Barapoxonae Jesús pia peitorobi jiwí tatsi demxuwa weiyiya po demxuwa pewan Olivo demxuwa xua Jerusalén tomara be-iyiya. Poxoru Jerusalén tomara imoxoyo daxota barapomonae itacupatsi xua peponaewa Jerusalén tomara beya demxuwa weya bequein bara judiomonae pia pentaquei seicae matabi tatsi saya poxoru Moisés pia peitorobi coyenewatha baxua peyabara copatsixae. ¹³ Poxonae Jesús pia

peitorobiwi tatsi pareca Jerusalén tomaratha, athabe jujuinya po tututha athawetsica jinompa. Baraxota jinompa Jesús pia peitorobiwi tatsi pewun Pedro, iru Juan, iru Santiago, iru Andrés, iru Felipe, iru Tomás, iru Bartolomé, iru Mateo. Iru popona ichun Santiago pon Alfeo pexanto tatsi. Iru popona ichun pon pewun Simón. Barapon Simón celotemonae jiwana pin. Barapo celotemonae pomonae ba ichichipa xua pexeinaewa barompaya pia pecanamataxeinaeinchi. Iru popona ichun pon pewun Judas pon Santiago pexanto tatsi. ¹⁴ Daxita barapomonae iru Jesús peyapin jiwi tatsi baru nacaetuteibatsi, xua pebaru tsipaebeibinexatsi Nacomtha. Iru Jesús pena tatsi, bapowa María, iru ichowaxi yabuxi baru nacaetuteibatsi xua pebaru tsipaebeibinexatsi Nacomtha.

¹⁵ Nexata caentacabi Pedro nontapona ichaxota ena pomonae xua Jesús pejume cowantsiwi. Barapo bicheito be ciento veinte poyobe. Barapomonae Pedro barai, jeye: ¹⁶ “Tamonae pam, pomonae iru painya nejume cowantsiwixae Jesús. Bewa nayabara jume cui wetsina po coyene bayatha Nacom namchi xua pejume diwesitha yabara tsiwanaya paeba. Bayatha caena David cueicueijejei exanatsi Nacom pia Pejumope tanaxu tatsi xua Judas cui coyene caunutatsi xua pinae Jesús waetabinchi pomonae Judas matacapona. ¹⁷ Bara Judas yatsicaya pata jiton petain pana nbaru nacuitan barapo penacuichiwa. ¹⁸ Poxonae Judas Jesús caenaetatsi, sacerdotemonae pia pentacaponae wi tatsi Judas catatsi paratixi.

Pirapae sacerdotemonae pia pentacaponae wi tatsi bapo paratixitha Judas petapaein tsicomotatsi ira. Judas iratha jopeica poxona tupa yawa coto tsitecatsi, unu pichatecatsino abe peexanaexae. ¹⁹ Nexata pomonae Jerusalén tomaratha pejinompaewi, barapomonae jume tane pocotsiwa Judas exana. Daxota barapomonae barapo ira wan duta po wan jei: ‘Acéldama ira’, jei. Barapo jume, barapomonae pijumetha xua jei: ‘Pejana ira’, jei”, jei Pedro. ²⁰ Equeicha Pedro barai barapomonae pomonae pejume cowantsiwi, jeye: “Salmos penaxunae wei diwesitha Judas petapaexae yabara paeba, jeye: ‘Pia bo tatsi tausaya bo tauncuaeinchi. Jopa ichun ecae tsane baxota’, jei. Matautano namchino: ‘Equeicha pecoutha tanacuitinchi ichun’, jei Salmos penaxunae wei diwesitha, xua Judas yabara”, jei Pedro.

²¹ Nexata Pedro equeicha namchi, jeye: “Xote waxantha jinompa pebiwi pomonae matha cain pana nepuna jinomparu poxonae Jesús pon Wanacanamateinaein pana nebaru jinompa daxita pan. ²² Barapo pebiwi taneno xua Juan Jesús pebautisabiwatsi. Yawa barapo pebiwi taneno xua poxonae Jesús cataunxuae exana ducuaaebiya pocotsiwa xua pewunaewan. Matautano barapo pebiwi taneno poxonae Jesús yantacabi jopa po mataqueitha poxonae athabe juinya. Bewa wabichipatsi caein barapo pebiwi jiwana, pon pecui yaputaein po coyene Jesús equeicha asu popona. Bapon iru pana puna cueicueije tsane xua po coyene Jesús equeicha

asꝯ pepoponaewa”, jei Pedro barapo pejume cowꝯntsi jiwitha.

²³ Barapomonaē pomonaē pejume cowꝯntsi jiwi najiwana itapeta ayunbe. Ichꝯn pewꝯn José Barsabás, pon icha wꝯn Justo. Irꝯ ichꝯn pewꝯn Matías. ²⁴ Nexata barapomonaē Jesús athabeicha tsipaebatsi, jeye: “Nacom, pon jiwi Necanamataxeinaem. Daxita jiwi nejꝯntꝯ coyene yaputaein. ¿Incane methara ponbe jiwana pon xua ichichipamera, pon xua cuita itapeta ichichipame? ²⁵ Barapon irꝯ penaexanaenexa jinya neitorobi jiton pon xuya Judas pecoutha petanacuichinexatsi. Judas tꝯpa nacabeta abe peexanaexae. Judas pona ichaxota po nacuatha jopa nacoicha duntsiyo isoto”, jei barapomonaē.

²⁶ Nexata barapomonaē wꝯn jiyatabaxuba ibotiyobe. Nexata saya Matías wꝯn naitꝯtaraba. Daxota bapon Matías itapeta cuita wabatsi. Matías once pomonaeyobetha napona pomonaē Jesús pia peitorobi jiwi tatsi.

2

Meje yabara poxonae Nacom pia Pejumope tꝯnaxꝯ tatsi patopeica pomonaetha pomonaē Nacom pejume cowꝯntsiwi

¹ Pentecostés matakabi tsuxubi, po mataqueitha xua poxonae jiwi tsinacaetuteiba penabanaenexa pexaewa peyabara nanta xeinaexae xua pexaewa naweta. Barapo matakabitha daxita pomonaē Jesús pejume cowꝯntsiwi bara cae botha nacaetuta. ² Barapo mataqueitha barapomonaē busi tane, pebusi po busi xua be joibo busi po busi xua

busi nainya naetaba itaboco wetsica. Barapo busi daxita bo tutu canaupa ichaxota barapomonaе nacaetuta. ³ Barapoxonaе barapomonaе tsita naitapeinya xeinatsi xua be peebato jumope coichan. Barapo peebato jumope coichan daxita carepaya barompaya barapomonaе jajayababa tsiniya taenatsi. ⁴ Barapoxonaе daxita carepaya barapomonaе jantа coyene yncatsi Nacom pia Pejumope tаnaxа tatsi pia peayapusа itorobi coyenewa tatsi. Matautano daxita barapomonaе barompaya tsanaya icha jumeintha cueicueijeі xua be po jumetha Nacom pia Pejumope tаnaxа tatsi cueicueijeі cana exana barapomonaе po jumein xua jopa yaputaeyo.

⁵ Barapo maticabintha, iruru pinmonaе judiomonaе pata Jerusalén tomaratha, po judiomonaе i dapocotsi nacuan werena peponaewi xua penataenexa Pentecostés wаn maticabi poxonaе tsinacaetuta pexaewa penabanaenexa. Barapomonaе bichocono pejume cowantsiwi Nacom. ⁶ Barapo ayei bicheitomonaе pomonaе judiomonaе barapomonaе busi tane xua po busi, busi duneica ichaxota nacaetuta pomonaе barapon Jesús pia pejume cowantsiwichi tatsi. Barapo judiomonaе jume tane xua daxita barapomonaе barompaya pia jumexitha cueicueijeі xua judiomonaе pia pejume tatsi. Barapoxonaе barapomonaе nanacaetuta Jesús pejume cowantsiwitha. Barapomonaе pomonaе judiomonaе najantа coyene cabenaeca. Yawa jopa yaputaeyo xua peyabara nanta xeinaewa baraxua tsipei daxita barapomonaе pomonaе

Jesús pejume cowantsiwichi barompaya judiomonae pijumexitha tatsi cueicueije. ⁷ Daxita barapomonae pomonae judiomonae najuntɔ coyene cabenaeca. Nantiya caemonae natsipaeba, jeye:

—¡Jina, bara barapomonae Galilea nacuapiwiba, pomonae bequein barapomonae jopa icha jumeintha pecueicueije jiwi xua wajumeintha pecueicueije! ⁸ ¿Eta pocotsiwa barapomonae metha daxita barompaya tsanaya icha jumeintha cueicueije xua wajumeintha?

⁹ Xote jinompa Partia nacuapiwi irɔ Media nacuapiwiba, irɔ Elam nacuapiwiba. Barichi xote jinompe Mesopotamia nacuapiwi, irɔ Judea nacuapiwiba, irɔ Capadocia nacuapiwiba, irɔ Ponto nacuapiwiba, irɔ Asia nacuapiwiba.

¹⁰ Matautano barichi xote jinompa Frigia nacuapiwi, irɔ Panfilia nacuapiwiba, irɔ Egipto nacuapiwiba, irɔ Libia nacuapiwiba pomonae jinompa imoxoyo Cirene nacua. Matautano ichamonae pata pomonae Roma tomarapiwi.

¹¹ Barapo Roma tomarapiwi icha judiomonae pepa judiomonae xua yacui naexana. Icha judiomonae jopa pepa judiomonaeyo. Saya judiomonae penaexanaewi, tsipei barapomonae jume cowanta Nacom icha be judiomonae ichi pomonae pepa judiomonae. Irɔ pata ichamonae Creta nacuapiwi, irɔ Arabia nacuapiwiba. Ichitha daxita waxainchi jume tainchi xua Nacom pewanaewan exana peayapuswatha, poxoru barapo Jesús pijimonae tatsi wajumeintha paeba, jei barapo judiomonae.

¹² Daxita barapo judiomonae najuntɔ coyene

cabenaeca. Daxota barapomonaе jopa xaniwaicha yabara nanta xeinaeyo baxua. Barapomonaе caemonaе nayainyabiya, jeye:

—¿Eta pocotsiwa metha baxua jane? jei. ¹³ Ichamonaе saya jume cui capana. Barapomonaе namchi, jeye:

—¡Apara barapomonaе Jesús pijimonaе tatsi cꞑpatsi! jei.

Meje yabara poxonaе xua Pedro tsipaeba barapomonaе

¹⁴ Jesús pia peitorobiwi tatsi poyobe xua once poyobe, barapoyobe pia xantha tatsi Pedro nontapona. Matautano nontapona pepa bicheito itabaratha tatsi. Pedro jume daunweya barai barapo bicheitha, jeye: “Paxam, pomonaе Judea nacuapiwi pamxaem irꞑ daxita pomonaе Jerusalén tomarapiwi pamxaem, incane pana ne-jume taema, yabara paca tsipaebinchi xuaunxuae pajume taneme. ¹⁵ Barapo pebiwe xua Jesús pijimonaе tatsi apara jopa cꞑpaetsi xuaunxuae pacui yabara nanta xeiname. Apara awiya xometo caewa ecareca. Cataunxuae apara baya daxota jopa cꞑpaetsi. ¹⁶ Baraxua xuaunxuae anoxuae pajume taneme, caena bayatha Nacom pia peitorobi jume pepaebin yabara tsiwꞑnae muxu duta pon pewꞑn Joel. Joel baraxua Nacom Pejume Diwesitha tina xua saya tatina, xua pinae Nacom paeba.

¹⁷ Jeyei Nacom:

‘Poxonaе barapo cae pin nacuathe po matabi opi weraweracaena, bapoxonaе barapo matabitha daxita carepaya jiwitha

najumope t̄nax̄u cayataxubiya catsibin.
Painya nexanto jiwi ir̄u painya nexantixi
neyabara cueicueijeji tsane pocotsiwa
xua yaputane exanan.

Pewowi yatsicaya tsita nait̄ueteibinchi
be poxonae camaiteibina.

Pitiri jiwi camaiteibina poxonae amachinae
tsane.

¹⁸ Pomonaе xua amanaya neyabara diwesi
canantsipaebina, barapomonaethano
najumope catsibin barapo matabitha,
yab̄xithano, pebiwithano. Barapoxonaе inta
cueicueijeji tsane.

¹⁹ Peitabocotha paca tsita it̄utsinchi po coyenein
bichocono pew̄naewan xua jiwi bichocono
najunt̄u coyene cabenaeca exanatsi.

Iratha tsicano paca tsita it̄utsinchi po coyenein
xua jopa juniya be pejana tsurucuae tsane, xuano
xua jopa juniya be isoto tsurucuae tsane, xuano
xua jopa juniya be nobo ts̄x̄u tsurucuae tsane.

²⁰ Poxonaе patopaetsica pon jiwi Pecanamatax-
einaein

copiya baraxue panecotsiname xua xometo quiri
jei tsane, jopa penta tsurucuae tsane.

Yawa panecotsiname xua jomocoichato be
janowa ducuaena.

Barapo matabi w̄nae tsane poxonaе pon jiwi
Pecanamataxeinaein patopaetsica.

Barapo matabi Nacom pepa peit̄upanae
matabi exanaena.

²¹ Pomonaе picoya penata w̄ncaewa Nacomtha
xua

Nacom peyawenaenexa tsainchi, barapomonaе
capanenebiya tsainchi Nacom', jei Joel

xua saya Nacom tapaebatsi”, jei Pedro.

²² Equeicha Pedro barai barapomonae jeye: “Pomonae Israel nacuapiwi pamxaem, incane pana nejume taema, xua paca tsipaebinchi. Jesús, pon Nazaret tomarapinxae bapon Nacom itoroba painya xantha. Bapon Jesús pewnaewwan exana pexeinya petsita itatsi coyenewanno Nacom pia peayapuswatha tatsi, painya neyaputaenexa tsane xua Nacom yawena xua Jesús peyawenaewatsi. Paxam bayatha payaputaneme xua bapon tsita naitaba ducuaaebiya. ²³ Bayatha Nacom paca cui wnae tsiwanaya tane xua po coyeneya pata exanaename pexantotha tatsi. Nacom bara paca cui copata xua abe paexaname. Jesús pawaetabame painya caenaetsinexa tsane bapon peacuibe jiwitha. Barapomonae Jesús cobe matabobatsi naetotha yawa bexotsi. ²⁴ Ichitha equeicha Nacom asu exana pexanto petupae cuiru nacua weya. Nacom Pexanto capanepa pia peantuyapuswatha barapo petupae cuiru nacua weya, tsipei barapo petupae cuiru nacua jopa xeinaeyo peayapuswa xua Jesús awiya pebot-siwatsi barapo petupae cuiru nacuatha. ²⁵ Iru David, Israel nacuapiwi itorobiya pia pepa peewatsinchi, caena bayatha tina Nacom Pejume Diwesitha. David tina Jesús jume yabara tatsi. David namchi, jeye:

Yaputan xua Tanecanamataxeinaein nebaru poponeiba daxita matabi.

Bapon neyaweneiba.

Bapon nebaru poponeiba daxota jopa junuwin tsane.

²⁶ Daxota bichocono jantu coyene weiweinan.

Mataũtano daxota Nacom Pejume Diwesi
 jũntũ coyene weiweinaya
 cueicueijan ichamonaetha.

Bara bequein tũpaein, mũthũtha bocuaeinno,
 ichitha jume cowũntan xua Nacom equeicha asũ
 neexanaena pia peantũyapũswatha.

²⁷ Xam Nacom jopa punaxubim tsane tajumope
 petũpae cuiru cuariyatha.

Poxoru xan jinya nexanton tajũntũ cui
 xanepanaein daxota jopa benecopatsim
 xua tatũpaein tuxamnuncuaein,
 yawa xua tsabanuncuaein.

²⁸ Neita cui tsita itũbame beta xaniwaicha
 tapoponaenexa tsane poxonae equeicha asũ
 neexanaename petũpae cuiru nacua weya.

Nejũntũ coyene weiweina exaname tsipei
 neyanta poponeibame', jei David
 xua saya Jesús tapaebatsi", jei Pedro.

²⁹ Equeicha Pedro barai barapomona, jeye:
 "Tamonae, daxota beta paca tsipaebatsi xua pinae
 David wamo susato nacuapin bayatha pinae tũpa.
 Piamona mũthũtha xotsi. Awiya waxantha
 boca barapo mũthũ ichaxota petũpaein mũthũtha
 xotsi. ³⁰ Aparã, barapon David, pinae Nacom
 peitorobi jume pepaebin. Bayatha pinae David
 nacana wũnae tsiwanaya muxu tsidutatsi Nacom,
 xua pinae David pijimona tatsi jiwana pon jiwi
 Pecanamataxeinaein tatsi naexanaena. Barapon
 pon Pecanamataxeinaein jiwi Israel nacuapiwi
 canamataxeinaeinchi icha cain bayatha David
 ichi poxonae canamataxeina barapo Israel nacua-
 monae. ³¹ Bayatha pinae David yabara tsiwũnae

muxu duta xua bexa tsane Nacom Mesías equeicha asu exanaeinchi. Nacom Pexanto tatsi pon David yabara jume jei, apara bapon Mesías. David namchi xua Mesías jeyei xua saya pinae David tapaeba: ‘Xam Nacom jopa punaxubim tsane tajumope petupaie cuiru cuariyatha. Poxoru xan jinya nexanton tajuntu cui xanepanaein, daxota jopa benecopatsim xua tatupaiein tuxamnuncuaein yawa xua tsabanuncuaein’, jei David xua Mesías jeyei. ³² Pon Mesías, pon xuaunxuae yabara paca tsipaebatsi apara bapon Jesús pon Nacom equeicha asu exana. Baraxua paxan yatsicaewa pata cui taewi. ³³ Jesús asiya icha peecaenexa Nacom pecoxatha tatsi. Jesús pon jiwí pepa Pecanamataxeinaein exanatsi Nacom. Matautano Jesús nacana jumope catatsi, Nacom. Barichi baxua xuaunxuae pataneme yawa pana nejume tanemeno xua daxita carepaya barompaya icha jumexitha pacueicueijan, baraxua Nacom pia Penumope tunaxu tatsi pana cata. ³⁴ Poxoru David saya tupa, jopa athabe ichiyo, icha be jopa Jesús ichiyo poxonae athabe icha Jesús. Ichitha saya baxua David tapaeba Nacom, xua Nacom Mesías tsipaebatsi, jeye:

‘Nacom, Tanecanamataxeinaein baraichi.

Tacoxatha weya ecare.

³⁵ Abi beya poxonae matapainya necaaitafaetabi jiwí

pia Pecanamataxeinaein tatsi caexanaeinchi.

Barapomonae beexanaetsipa pocotsiwa xua xam nepaebiwam’, jeye pinae Nacom xua Mesías tsipaebatsi, jei David Nacom nexa”, jei Pedro.

36 Equeicha Pedro namchi barapomonaetha: “Paxam, pomonae Israel nacuapiwi pamxaem. Anoxuae payaputaneme pon xua naetotha tɔparucua paexaname, Nacom exana xua bapon jiwi pia Pecanamataxeinaein tatsi naexana. Yawano Nacom naca itata caewata xua pon Mesías jei, pon Nacom itorobica petsitɔpaenexa jiwi, apara bapon Jesús”, jei Pedro.

37 Poxonae daxita carepaya barapomonaebaxua jume taerɯcɯpa bichocono jɯntɯ coyene wecoyei tsɯrɯcɯpa. Barapomonae Pedro baraichi irɯ Jesús pia peitorobi jiwi tatsi baraichi, jeye:

—Patamonae, ζeta bewa pabichin tsane metha? jei.

38 Nexata Pedro barapomonae barai, jeye:

—Icha jɯntɯ coyene paxeinare Nacomtha painya neauraxae xua abe paexaname. Mataɯtano daxita carepaya pam ichamonaepaca bautisabina Jesucristo pewɯnthaxua Nacom pia paca necayabara jɯntemainaenexaxua abe painya neexanae cuiru coyenein. Barapoxonae Nacom paca nacana jumope catsibina. 39 Barapo peyabara tsiwɯnae muxu dutsiwa apara paxam nexa, irɯ muxuna daxita painya pexui nexano. Mataɯtano pomonaetajɯ beya jinompa irɯ barapomonaenexa. Barichi Nacom pon Wanacanamataxeinaeinxae, pomonaewaba peantobexaebapomonaeirɯ nexa, jei Pedro.

40 Barapo jumeintha yawa icha jumeintha Pedro tsipaeba barapomonae. Mataɯtano Pedro bichocono muxuweta poxonae jeye:

—Po coyenein xua daxita abe peexanae cuiru coyenein paexaneibame, barapo coyenein pana nacui barapende, po coyenein xua daxita carepaya jiwí exaneiba, jei Pedro.

⁴¹ Po matabitha poxonae Pedro paeba baxua barapo matabitha pomonaе jume cowanta xua Pedro paeba barapomonaе bautisabatsi. Barapo matabitha tres mil po bicheito jiwimonaеbe naexana xua pomonaе copiya pomonaе Nacom pejume cowantsiwixaetsi barapomonaе mataropeicha pinmonaе naexanatsi. ⁴² Barapomonaе nacuiduba nawita, xua Jesucristo pia peitorobi jiwí tatsi paeba. Barapomonaе nacana cui nanta jupaya jinompa. Nacomtha nabaru tsipaеbeibano. Nabaru nacaetuteibano xua penabaru epa janaqueibinexa pan xua penabaru xaibinexa. Barapomonaе baxua exana dubenanaеbiya xua Jesucristo peyabara nanta xeina dubenanaеbiyaenexatsi po coyene xua Jesucristo bayatha icha ichi xua poxonaе pan epa janaca.

Meje yabara po coyeneya xua jinompa pomonaе copiya Jesús pejume cowantsiwi

⁴³ Jesucristo pia peitorobiwi tatsi, barapomonaе pexeinya petsita itatsi coyenewan exana nawita Nacom pia peayapuswatha tatsi. Daxota pomonaе jopa Jesucristo pejume cowantsiwichi, daxita barapomonaе junuwa, Nacom cunuwatsi poxonaе cui tane baxuan. ⁴⁴ Daxita barapomonaе, pomonaе Jesús pejume cowantsixaetsi, barapomonaе xaniwaicha

caemonae peburaya nabaru jinompa. Matautano barapomonae caemonae nantiya nacatsiba dubenanaebiya pichiwixi pocotsiwan xua xeina. ⁴⁵ Matautano barapomonae daxitan pocotsiwan xua xeina caenaeta dubenanaebiya. Bapoxonae barapo paratixi nata tsaba dubenanaebiya xua jopa pexeinaexae ichamonae xua icha be pocotsi coyeneya pocotsiwan canantawenona ichamonae. ⁴⁶ Daxita carepaya barapomonae nabaru nacaetuta dubenanaebiya Nacom pin pia botha. Matautano pia boxitha nabaru nacaetuta dubenanaebiya pan nabaru epa nantaraba janaquiya exana dubenanaebiya. Juntema nabaru juntu coyene weiweinaeya xaerubenanaebiya. ⁴⁷ Daxita barapomonae carepaya Nacom wuna jainta dubenanaebiya. Matautano barapomonae baru cui itura jinatsi ichamonae beta peexanaexae. Daxita matabi tsaibi pomonae Nacom pejume cowantsiwixaetsi barapomonae Nacom cana exana xua mataropeicha pinmonae tsoponae tsaibi.

3

Meje yabara poxonae pon pejayujayujei jiton equeicha cui jume exanatsi

¹ Caentaqueitha quiripitha poxonae tres po horabe tsuxubi po horatha poxonae jiwi ba poneiba Nacom pin pia botha xua petsipaebeibinexa Nacomtha bapoxonae Pedro iru Juan Nacom pin pia botha joniyabe. ² Barapo bo Nacom pin pia bo tatsi icha coiboto jiwi wun duta, jeye: “Pexeinya coiboto”, jei.

Barapo coibototha daxita matakabi tsaibi pebin cuareteibatsi pon pejayujayujei jiton xua yawa naexana poxonae pexuyo. Daxota bapon baxota cuareteibatsi xua pew_uquequeibinexa pomonaetha pomonae jojoneibiya barapo coiboto iya. ³ Pon pejayujayujei jiton w_uca paratixi poxonae Pedro ir_u Juan tainchibe xua muxu pejoniyaebe barapo coiboto iya. ⁴ Nexata Pedro ir_u Juan tanebe bapon. Pedro barai bapontha, jeye:

—Incane pana taemabe, jei Pedro.

⁵ Nexata necota bapon. Nanta xeinataba xua catinchi paratixi. ⁶ Ichitha Pedro barai bapontha, jeye:

—Canta jopa xeinaeinyo paratixi. Mata_utano jopa xeinaeinyo pocotsiwa oro nain mataw_un. Meisa po coyenewa xua taxeinaewa baxua cacatinchi. Jesucristo, Nazaret tomarapin w_untha cabaraichi, asiya uncuatabare yawa pondeno, jei Pedro.

⁷ Nexata Pedro pocotsiwa pecoxa weya cobe pita. Yawa asiya cuaranotano. Bapoxonae nainya beta taxuyawere daunweya ducuanaya. Pesitano w_unae tsanayano. ⁸ Nexata bapon pon pejayujayujei jiton jiraw_una. Asiya uncuatabano. Ponnano. Bapoxonae Pedro ir_u Juan puna jonyatsibe bapon, Nacom pin pia botha. Jirajirawiya ponano. Yawano Nacom w_unae jaintatsi. ⁹ Nexata daxita pomonae xua Nacom pin pia bo tututha peenaexae, tainchi pon pejayujayujei jitonxae xua pona, yawano xua Nacom w_unae jaintatsino. ¹⁰ Barapomonae daxita carepaya naj_unt_u coyene cabenaecaeya tane, tsipei barapomonae bayatha

cui tane xua bapon amanaya jiwi wunquequeiba paratixi pecoibototha, po coiboto pewun “Pex-einya coiboto”, jei.

Meje yabara poxonae Pedro diwesi paeba Nacom pin pia botha po tututha pewun Salomón bo wun tututha

¹¹ Poxonae pejayujayujei jiton awiya maxu waetabatsibe Pedro Juanno bapoxonae iru daxita jiwi najuntu coyene cabenaecaeya cuinaenouta Nacom pin pia botha xua tututha po tututha Salomón bo wun tututha ichaxota Pedro baru jinompa. ¹² Poxonae Pedro barapomonae caetaebiya, Pedro barai: “Ja, pomonae Israel nacuamonaepiwi pamxaem, zeta xua metha daxita paxam pana najuntu coyene cabenaecaeya taneme baxua? zPana neyabara nanta xeinamebe xua pata taayapuswatha paaxaibi exananbe pejayujayujei jiton? zMatautano pana neyabara nanta xeinamebe poxoru Nacom pajume cowuntanbe daxota pon pejayujayujei jiton axaibi? ¹³ Ajibi, apara wamo susato jiwi pia Nacom tatsi axaibi exana bapon. Barapo Nacom Jacob pia Nacom tatsi, Abraham bapon pia Nacomno, Isaac bapon pia Nacomno. Apara bapon baxua taexana Nacom. Bapon Nacom Pexanto bichocono ainya cui cana exana poxonae pexanto asu exana petupae cuiru coyene weya. Bapon apara Jesús pon pacaenaetame pomonaetha pomonae pentacaponaeawi, pon bepa bequein isanaxubei Pilato poxonae paxam jopa pacopatsim xua bapon peisanaxubiwa. ¹⁴ Bapon pon bichocono pejuntu coyene xanepanaein xua

jopa xeinaeyo penatsicuentisiwa xua abe peexanaexae tsipei saya exaneiba pocotsiwa Nacom ichichipa. Ichitha jopa paichipaem xua Pilato peisanaxubiwa tsane bapon. Saya meisa pawucame xua Pilato peisanaxubiwa ichun pon jiwi pejutebeibin pon Barrabás. ¹⁵ Poxonae baxua paexaname barapara Jesús pabexubame. Bapon Jesús pon jiwi cana exanatsi xua jiwi ajuntayarusya pejinompaewa. Bapon Jesús Nacom equeicha asu exana petupae cuiru coyene weya. Bara baxua yatsicaya pacui tan daxita. ¹⁶ Po jume wun peayarus wun, bapo wun Jesús pia wun. Daxota pejayujayuwei jiton barapo jume wuntha axaibi exanatsi. Barapon pataneme xua axaibi, tsipei bapon jume nanta pitabiya jume cowanta barapo peayarus jume wun. Daxota barapon painya itabaratha axaibi tsuxubi poxoru jume cowanta Jesús”, jei Pedro.

¹⁷ Equeicha Pedro jeye: “Tamonaе yaputan xua jopa payabara yaputaem xua paexaname poxonae Jesús pabexubame. Barichi painya pentacoponaewino jopa yabara yaputaeyo xua baxua exana. ¹⁸ Nacom peitorobi jume pepaebiwi bayatha Mesías yabara tsiwana paebatsi. Barapomonaе paeba, jeye: ‘Bexa tsane Mesías bexubinchi’, jei. Nacom bara nacui yabara jume weta baxua xua bayatha Nacom peitorobi jume pepaebiwi paeba. ¹⁹ Daxota icha juntu coyene paxeinare Nacomtha painya neauraxae xua abe paexaname. Yawa pajume cowunde painya nepaca cayabara juntemainaenexa abe painya neexanae cuiru coyenein. Yawa Nacom pawucare xua paca juntu coyene xanepana ex-

anaena. Bapoxonae Nacom paca juntu coyene ayapushya exanaena. ²⁰ Tsipei Nacom equeicha athawetsica Jesús itorobicaeinchi pon bayatha Nacom itapeta pon Mesías xua painya nepaca capanenebiyaenexa tsane abe painya neexanae cuiru coyenein weya. ²¹ Cataunxuae abũ Je-sucristo equiya Nacom pia nacuatheicha tatsi. Equeicha bapon patopaetsica poxonae Nacom wũnae exanaena daxitan, be pocotsi coyeneya bayatha Nacom peitorobi jume pepaebiwi paeba. ²² Barichi Moisés pata amo susato jiton namchi: ‘Painyamonae jiwana Nacom cana exanaena, pon Nacom pia peitorobi jume pepaebin tsecae tsane icha neichi. Pajume cowantsiya exande daxita pocotsiwa xua bapon paca tsipaebina. ²³ Daxita pomonae jopa jume cowantsiyo pocotsiwa bapon paeba, barapomonae Nacom weraweraca cana exanaena xua jopa penaexanaenexa Nacom piji-monae tatsi’, jeyei Moisés”, jei Pedro.

²⁴ Equeicha Pedro jeye: “Daxita Nacom peitorobi jume pepaebiwi irũ Samuel pon xua yatsicaya tabũ ducua, baraxua carepaya bapo diwesin yabara paeba barapo matabin. ²⁵ Barapo Nacom pia peyabara tsiwũnae muxu dutsiwa po peyabara tsiwũnae muxu dutsiwa Nacom tsiwũnaeya muxu duta Nacom pia peitorobi jume pepaebi jiwitha, apara bara irũ paxam nexa. Baxua Nacom pena peyabara tsiwũnae muxu dutsiwa Abraham yabara tsiwũnae muxu dutatsi pon wamo susatopin xua xanepanaya painya nejinompaenexa. Nacom Abraham baraichi, jeye: ‘Caein jinya nemomoxi susato jiwi jiwapanin pepatopaexae tsane daxita

i dapocotsi nacuanpiwi yawenaen', jei Nacom Abrahamtha. ²⁶ Poxonae Nacom Pexanto asu exana petupae cuiru coyene weya, bapoxonae copiya pacata itoroba painya xantha pia painya nepaca cayawenaenexa xua daxita paxam painya nenacui barapentsinexa abe painya neexanae cuiru coyenein", jei Pedro.

4

Meje yabara poxonae Pedro iru Juan cueicueijejei tsuncuaebe pomonae tomarapiwi pia pentacaponaeawi tatsi peitabaratha tatsi

¹ Poxonae cataunxuae Pedro iru Juan cueicueijeibe barapomonaetha, bapoxonae sacerdotemonae pia pentacaponaeawi tatsi pata. Iru patopa pon soldadomonae pia pentacaponaein tatsi pon Nacom pin pia botha tatsi pe-eeinaein. Yawa saduceomonaeno iru pata baxota. ² Barapomonae bichocono anaepana, yaitama Pedro Juanno paebabe xua po coyene Jesús petupaein equeicha asu, xua pinae barichi jiwino poxonae tupa equeicha asu. ³ Bara nexata Pedro Juanno waetabatsibe barapomonae. Jiwi pecabi botha capoinchibe. Barapo botha etatsibe tsipei quirei tsanaya xua beya poxonae yaitapenacaena. ⁴ Pinmonae jume tane po diwesi Juan iru Pedro paebabe, yawa jume cowantano barapo diwesi. Barapomonae iruru pomonae copiya jume cowanta caena bayatha, daxita barapomonae nexata daxita cinco mil bicheito tsuxubi xua saya pebiwi ununatsi.

⁵ Icha mataqueitha judiomonae pia pentacaponaeawi tatsi, iruru pitiri jiwi,

iruno pomonae jiwi pecuidubiwi Moisés pia peitorobi coyenewa tatsi, daxita barapomonae nacaetuta Jerusalén tomaratha. ⁶ Baxota iru nanacaetuta Anás pon sacerdotemonae pia pepa pentacaponaein tatsi. Iru nanacaetuta Caifás, Anás perobi. Iru nanacaetuta Juan iru Alejandro, ponbe Anás piamonae tatsi. Barichiru nanacaetuta ichamonae pomonae sacerdotemonae pia pentacaponaei tatsi barapomonae piamonae tatsi. ⁷ Bapoxonae ichamonae itoroba xua Pedro iru Juan pecuaranotatsinexatsibe barapo penacaetutsiwi itabaratha. Yainyabatsibe, jeichibe:

—¿Jintam pia peayapusu itorobi coyenewatha tatsi matautano jintam pewuntha tatsi axaibi paexanamebe? jeichichibe.

⁸ Pedro bichocono juntu coyene yucatsi Nacom pia Pejumope tunaxu tatsi pia peayapusu itorobi coyenewa tatsi. Pedro barapomonae jume nota, jeye:

—Pomonae tomarapiwi pia pentacaponae jiwi pamxaem, iruru pomonae pitiri jiwi pamxaem, pomonae Israel pijimonae tatsi pamxaem, daxita barapomonae pam paca tsipaebatsi. ⁹ Maisa yabara pana yainyabamebe xua po coyene pejayujayuwei jiton axaibi xua painya neyaputaenexa xua eta po coyeneya xua paexananbe poxonae bapon axaibi exanatsi po coyene xua bichocono wuna. ¹⁰ Daxota paxanbe paca jume notatsi xua iru israelmonae piwi peyaputaenexa po coyene xua pon pejayujayuwei jiton axaibi exanatsi poxonae pawun paeban Jesús pewun pon Nazaret tomarapin. Bapon

Jesús, pon apara naetotha t̄aparucua paexaname matautano pon equeicha Nacom pet̄apaein as̄u exana pet̄apae cuiru coyene weya. ¹¹ Bayatha Nacom Pejume Diwesitha tsiwanaya yabara paeba xua po coyeneya pacana exanaename Jesustha. Paxam be barapocotsimonae pam, be pocotsimonae xua ibo bo peacabiwi. Barapomonae xuba iboto po iboto bequein ainya cui naexana beyacaincha icha iboto. Paxam bara paichim Jesucristo paxubame pon peainya cuin xua Nacom ainya cui cana exana beyacaincha ichamonae. ¹² Barapo cae pin nacuathe dapocotsin aibi pon capanepiiba jiwi. Saya meisa bapon Jesús capanepiiba jiwi. Ich̄an Nacom jopa nacata itorobiyo.

¹³ Daxita tomarapiwi pia pentacaponae wi tatsi yabara naj̄ant̄a coyene cabenaeca xua Pedro Juanno jopa auriyobe xua atsaquiya paebabe. Tsipei barapomonae pomonae pentacaitorobi bicheito yaputane xua Pedro Juanno jopa nacuidubiyobe petinae botha matautano xua baponbe saya pecui pawī jitonbe. Barichi barapo pentacaitorobi bicheito yaputaneno xua xaniwaicha apara baponbe ponbe napuna poponeibabe Jesustha. ¹⁴ Barapomonae moya ena tsipei pon pejayujayujei jiton Pedro Juanno axaibiya caquita uncuatsibe. Daxota barapomonae Pedro Juanno jopa abe yabara paebichibe. ¹⁵ Pedro Juanno matha pesato beitorobiyatsibe. Barapomonae natsipaeba. ¹⁶ Nabarai, jeye:

—¿Eta bichainchi metha baraponbetha Pedro Juanno? Bayatha daxita carepaya Jerusalén

tomarapiwi yaputane xua Juan Pedrono exanabe pexeinya petsita itutsi coyenewa Nacom pia peayapuswatha tatsi. Daxota jopa naca itacupaeyo xua wapaebiwa po coyene xua baponbe jopa apara exanaeyobe pexeinya petsita itutsi coyenewa Nacom pia peayapuswatha tatsi.

¹⁷ Maisa aichaxaibichi xua daxita carepaya jiwi jume taetaepona baxua. Metha daxota baponbe jume daunweya itorobinchi xua equeicha jopa paebi tsanebe xua Jesús peyabara paebiwatsi, jei barapomona.

¹⁸ Barapo pentacaitorobi bicheito equeicha Pedro iru Juan wabatsibe. Jume daunweya tsipae-batsibe:

—Equeicha jopa Jesús payabara paebindebe. Equeicha jopa yabara pacuidubindebe barapo cui, jei barapomona.

¹⁹ Bara nexata Pedro Juanno jume notabe barapomona, jeibe:

—Incane payabara nanta xeinare icha metha bara Nacom tsita xanepanatsi xua paxanbe pata paca cajume cowantsiwatsi xua pata exanaewabe pocotsiwa pana itorobame xua daxota jopa pata exanaewa pocotsiwa Nacom pana itoroba.

²⁰ Bewa paexanaeinbe daxita pocotsiwa Nacom pana neitorobabe. Bewa papaebinde daxita pocotsiwa patanbe xua Jesús exana yawa xua pajume tanbeno xua Jesús paeba, jeibe Pedro Juanno.

²¹ Barapomona pomona tomarapiwi pia pentacaponawatsi tatsi, Pedro iru Juan jume itawebatsibe. Daichitha saya pu copatatsibe. Barapomona jopa itacupaetsi xua pecuainchiwat-

sibe Pedro iru Juan jiwi pecunuwixaetsi, tsipei pinmonae jiwi Nacom wuanae jaintatsi, petaexae pocotsiwa Pedro iru Juan exanabe. ²² Pon pejayujayujei jiton pontha pon Nacom pexeinya petsita itutsi coyenewa taexana, bapon axaibi exanatsi poxonae cuarenta po weiyobe xeina.

Meje poxonae pomonae Jesús pejume cowantsiwichi tatsi wuca Nacom xua jopa pejunuwinxaxa tsane poxonae Nacom Pejume Diwesi cueicueije tsane jiwitha

²³ Pedro Juanno nainya pontababe ichaxota Jesús pejume cowantsiwichi tatsi jinompa. Baxota nanabaru nacaetutatsibe. Barapomonaetha pae-babe, xua baraunchichibe sacerdotemonae pia pentacaponae, pitiri jiwino. ²⁴ Poxonae Pedro iru Juan baxua jume taerucupatsibe, barapomona Nacomtha tsipaeba, jeye: “Nacom, pon pata Necanamataxeinaem, xam daxita peitabocotha exaname, irathano, menthano, daxita icha coyeneinno. ²⁵ David pon neitorobi jume pepaebin, nejumope tuxaxu cueicueije cana exanatsi xua cata paeba, poxonae jeye:

‘¿Eta xua metha, pomonae jopa judiomonae naexanaeyo cayabara anaepana? Bara bequein ichipa abe cata exana ichitha jopa itacupaetsi.

²⁶ Daxita carepaya nacuanpiwi pomonae jiwi itorobiya pia pepa peewatsiwichi iru ichamonae pomonae jiwi peyanacua ewatsiwichi barapomona nacaetuta xua abe necayabara paebinexa yawa xua Nexanto pia abe yabara paebichi pon

Mesías, pon jinya Neitapetsin', jeyei David, xua pinae Nacom tapaebatsi", jei barapomonaе xua wꝯca Nacomtha.

²⁷ Equeicha bapomonaе jeye: “Bara yatsicaya baxua exana poxonaе Herodes irꝯ Poncio Pilato, irꝯ icha nacuamonaepiwino, irꝯ Israel nacuamonaepiwino xote nacaetuta Jerusalén tomaratha. Barapomonaе nacaetuta xua Jesús abe peyabara paebinxatsi nexanto pon pejꝯntꝯ coyene xanepanaein pon Mesías pon itapetame.

²⁸ Barapomonaе, pomonaе xote nacaetuta, exana daxita xua caena bayatha cui wꝯnaе tsiwanaya yabara paebame po coyene xua barapomonaе exanaena. ²⁹ Pata Necanamataxeinaem, matha jume taema xua pana yabara abe jume baraunchi xua abe pana exanapaeba. Pana care xua neajꝯntꝯyapusꝯwa xua jopa junuwiya pata paebinxata tsane jinya jume diwesi, tsipei paxan jinya neitorobi jiwi pan. ³⁰ Peatenewi axaibi exande neayapusꝯwatha. Mataꝯtano barabꝯ copatame xua pexeinya petsita itꝯtsi coyenewan paexanaein poxonaе pacueicueijan tsane jinya jume diwesi, Jesús nexanto pia peayapusꝯwatha tatsi pon pejꝯntꝯ coyene xanepanaein”, jei barapomonaе poxonaе wꝯca Nacomtha.

³¹ Barapomonaе najume wetarꝯcꝯpa xua Nacomtha petsipaebiwa. Bapoxonaе ichaxota nacaetuta barapomonaе ira jijiyataxuba. Daxita barapomonaе jꝯntꝯ coyene yꝯca cana exanatsi Nacom pia Pejumoꝯpe tꝯnaxꝯ tatsi pia peayapusꝯ itorobi coyenewa tatsitha. Mataꝯtano barapomonaе Nacom Pejume Diwesi jopa junuwiya paebinoutsio.

Meje yabara poxonaē pomonaē Jesús pejume cowantsiwi pocotsiwan xua xeina daxita baxuan bara barapomonaē nexa

³² Pomonaē pejume cowantsiwi Jesucristo pinmonaē tsoponaē. Barapomonaē peburaya nanta xeina be caenthato coyeneya. Ichun jopa jeiyo: “Apara pocotsiwa xeinan meisa tawa”, jopa jeiyo. Ichitha daxita xua barapomonaē xeina baxua saya daxita bara barapomonaē nexa.

³³ Jesús pia peitorobi jiwi tatsi ajumeyapusaya yabara paeba pocotsiwa bayatha tane poxonaē Jesucristo pon jiwi Pecanamataxeinaeinchi xua equeicha petupaein asu popona exanatsi. Matautano yabara cueicueijei po coyene Nacom bichocono wunaē exana daxita barapomonaetha peantobexaetsi. ³⁴⁻³⁵ Jopa

ichun acopeibiyo pomonaē Jesús pejume cowantsiwi. Daxita barapomonaē xeina xua pocotsiwa penantawenonaewa poxoru ichamonae pomonaē nawita pexeinaewi caenaeta dubenanaebiya pabin, bomaxunno. Barapo paratixi poxonaē xeineiba, catsibeibatsi Jesucristo pia peitorobi jiwi tatsitha. Nexata xuya barapo paratixi Jesucristo pia peitorobi jiwi tatsi catsibeiba pomonaetha pomonaē peacopeibi jiwi xua daxota jopa petaseicaenexatsi pocotsiwa nantawenona. ³⁶ Barichi exana bapon José pon Leví pia pemomo susato jiwanapin. Jesucristo pia peitorobi jiwi tatsi icha wun duta bapontha, po wun Bernabé. (Barapo wun, xua hebreo jume jei: “Pon jiwi pentateiqueibin”, jei.) Barapon José, Chipre tunaetotha naexana. ³⁷ Bapon pia pabi caenaeta. Bapoxonaē barapo paratixi Jesucristo

pia peitorobi jiwí tatsi catatsi peacopeibiwi nexa.

5

*Meje yabara poxonae Ananías iru piowa Safira
abe exanabe*

¹ Bapoxonae iru ichun pon pewun Ananías iru piowa pewun Safira, pabi xeinabe. Bapon piowabe pia ira caenaetabe. ² Bapon piowabe najura nanta xeinabe. Baponbe icha paratixi nata botabe. Icha paratixi Jesucristo pia peitorobi jiwí tatsi catabe bequein Ananías paeba xua daxita catabe Jesús pia peitorobi jiwí tatsi. ³ Bara nexata Pedro Ananías baraichi, jeye:

—Ananías, ¿eta xua metha Satanás jume jejam xua cajume tsiduta xua Nacom pia Pejumope tñaxu tatsi muxuitorobame? ¿Eta xua metha paratixi nata botame xua ira matoma cacata? ⁴ Po ira caenaetame apara bara jinya ira. Yawa barapo matomano apara bara jinyawa. Barapo paratixi icha canantawenoname bara ba moya tainchi. ¿Eta xua metha baxua najantu coyene xeiname? Jopa apara muxuitorobim pebiwi. Jame yatsicaya apara Nacom pia Pejumope tñaxu tatsi muxuitorobame, jei Pedro.

⁵ Poxonae baraxua Ananías jume taeba, peturpaein Ananías iratha jopa. Daxita pomonae xua jume tane xua bapon tura, bichocono junuwa. ⁶ Pewowi pata. Ananías peturpaein mata yarabatsi pesato becayatsi, xua pemuthutha xubinexatsi.

⁷ Pirapaeyo poxonae tres po horabe weta, Ananías piowa tatsi patopa ichaxota Pedrobaru

ena. Barapowa jopa yaputaeyo xua pia pebin tatsi tatɩpatsi. ⁸ Nexata Pedro barai barapowa, jeye:

—¿Bara daxita pana catame xoxi pacaenaetame pentoma pabi? jei Pedro.

Barapowa jume nota, jeye:

—Aja, bara daxita, jei barapowa.

⁹ Nexata Pedro barai barapowa, jeye:

—¿Eta xua metha pana muxu wetamebe xua Nacom pia Pejumope tɩnaxɩ tatsi pamuxuitorobi-namebe? Taema, pewowi pomonae aunxuae jinya pebin mɩthɩtha xotsi, pecoibototha pata, necamɩthɩtha xubinexa tsanerɩ.

¹⁰ Barapoxonae caena nainya Safira Pedro petaxutha petɩpaein tanabotabatsi. Poxonae pewowi taeba xua barapowa bayatha tɩpa, barapoxonae barapowa jontaxorenatsi. Pia pebin cacuita mɩthɩtha xorecatsi. ¹¹ Daxita Jesús pejume cowɩntsi jiwi, ichamonaeno ɩnthɩthɩ nayotarɩcɩpa pejunuwixae poxonae baraxua jume tane.

Meje yabara poxonae Jesús pia peitorobi jiwi tatsi ainya pexeinya petsita itɩtsi coyenewan exana, Nacom pia peayapusɩwatha tatsi

¹² Jesús pia peitorobi jiwi tatsi pexeinya petsita itɩtsi coyenein exana jiwitha Nacom pia peayapusɩwatha tatsi. Pinmonae Jerusalén tomarapiwi pomonae jume cowɩnta Jesús, Nacom pin pia botha nacaetuta. Po tutu pewɩn Pórtico de Salomón tutu, bapo tututha nacaetuta. ¹³ Ichamona, pomonae xua jopa jume cowɩntsiyo Jesús, junuwa xua penanacaetutsiwa Jesús pejume cowɩntsi jiwitha tatsi. Ichitha

barapo Jerusalén tomarapiwi tsita cui wunaetsi Jesús pejume cowantsi jiwi tatsi. ¹⁴ Pin bicheito nayoyotapona, pebiwino, yabuxino pomonae xua jume cowantapona Jesús ponxae jiwi Pecanamataxeinaeinchi. ¹⁵ Jesús pia peitorobi jiwi tatsi wunae peexanaexae, Nacom pia peayapusuwatha tatsi, daxota pomonae atene namtotha capoinchi. Ichamonae camatha bobena namtotha. Ichamonae weintha bobena. Barapomonae ichipa jayababatsi xua Pedro pejumope tatsi, xua barapomonae peaxaibi exanaenexa tsainchi. ¹⁶ Jiwi nacaetuta Jerusalén tomaratha pomonae xua pia tomaran jeba Jerusalén tomara pepuya weya. Barapomonae capata peatenewi iru pomonae xua matajemabatsi exanatsi cauri. Daxita barapomonae peburuya axaibi exanatsi. Daxita barapomonae carepaya equeicha axaibi.

Meje yabara poxonae Jesús pia peitorobi jiwi tatsi peraxa exanatsi

¹⁷ Nexata sacerdotemonae pia pepa pentacaponaein tatsi, iru pomonae xua napuna pona, pomonae saduceomonae, daxita barapomonae Jesús pia peitorobi jiwi tatsi anaepanaya jume uwatsi. ¹⁸ Daxota pomonae xua anaepana Jesús pia peitorobi jiwi tatsi teicatsi. Jiwi pecubi bothano capoinchi. ¹⁹ Ichitha Jesús itoroba matatsunpin. Bapon merawi patopa. Jiwi pecubi coiboto yausaranaxuba. Matatsunpin aisowa bemaxu cayiya Jesús pia peitorobi jiwi tatsi. ²⁰ Matatsunpin Jesús pia peitorobi jiwi tatsi tsipaebatsi, jeye: “Paponde Nacom pin pia botha.

Baxota paumende. Payabara paebare daxita jiwitha barapo pena jũntũ coyene po coyene xua Nacom cata jiwitha xua beta pejinompaenexa”, jei matatsunpin. ²¹ Poxonae baya caemũambotha Jesús pia peitorobi jiwi tatsi bara exana xua matatsunpin paeba. Bara Nacom pin pia botha yacuinaya jojoniya pecuidubinexa jiwi.

Barapoxonae sacerdotemonae pia pepa pentacaponaein tatsi, irũ saduceomonaeno waba daxita carepaya Israel nacua pia penapatae jiwi xua penacaetutsinexa pentacaitorobi bicheitha. Barapoxonae barapomonae itoroba ichamonae xua Jesús pia peitorobi jiwi tatsi pecuaranobinexatsi pin bicheitha peitabaratha tatsi. ²² Ichitha poxonae policiamonae jiwi pecũbi botha pata, Jesús pia peitorobi jiwi tatsi jopa taetsi. Daxota policiamonae diwesiyo caibeya capona pin bicheito peitabaratha. ²³ Policiamonae namchi, jeye:

—Poxonae papatan jiwi pecũbi botha, soldadomonae pomonae peewatsiwi barapo pecũbi botha barapo soldadomonae pecoiboto yabara umena, daunwei tsuncuae. Poxonae pasaranaxoyan jopa paitaraerowinyo Jesús pia peitorobi jiwi tatsi. Jiwaibi. Aichurubena, jei.

²⁴ Poxonae sacerdotemonae pia pepa pentacaponaein tatsi, irũ Nacom pin pia bo peyabara umenaewi pia pentacaponaein tatsi, irũ sacerdotemonae pia pentacaponaein tatsi jume tane baxua, bapoxonae najũntũ coyene benaecaeya nayainyaba, jeye: “¿Exota metha jane Jesús pia peitorobi jiwi tatsi? ¿Exua jane?” jei. ²⁵ Irũrũ bara-

poxonae pebin patopa. Barapomonae baraichi, jeye:

—Ja, pomonae jiwi pecubi botha pacaponame, barapomonae Nacom pin pia botha umena. Matautano cuiduba jiwi, jei bapon.

²⁶ Nacom pin pia bo peyabara umenaewi barapomonae pia pentacaponaein tatsi bapon baru pona policiamonaeno Nacom pin pia botha. Equeicha caewa baru dendensatsi Jesús pia peitorobi jiwi tatsi ichaxota nacaetuta pentacaitorobi bicheito. Saya jopa abe exanaetsi poxonae teicatsi. Saya baru cui wunaeya carendenatsi poxorū barapo policiamonae jiwi cui cunuwatsi. Daxota policiamonae saya be xainyatha teica barapomonae xua jiwi pecuiyainwaxae tatsi xua policiamonae pecuinbabiwa tsipaetsi ibotixitha. ²⁷ Nacom pin pia bo peyabara umenaewi pia pentacaponaein tatsino, barapomonae Jesús pia peitorobi jiwi tatsi capoinchi pentacaitorobi bicheito peitabaratha. Sacerdotemonae pia pepa pentacaponaein tatsi bapon, Jesús pia peitorobi jiwi tatsi baraichi, jeye:

²⁸ —Bayatha jume daunweya paca tsipaebatsiba: ‘Equeicha jopa Jesús payabara paebinde’, pajan. ¿Ichitha eta xua paexaname? Daxita carepaya Jerusalén tomarapiwi yaputane pocotsiwa paxam pacuidubame Jesús yabara. Yawa painya metha paebichi xua paxan panatsiaena cuentan Nacomtha tupa pata exanaexae Jesús, jei barapo pentacaitorobi bicheito.

²⁹ Nexata Pedro irū ichamonae pomonae Jesús pia peitorobi jiwi tatsi daxita barapo matabaxuyobe jume nota barapomonaetha, jeye:

—Apara jame bewa paexanaein pocotsiwa Nacom pana itoroba. Nacom pia peitorobi coyenewa ainya cui beyacaincha jiwi pia peitorobi coyene tatsi. ³⁰ Pata amo susato jiwi pia Nacom tatsi, barapo Nacom Jesús equeicha pet_upaein as_u exanatsi pon xua pabexubame, poxonae naetotha t_uparucua paexanadutame. ³¹ Nacom Pexanto pia peayapus_uwatha exana yatsicaya jiwi pia pepa Pecanamataxeinaein tatsi. Yawa exana pexanto pon jiwi Pecapanenebiyaein. Baxua exana poxonae pecoxatha taecatsi pexanto. Nacom baxua exana tsipei ichichipa xua Israel nacuapiwi icha j_unt_u cui coyene xeinaena bapontha, xua bapoxonae barapomonae Nacom pecui yabara j_untemainaenexa po coyene xua barapomonae Nacom tsita natsicuentatsi xua abe peexanaexae. ³² Bara yatsicaya pata cui taewi daxita baxuan, Nacom pia Pejumope t_unax_u tatsi ir_u taner_u. Daxota paca tsipaebatsi baxua, pocotsiwa xua Jesús exana. Nacom najumope cata pomonaetha pomonae xua peichichipaewa xua peexanaewa pocotsiwa Nacom itoroba, jei Jesús pia peitorobi jiwi tatsi.

³³ Pentacaitorobi bicheito jume taer_ucupa xua pocotsiwa paeba barapomonae pomonae Jesús pia peitorobiwi tatsi. Bapoxonae barapomonae bichocono casebar_ucupatsi. Barapo pentacaitorobi bicheito ichichipa xua barapo Jesús pia peitorobiwi tatsi pejutewiwatsi. ³⁴ Barapo pentacaitorobi bicheitha eca fariseomonaepin pew_un Gamaliel, pon jiwi pecuidubin Moisés pia peitorobi coyene tatsi. Jiwi bapon bar_u cui itura jineibatsi. Bapon

asiya uncua yawa itoroba xua bara caeto pesato becayiya tsainchi barapomonae pomonae Jesús pia peitorobi jiwi tatsi. ³⁵ Bapoxonae bapon Gamaliel barai barapomonae pomonae pentacaitorobi bicheitotha, jeye:

—Paxam pomonae Israel nacuamonaepiwi pamxaem, dota pam xua pocotsi coyeneya pacana exanaename barapomonae. ³⁶ Metha bara pajantemainame poxonae matha bapon Teudas poxonae pia coya pentacaponaein naexana, nayabara paeba xua pinae bichocono peainya cui jiton. Cuatrocientos pebiwimonae matabaxube puna jinompatsi bapon. Ichitha poxonae Teudas bexotsi ichamonae, bapoxonae pijimonae tatsi daxupa, poxonae daxita yotabatsi. Saya xua Teudas exana baxua pecui pawi. ³⁷ Barichi Teudas pepuya weya ichan patopa pon pewan Judas. Bapon pentacaponaein najainta poxonae jiwi pewan tinae matababi tsuxubi. Bapon Galilea nacuapin. Piamonae pin bicheito puna jinompatsiru, ichitha barichi bapon Judas bexotsi ichamonae. Barichiru pijimonae tatsi tarucupatsi poxonae yotabatsi. ³⁸ Daxota paca jeichi: ‘Jesús pia peitorobi jiwi tatsi bara pacui copabare’, jan. Icha barapomonae saya exanaetsipa xua jiwi itoroba, nexata barapomonae jopa amanayabichipae pocotsiwa xua ichichipa peexanaewa. ³⁹ Ichitha icha barapomonae exanaetsipa pocotsiwa Nacom itoroba, nexata paxam jopa pacui amanayabichipaem barapomonae. Dota pam. Daxota jopa paexanaponaeinde po coyene xua Nacom pia peaitafaetabi jiwichi pana

naexanaponame, jei Gamaliel.

Barapomonae pomonae pentacaitorobi bicheito bara jopa pecuiyo Gamaliel pepaebixae.

⁴⁰ Barapoxonae barapomonae pomonae pentacaitorobi bicheito equeicha wabatsi Jesús pia peitorobi jiwi tatsi. Bapoxonae matha copiya ichamonae itorobatsi xua Jesús pia peitorobi jiwi tatsi pecuainchinexatsi. Equeicha jume daunweya tsipaebatsi: “Equeicha jopa Jesús payabara papaebim tsane”, jei. Bapoxonae pu copababatsi nama Jesús pia peitorobi jiwi tatsi.

⁴¹ Jesús pia peitorobi jiwi tatsi pentacaitorobi bicheito weya pona. Barapomonae janta coyene weiweina tsipei peraxa exanatsi ichamonae, Jesús pijimonaexae xua baxua saya Nacom pecopatsixae. ⁴² Awiya barapomonae amsiya yabara cuiduba, Nacom pin pia botha Jesús pia pexeinya jume diwesi yawa xua boxithano. Matautano cuidubano xua Jesús apara Mesías pon Nacom itorobica.

6

Meje yabara poxonae Jesús pia peitorobi jiwi tatsi itapeta siete poyobe peyawenaenexa tsane ichamonaetha

¹ Barapoxonae barapo mataqueitha pinmonae jume cowanta Jesús. Pomonae xua griego jume pecueicueijeijiwi anaya tsipaeba, pomonae xua hebreo jume pecueicueijeijiwi baraichi, jeye: “Patamonae, powaxi pecuenta werapaewaxichi piseurixi powaxi griego jume pecueicueijeiwaxi poxonae judiomonae apata pexaewa, barapowaxi saya peyauxi apatatsi

pexaewa. Ichitha meisa judi monaewaxi powaxi pecuenta werapaewaxichi barapowaxi jopa juniya nabaneibiyo”, jei. ² Jesús pia peitorobi jiwi tatsi, pomonae doce poyobe, barapomonae barꞰ nacaetuta ichamonae pomonae irꞰ Nacom pejume cowantsiwi. Barapomonae pomonae Jesús pia peitorobi jiwi tatsi jeye barapomonaetha:

—Painta jopa yapu xanepanaeyo xua pata nacui barapentsiwa xua pata cueicueijeiwa Nacom Pejume Diwesi xua saya pexaewa pata apatsinexa jiwi. ³ Daxota wajiwimonae paitapere siete poyobe pebinbe paxam jiwana. Paitapere pomonae xua daxita jiwi ita cui jꞰntꞰ coyene xanepaneibatsi, pomonae xua jꞰntꞰ coyene yꞰcatsi Nacom pia Pejumope tꞰnaxꞰ tatsi pia peayapusꞰwatha tatsi, pomonae xua peyaputaewi. Barapo siete poyobe pacui itorobin xua pexaewa apateibina. ⁴ Baroxonae paxan Jesús pia peitorobiwi tatsi pan, jopa paapatsin tsane pexaewa. Saya meisa Nacom pata tsipaebeibichi nawita yawa pata cueicueijei tsaibichi Jesús pejume diwesi, jei barapomonae.

⁵ Jesús pejume cowantsi jiwi tatsi nanta jꞰpayaya nanta xeinarꞰcꞰpa. Baroxonae Esteban itapetatsi. Bapon Esteban pon bichocono jume cowanta Jesús yawa bichocono jꞰntꞰ yꞰcatsi Nacom pia Pejumope tꞰnaxꞰ tatsi pia peayapusꞰwa tatsi. Itapetatsi Felipeno, irꞰ Prócoro, irꞰ Nicanor, irꞰ Timón, irꞰ Parmenas, irꞰ Nicolás. Bapon Nicolás Antioquía tomarapin. Bapon copiya jopa naexanaeyo judi monaepin. Poxonae jume cowanta Nacom, baroxonae

judiomonaepin naexana. ⁶ Barapoxonae barapo siete poyobe Jesús pejume cowantsi jiwi tatsi capona Jesús pia peitorobi jiwi tatsitha. Jesús pia peitorobi jiwi tatsi mata jayabiya tawuca Nacomtha xua Nacom yawenaena barapomonae.

⁷ Pinmonae jume tane Nacom Pejume Diwesi. Pinmonaeno iru jume cowanta Cristo Jesús, pomonae Jerusalén tomaratha jinompa. Iru judiomonae pia sacerdotemonae tatsi, barapocotsimonae pin bicheito jume cowanta.

Meje yabara poxonae Esteban waetabatsi

⁸ Esteban pexeinya petsita itutsi coyenewan exaneiba jiwitha Nacom pia peayapusu itorobi coyenewatha tatsi. Tsipei Nacom yanta popona bapon daxota Esteban Nacom yaweneibatsi pecatsixaetsi peayapusuwa. ⁹ Nexata nacaetuta pinmonae judiomonae pia penacaetutsi botha tatsi. Ichamonae wun dutatsi xua jeichichi: “Pomonae pepu sorobabebiwichi poxonae busi cui tatayebabatsi”, yabara wun jeichichi. Iru nanacaetutapona Cirene tomarapiwi, iru Alejandría tomarapiwi, iru Cilicia nacuapiwi iru Asia nacuapiwi. Daxita barapomonae Esteban jume matsontsonobatsi. ¹⁰ Ichitha Esteban xaniwaicha cueicueije exanatsi Nacom pia Pejumope tunaxu tatsi. Daxota poxonae Esteban paeba barapomonae jopa itacupaetsi xua beta pejume notsiwa. ¹¹ Nexata barapomonae po pin bicheito penacaetutsimonae ichamonae nantsiyatsiya catatsi paratixi petacamuxuitorobinexa tsainchi xua Esteban paeba. Barapomonae pomonae pemuxuitorobi

jiwi namchi xua Esteban Moisés baraunchichi abe jei, yawa xua Nacom baraunchichi abe jei. ¹² Barapo jumetha pemuxitorobi jiwi daxita jiwi anaepana exanatsi xua Esteban jume canaerabatsi. Pitiri jiwino anaepana. Irꝰ pomonae jiwi pecuidubiwi Moisés pia peitorobi coyene tatsi barapomonaeno irꝰ anaepana. Daxota barapo penapatae jiwi irꝰ pomonae jiwi pecuidubiwi Moisés pia peitorobi coyene tatsi barapomonae Esteban yorobateicatsi. Pentacaitorobi bicheito peitabaratha capoinchi. ¹³ Barapo pentacaitorobi bicheito equeicha waba pomonae Esteban jume cui canaerabatsi wabatsi. Barapomonae pomonae penaerabiwi Esteban yabara jeichichi:

—Bapon Esteban Nacom pin pia bo tatsi baraunchichi abe jei. Barichi bapon Esteban Moisés pia peitorobi coyenewa tatsi baraunchichi abe jei. ¹⁴ Pajume tan, xua Esteban paeba xua pinae Jesús Nazaret tomarapin paeba. Jesús pinae namchi, pinae jeye: ‘Barapo bo Nacom pin pia bo tantanaca exanaein’, pinae jei Jesús. Equeicha Esteban namchi xua pinae Jesús paeba pinae jeye: ‘Tamropata pitaban po peitorobi coyenewa xua bayatha Moisés paca itoroba’, jei pinae bapon Jesús, jei barapomonae pomonae penaerabiwi.

¹⁵ Pomonae baxota ena pomonae pentacaitorobi bicheito, barapomonae Esteban necotenatsi. Barapomonae itabara tayena xua Esteban peitabara be matatsunpin itabara, xua bichocono wanae.

7

Meja yabara poxonaē Esteban pentacaitorobi bicheito itabaratha pia coya paeba

¹ Nexata sacerdotemonae pia pepa pentacaponaein tatsi bapon Esteban baraichi, jeichi: “¿Bara xainyei xua barapomonae cabarai?” jei sacerdotemonae pia pepa pentacaponaein tatsi. ² Esteban jume nota, jeye: “Tamonaē pam pana nejume taema. Wanacom w̄nae nawita. Barapon Abraham tsita nait̄tatsi poxonaē caena bayatha awiya Mesopotamia nacuatha popona. Bapon Abraham wamo susatopin matha copiya tsiwanaeya popona Mesopotamia nacuatha poxonaē Harán tomara bewarapiya. ³ Nacom pinae Abraham baraichi: ‘Barapo ira jinya ira cuenta warapare. Jinyamonaeno cuenta warapare. Icha ira bewarapiyama ichaxota po ira beya cacaponaeinchi’, jei pinae Nacom. ⁴ Nexata pinae Abraham Caldea nacua wewarapiya. Harán tomara pinae bewarapiya. Poxonaē pinae Abraham Harán tomaratha popona pinae Abraham paxa tat̄patsi pon pew̄n Taré. Bapoxonaē Nacom, Abraham pinae itorobatsi barapo irathe po irathe pajinompame anoxuae. ⁵ Barapoxonaē pinae Abraham cataunxuae jopa catichi ira. Saya pinae tacayabara w̄nae tsimuxu dutatsi. Nacom pinae Abraham baraichi: ‘Jinya ira tsane, ir̄a jinya jiwi penaitapataya naexana dubenaponeibiwi tsane pomonaē jinya nemomo susato jiwi pia ira nexa tsaner̄a’, jei pinae Nacom. Ichitha pinae barapoxonaē jopa xeinaeyo pexui. ⁶ Baraxua Nacom pinae

Abraham baraichi: ‘Jinya nemomo susato jiwi icha nacuatha jinompaena. Be pomonae penanapaincha jinompaewi tsicotaeinchi xua be pocotsi jiwimonae icha nacua werena peponaewi. Tanacuitinchi ichamonae xua amanaya tanacuichina. Busi cui tatayebeibinchino. Caitacueintinchino yawa. Cuatrocientos po weiyobe tsane xua jinyamonae naitapataya atene exaneibinchi’, jei Nacom Abrahamtha. ⁷ Equeicha Nacom tsipaeba Abraham, jeye: ‘Barapomonae xua abe pacata exanaena poxonae paca busi cui tataibina barapomonae jopa cui jantemaigne tsane. Barapomonae itawetsiya peraxa jabin. Bapoxonae jinya nemomoxi susato jiwi warapaena po nacuathe ichaxota uncuame yawa wuna nejinchina xote’, jei pinae Nacom Abrahamtha. ⁸ Nacom pinae Abraham itorobatsi xua peexanaenexa po coyene xua pexui pebin wutixi pewi thabiwatsi xua ichaxota nareixacaena. Barapo coyene exana Abraham penanta xeinaenexa iru piamonae tatsi xua po coyene bayatha Nacom pinae yabara tsiwuna muxu duta, xua bepa pinae yaweneibina xua barapomonae pinae bepa yaweneibinchi. Daxota pinae poxonae Abraham pexanto tanaexanatsi pexanto wi thaba, pinae pewun Isaac. Isaac iru pinae barichi pexanto wi thaba, pinae pewun Jacob. Jacob iru pinae barichi wi thaba pexanto jiwi, pomonae bayatha Israel nacuamonaepiwi pia pentacaponae tanaexanatsi barapo doce poyobe.

⁹ “Jacob pia pexanto jiwi tatsi, barapo doce poyobe, wamo susatomonae. Barapo doce poy-

obe jiwana caein pewan José. José pentapin jiwí uwatsi. Daxota José pentapin jiwí caenaetatsi. Pomonae bapon José comotatsi barapomonae José Egipto nacua becayiyatsi. Pon be jiwí pebusi cui tataibinchi be bapocotsin petsicotaenexa tsainchi. Ichitha Nacom José yawenatsi pebaru poponaexaetsi. ¹⁰ Poxonae José abe jume baraunchaibichi ichamonae, yawa poxonae muxu atene peexaneibichi awiya José capanepeibatsi Nacom. Poxonae faraón peitabaratha taponatsi José, Nacom exana xua José faraón tsita juntá coyene xanepanatsi. Matautano Nacom peyaputaein exanano. Bapon faraón Egipto nacuamonae pia pepa peewatsinchi tatsi. Faraón cana exana xua José Egipto nacuapiwi yanacua ewatatsi faraón nexa. Matautano faraón cana exana xua José canamataxeina daxita xua xuan faraón xeina.

¹¹ “Barapoxonae Egipto nacuatha jainbo nacua tsurucuaeno, Canaán nacuathano irá. Pata amo susato jiwí jopa pexaewa taeyo. Yawa piyain pewerapae nacua tsurucuae poxoru pexaewa ajibi.

¹² Poxonae Jacob jume tane xua trigo xu xeina Egipto nacuatha, pia pexui bara beitorobiya. Barapon Jacob pia pexui tatsi, pata amo susato jiwí. Baraxua poxonae xua copiya aena pona Egipto nacuatha. ¹³ Poxonae equeicha pona José pentapin jiwí tsita naitapeinya xeina xua bapon bara peweicho jiwí tatsi. Bapoxonae faraón yauptane xua barapomonae apara bara José piamonae tatsi. ¹⁴ Pirapae José pentapin jiwí itoroba xua petabarú dendenaenexatsi paxa tatsi, pon pewan Jacob, matautano piamonae tatsi petabarú dendenaenexatsi po jiwimonaexae xua setenta y

cinco poyobe. ¹⁵ Daxota Jacob iru pijimonaeno Egipto nacua beya warapa. Baxota pirapae bapon tupa. Iru pirapae pata amo susato jiwino weraparuru baxota. ¹⁶ Pirapaeno Jacob piwan capoinchi Siquem tomara beya. Baxota piwan muthutha xotsi, po ira bayatha Abraham comota, po ira Hamor pexantixi tatsi caenaeta.

¹⁷ “Ainya wei tsuxubi. Poxonae barapomonaeno Egipto nacua wewarapiyaenaba, be pocotsi coyeneya bayatha Nacom yabara tsiwunaen muxu duta, bapoxonae Israel nacuapiwi pinmonae naexana. ¹⁸ Nexata Egipto nacuatha ichun nacua peewatsin naexana, pon José jopa yaputaetsi. ¹⁹ Barapo Egipto nacuapiwi itorobiya pia pepa peewatsinchi tatsi pata amo susato jiwi muxuitorobeibatsi. Yawa cuainteibatsino. Yawa cobe itorobeibatsino xua pexui saya pebebainexa tsaibi tsane aisowatha xua pewerapeibinexa. ²⁰ Barapoxonae iru Moisés naexanaru. Moisés paxa pia botha wichatatsi acoibi po xometiyobe. Barapon Moisés pexeinyan nawita Nacom tsita juntu coyene xanepanecatsi barapo pexuyo. ²¹ Poxonae Moisés pena xotsi yawa paxa xotsi namicha jeriyotha yana botetatsi mentha xua musuripawa cuba, barapoxonae faraón pexantiyo tatsi Moisés pitatsi. Be pexanto tsicotane, pia botha wichata. ²² Bapon Moisés nacuiduba nawita pocotsiwa Egipto nacuamonae yaputane. Daxota peyaputaen tsecaeno, wunaen peexanaen tsecaeno.

²³ “Pirapae poxonae Moisés yacuarenta po weibe jopa, bapon nanta xeina xua piamonaen pesiwa ponaewa pomonaen Israel

nacuamonaexae. ²⁴ Poxonae Moisés piamonae siwa pona, bapon tane xua piamonae jiwana tatsi tabutsi, Egipto nacuapin. Daxota Moisés yawena pon piamonae jiwanaxae tatsi yawa bexuba Egipto nacuapin. ²⁵ Moisés nanta xeina, pia coutha nabarai: ‘Tamona, Israel nacuamonaepiwi neyaputaena xua Nacom neitoroba. Mata cawarapaein barapomonae Egipto nacua weya, penacapanenebiyaenexa tsane’, najei. Ichitha daumetha barapomonae jopa tsaqueinaeyo. ²⁶ Icha matabitha Moisés tane xua caepinbe iru nababeru Israel nacuamonaepinbe. Moisés barai baponbe: ‘Ja, ¿eta xua metha caepinbe pana nabamebe?’ jei. ²⁷ Pon piamonae ba, Moisés napuna torobabapoinchi. Moisés baraichi: ‘¿Jintam caitoroba pata xantha xua pon be jiw neyabara paebin penatsicuentsiwa xua abe peexanaexae, xuano xua jiw Necanamataxeinaem naexaname?’ ²⁸ ¿Jinya nebexuichi icha mexuae ichim Egipto nacuapin?’ jeichichi Moisés. ²⁹ Poxonae Moisés jume taebiriwa baxua, Moisés naetsiricua Madián nacua benaetsiricuiya. Baxota Moisés tanaexanatsi pexuyobe, pebin wutobe”, jei Esteban.

³⁰ Equeicha came Esteban barapomonae baru cueicueijei. Namchi, jeye: “Caentacabi pirapae poxonae cuarenta po weibe pu caewa, xua poxonae equeicha icha cuarenta po weibe xeina, Moisés popona ichaxota ira xuepana susato tsurucuae nacuatha. Imoxoyo demxuwan, po demxuwan pewun Sinaí baraxota Moisés tsita naitutatsi matatsunpin xua poxonae isototha uncua xua

taxuncua tsica naeyo. ³¹ Moisés yabara najuntũ coyene cabenaeca. Bapon itatapoinya tsipei ichipa yaitane. Bapoxonae baxota Moisés jume tane xua Nacom namchi: ³² ‘Apara jinya amo susato jiwi pia Nacom tatsin. Irũ apara, Abraham pia Nacom tatsin. Irũrũ apara Isaac pia Nacom tatsin. Apara irũ Jacob pia Nacom tatsin’, jei Nacom. Moisés pijunuwi bichocono jiyijiyei daxota aichaxaibi xua tane. ³³ Nacom pinae Moisés baraichi: ‘Xua nataxu xatatame nataxu wejonde, poxoru po iratha poname apara tairiyo. ³⁴ Tamonae, pomonae Egipto nacuatha jinompa bichocono atene exaneibatsi yawa jume tanno xua nanenaba. Daxota barapomonae capanepan. Antha, caitorobatsi equeicha necoyo beya, Egipto nacua beya’, jei pinae Nacom”, jei Esteban.

³⁵ Equeicha Esteban namchi, jeye: “Pomonae Egipto nacuatha jinompa, barapomonae Moisés aichaxaibichi. Barapomonae Moisés baraichi: ‘Jintam caitoroba pata xantha xua naexaname pon be jiwi neyabara paebin xua penatsicuentsiwa xua abe peexanaexae xuano xua naexaname pon be necanamataxeinaein?’ jei barapomonae. Bequein barapomonae baxua paeba ichitha Nacom cana exana xua bapon Moisés naexana be pon jiwi peyabara paebin xua penatsicuentsiwa xua abe peexanaexae. Mataũtano Moisés cana exanatsi pon pecapanepaein piamonae. Baxua Moisés naexana poxonae matatsunpin itoroba po matatsunpin Moisés tsita naitũtatsi poxonae isototha uncua xua taxuncua tsica naeyo. ³⁶ Bapon Moisés pon wamo susato

jiwi capanepatsi Egipto nacua weya. Moisés petsita itutsi coyenewan exana Nacom pia peayapuswatha. Baxua exana Egipto nacuatha, Mar Rojo menthano. Matautano exanano ichaxota ira xuepana susato tsurucuae nacuatha cuarenta po weibetha. ³⁷ Moisés Israel nacuamonae jiwitha namchi: ‘Nacom paca jiwana cana exanaena pon pia peitorobi jume petapaebinchi icha neichi barichi tsane. Bapon xua pon Nacom itorobina, apara pon painyamonae jiwana tsane’, jei Moisés. ³⁸ Matautano apara bapon Moisés pon nanacaetuta poxonae Israel nacuamonae nacaetuta ichaxota ira xuepana susato tsurucuae nacuatha. Matautano bapon Moisés diwesi tsipaeba jiwitha xua petsipaebixae si matatsunpin poxonae tsipaebatsi demxuwatha po demxuwa pewan Sinaí. Barapo diwesi po diwesi Moisés wamo susato jiwi tsipaebatsi barapo diwesi jiwi cana exanatsi xua peajuntayapuswa pexeinaewa. Barapo diwesi iru waxainchi nexaru.

³⁹ “Ichitha barapomonae wamo susato jiwi jopa bejume jejeyo xua peexanaewa pocotsiwa Moisés itorobatsi Nacom. Moisés jume matawentatsi. Saya barapomonae ichipa xua equeicha caibeya penawibiwa Egipto nacua beya. ⁴⁰ Poxonae cataunxuae Moisés demxuwatha pona, barapoxonae barapomonae Moisés peweicho tatsi pon pewan Aarón, bapon baraichi: ‘Painta exande ainya ibo nain nacomun. Barapo ibo nain nacomun naca tsiwana copiya cajjincaena namtotha. Jopa payaputaeinyo xua Moisés aichawiya

pon pana matabona Egipto nacua weya', je-
 ichichi Aarón. ⁴¹ Barapoxonae barapomonae pe-
 nain nacom exana be vacayo pebtiyo canaxo-
 beta. Bapoxonae barapomonae tabexuba oveja,
 penain nacom vacayo nexa. Tsipei barapomonae
 nanta xeina xua metha penain nacom ichichipa
 baxua. Barapomonae bichocono j_{unt} coyene
 weiweina penain nacom pia coya peexanaexae,
 xua pin penabanaewa xua pebar_u itura jinaenex-
 atsi barapo ibo nacom. ⁴² Barapomonae Nacom
 wepu tsatajopa tsipei barapomonae pia penain
 nacom exana. Nacom bara copata barapomonae
 xua bara barapomonae bara exanaena be pocotsi
 coyeneya xua ichichipa peexanaewa. Daxota
 barapomonae opitei be nacom cana exana, po
 opitei barapomonae w_unae jainta. Barapomonae
 pomonae wamo susatomonae, exana pocotsiwa
 caena bayatha Nacom pia peitorobi jume pepae-
 bin yabara cui tsiw_unae muxu dutsiya tina. Bapon
 diwesi tina xua Nacom jume yabara tinatsi xua
 Nacom namchi barapo diwesitha, jeye:

'Israel nacuamonae, paxam oveja pabexubame
 painya penain nacom_un nexa,
 ichitha xan nexa jopa paraichim.
 Baraxua paexaname poxonae pajinompame
 ichaxota
 ira xuepana susato tsurucuae nacuatha
 xua cuarenta po weibetha.

⁴³ Yawa pacaponame penain boutiyo nacom
 po penein boutiyo nacom pew_un Moloc.
 Yawa pacaponame icha penain opitei nacom
 po opitei penain nacom pew_un Refán.
 Barapo penain nacombe paexaname

painya w_hnae jaintichi.

Daxota xan itorobin ich_hn xua paca mata cawarapaena Babilonia nacua beya.

Bequein jopa bepawarapaem ichitha awiya paca itorobinchi', jei Nacom.

⁴⁴ "Wamo susato jiwi exana xua be bo xua anseraboco, xua ichaxota tututha jeba ibo xua po iboton Moisés mata tina xua Nacom pejume caitorobiwan. Barapomonae cuita acaba be pocotsi boyo Moisés tsita it_htatsi Nacom. ⁴⁵ Wamo susato jiwi poxonae tawerapatsi paxa tatsi, itor-ein pita barapo boyo xua anseraboco boyo. Pata tamo jiwi Nacom pia boyo capona poxonae Josué napon. Poxonae pata tamo jiwi ainya nacuan nonota tsiniya barapoxonae equeicha barapo anseraboco boyo capona beya yacobe cui matabi othopa poxonae David popona pon Israel nacuapiwi itorobiya pia pepa peewatsinchi.

⁴⁶ Bapon David pon Israel nacuapiwi itorobiya pia pepa peewatsinchi tatsi, Nacom tsita peju_hnt_h coyene xanepanaeinchi. Bapon David ichichipa xua acaba pin bo Nacom nexa po Nacom Jacob pia Nacom tatsi. ⁴⁷ Ichitha Salomón bapon apara pon Nacom pin pia bo exana. ⁴⁸ Bequein Nacom pon pepa Nacom jopa poponaeyo botha pocotsi bo jiwi acaba Nacom nexa. Nacom peitorobi jume pepaeb_hin baxua yabara paeba xua Nacom tapaebatsi, jeye:

⁴⁹ 'Peitaboco apara ichaxota ta-
queibithopeibiwa.

Ira apara ichaxota nataxu y_htabotan.

¿Eta pocotsi bo netsiexanaename?'

jei pon Wanacanamataxeinaein.

Matautano jeino: ‘Ichacuitha ¿eta po irara xua ichaxota nafinacaecaen?’

⁵⁰ Apara xan tacoutha exanan daxita ira yawa peitaboco daxota jopa nantawenonaeyno xua ichawa tana netsiexanaewam’, jei Nacom”, jei Esteban.

⁵¹ Equeicha Esteban barai, jeye: “Maisa bichocono pajuntá coyene daunwam xua jopa bepayaputaem. Matautano pamuxu tutu daunwam, yawano pajuntá coyene daunwam icha be pocotsimonae ichi pomonae jopa peyaputaewi Nacom. Barichi paaichaxaibim Nacom pia Pejumope tñaxá tatsi. Paxam bara paichim icha painya amo susato jiwi ichi.

⁵² Apara painya amo susato jiwi bayatha Nacom pia peitorobi jume pepaebiwi catsa jume bará paebatsi, yawa cueintatsino. Matautano bayatha jutebatsi barapomonae pomonae Nacom pia peitorobi jume pepaebiwi, pomonae namchi: ‘Bexa patopaena pon pepa pejuntá xanepanaein pon Mesías baraichi’, jei. Cain paxam, barapon poxonae patopa, pacaenaetame, pabexubameno.

⁵³ Nacom pia peitorobi diwesi pajume taneme xua matatsunpiwi paca tsipaeba Nacom nexa. Ichitha jopa paexanaem pocotsiwa Nacom paca itoroba barapo pia peitorobi diwesitha”, jei Esteban pentacaitorobi bicheitha.

Meje yabara poxonae Esteban tñpa

⁵⁴ Poxonae pentacaitorobi bicheito jume tane pocotsiwa Esteban paeba, bapoxonae bichocono Esteban yabara cui anaepanarñçpatsi. ⁵⁵ Ichitha

Esteban bichocono juntu coyene yuca cana exainchi Nacom pia Pejumope tñaxu tatsi pia peayapusuwatha. Esteban athabeicha necoicha. Bapon necota Nacom pia peitapanae coicha tatsi iru Jesucristo xua uncua Nacom pecoxatha tatsi.

⁵⁶ Nexata Esteban namchi, jeye:

—Incane pataema. Necotan xua peitaboco naitaboco coibo yausaranaxuba. Tan Jesús xua uncua Nacom pecoxa weya tatsi ponxae Nacom pia Peitapetsin tatsi, jei Esteban.

⁵⁷ Barapomonae jume itapataya namuxu acaba pocotsiwa Esteban paeba. Yawa anaepanaya wawai. Barapomonae be cae bicheito naexana pomonae Esteban betacuinaeyiyatsi.

⁵⁸ Barapomonae Esteban aisowa bexoyatsi tomara weya. Yawa baraxota ibotontha cuinbabatsi. Pomonae abe peexanaewichi Esteban, barapomonae Saulo juma camisa jeba xua pocotsiwan nainya werubiya. Bapon Saulo pon pewowin xua bayatha pinyo.

⁵⁹ Poxonae barapomonae Esteban cuinbabompatsi ibotontha bapoxonae Esteban tsipaeba Nacomtha, jeye: “Jesús, pon Tanecanamataxeinaem, nejumope tñaxu pire”, jei Esteban. ⁶⁰ Bapoxonae pentabocototha uncua. Namtsebiya wawaino, jeye: “¡Jesús, Tanecanamataxeinaem! ¡Necana cui jumentainare, yawa jopa neyantomatsinde xua barapomonae inta abe exana!” jei Esteban.

Poxonae najume wetaba, tñpanaicha Esteban.

8

¹ Saulo iru baru ita cui wñnaetsi poxonae ichamonae Esteban bexotsi.

Meje yabara poxonae Saulo abe exana pomonaetha pomonaes Jesús pejume cowantsiwi

Po matabitha Esteban bexotsi, barapo matabitha judiomonaes tamropata notarucupa xua Jesús pejume cowantsi jiwí tatsi bichocono abe exanatsi Jerusalén tomaratha. Daxita Jesús pejume cowantsi jiwí tatsi yotabatsi. Ichamonaes Judea nacua berucupiya, ichamonaes Samaria nacua berucupiya. Meisa Jesús pia peitorobi jiwí tatsi pomonaes xua doce poyobe ena Jerusalén tomaratha. Jopa ducupaeyo. ² Ichamonaes, pomonaes Nacom pejume cowantsiwichi, Esteban muthutha xotsi. Barapomonaes Esteban bichocono siwa wecoyeichi. ³ Saulo jeita ducua-naeta Jesucristo pia pejume cowantsi jiwí tatsi. Daxita bomuxun jupaya Saulo jiwí teteica tsiniya yabuxino pebiwino. Jiwí pecubi bo beya capona.

Meje yabara poxonaes Jesús pejume cowantsi jiwí tatsi paeba dubenanaebiya Jesús pia pexeinya jume diwesi tatsi Samaria nacuatha

⁴ Pomonaes bewa Jerusalén tomara werucupiyaena barapomonaes Jesucristo pia pecapanepae jume diwesi paeba dubenanaebiya daxita po tomarantha xua pateiba. ⁵ Barapomonaes jiwana tatsi pon Felipe baraichi bapon pona pepa tomaratha Samaria nacuatha. Barapo tomaratha tamropata pitaba xua pecueicueiweiwa Cristo yabara. ⁶ Jiwí nacaetuta dubenanaebiya. Matautano jume naitomatsiya jume taerubenanaebiya pocotsiwa Felipe cueicueiwei Cristo yabara. Matautano barapomonaes taerubenanaebiya pexeinya

petsita itutsi coyenewan xua Felipe exana Nacom pia peayapusu itorobi coyenewatha. ⁷ Pomonae xua cauri pexeinaewi, barapomonae equeicha axaibi exanatsi poxonae Felipe taitaweta cauri. Matautano caurimonae barapomonae wawaya wepu ducupeibatsi. Ichamonae pomonae pecuenobichi jiwi, pejayujayujeimonaeno, daxita barapomonae axaibi exanatsi. ⁸ Felipe baxua peexanaexae daxota barapo tomarapiwi bichocono juntu coyene weiweinaya jinompa.

⁹ Barapo Samaria tomaratha popona pon pentawan Simón. Bapon Simón mara pexeinaein. Matautano bapon barapo Samaria tomarapiwi muxujainyabeibatsi poxonae bapon pia coya pentacaponaein naexana. ¹⁰ Daxita tomarapiwi pomonae peacopeibiwi iru pomonae nawita pexeinaewino, barapomonae beta jume naitaewata pocotsiwa Simón paeba. Barapomonae namchi, jeye: “Barapon Simón apara pon yabara jeichichi: ‘Pon bichocono Nacom pia peayapusuwa tatsi xeina’, yabara jeichi”, jei barapomonae.

¹¹ Daxita barapo tomarapiwi itapeta jume naitaewata pocotsiwa Simón paeba, tsipei saya caena bayatha barapomonae muxujainyabatsi mara peexanaewi pia coyeneyatha tatsi.

¹² Barapomonae jume cowanta po pexeinya jume diwesi Felipe cueicueijeji xua Nacom yawa Jesucristo yabara, po diwesi xua Nacom waba jiwi petanaexanaenexatsi pijimonae tatsi jiwana pomonae Nacom itorobiya ewata. Bapoxonae barapomonae bautisabatsi pebiwi yawa yabuxino. ¹³ Bapoxonae bapon Simón

irꞫ jume cowꞫnta. IrꞫno bapon bautisabatsi. MataꞫtano bapon tamropata pitaba xua Felipe peyantsiwatsi. Bapon Simón yabara najꞫntꞫ coyene cabenaeca bichocono poxonae Felipe pexeinya petsita itꞫtsi coyenewan exana Nacom pia peayapusꞫwatha.

¹⁴ Jesucristo pia peitorobi jiwi tatsi, pomonae peenaexae Jerusalén tomaratha, jume tane xua Samaria nacuamonae jume cowꞫnta Nacom Pejume Diwesi. Daxota barapomonae Pedro itorobatsi irꞫ Juan itorobatsi, Samaria nacuamonae beya. ¹⁵ Poxonae Juan Pedrobe patopabe barapomonaetha, bapoxonae Nacomtha tawꞫcabe Samaria nacuapiwi nexa, pomonae pejume cowꞫntsixa Nacom. Baponbe ichichipabe xua barapomonae peyanaba jinompaenexatsi Nacom pia Pejumope tꞫnaxꞫ tatsi. ¹⁶ Pedro irꞫ Juan tawꞫcabe barapomonae Nacomtha. Tsipei barapomonae awiya cataunxuae jopa tapatichi pia jꞫntꞫ coyeneintha Nacom pia Pejumope tꞫnaxꞫ tatsi. Saya meisa poxoru bautisabatsi Jesús pon Pecanamataxeinaein jiwi bapon pewꞫntha tatsi. ¹⁷ Pedro irꞫ Juan, pecobetha mata jayababe barapomonae. Barapoxonae barapomonae tapatatsi pia jꞫntꞫ coyeneintha tatsi Nacom pia Pejumope tꞫnaxꞫ tatsi.

¹⁸ Poxonae Simón cui tane xua Pedro Juanno pecobetha mata jayababe xua daxota Nacom pia Pejumope tꞫnaxꞫ tatsi tapatatsi barapomonae, Simón ichichipa xua pecatsiwa paratixi bapon-betha. ¹⁹ Simón namchi, jeye:

—Dapo peayapus_uwa necare. Tha ir_u poxonae mata jayabeiban ichamona_e tapateibinchi Nacom pia Pejumo_pe t_unax_u tatsi, jei Simón.

²⁰ Nexata Pedro Simón baraichi, jeye:

—Barab_u xam yawa jinya paratixino cayawa muxuna weraweraca exanaena, tsipei saya nanta xeiname xua necaitac_upaewa xua Nacom pia peayapus_uwa tatsi necomotsiwa paratixitha, po peayapus_uwa bequein Nacom amanaya pecatsiwa jiwitha. ²¹ Jopa caitac_upaeyo xua nexainaewa Nacom pia peayapus_uwa tatsi, tsipei apara Nacom caj_unt_u coyene yaputane xua neaj_unt_ucoyenebewa. ²² Nacui baraxore jinya abe neexanae cuiru coyenein. Nacom w_ucare, xain Nacom cayabara j_untemaina xua nanta xeiname baxua. ²³ Catainchi xua pejume uwiwa nenth_utotha xeiname. Xam neabewa canth_uth_u yancababa daxota beta jopa xapain poponaem, abe nanta xeiname jincoutha, jei Pedro.

²⁴ Nexata Simón jume nota. Pedro ir_u Juan jume notatsibe, jeye:

—Painta yabara w_ucarebe Nacomtha baxua xu-aunxuae pana netsipaebamebe, xain bapoxonae xeinaein barapo coyene xua jopa abe tana necana exanaenexa, jei Simón.

²⁵ Bapoxonae Pedro Juanno ichamonaetha nacui yopitabe po coyene xua bayatha jume cow_untabe Nacom. Yawa xua penth_utotha taecatsibe Nacom pia Pejumo_pe t_unax_u tatsi. Baponbe Nacom pia pexeinya jume diwesi tsipaebabe barapomonaetha. Jerusalén tomara bewarapiyabe. Poxonae warapabe, Jesús pia

pexeinya jume diwesi papaeba tsiniyabe Samaria nacuatha. Ainya tomarantha cueicueijeibe.

Meje yabara xua poxonae Felipe iruru Etiopía nacuapin nantenta ponabe namtotha

²⁶ Barapoxonae pirapae, Jesucristo pon Pecana-mataxeinaein jiwi, bapon pia matatsunpin tatsi, Felipe tsita naitatsiya tsipaebatsi, jeichichi: “Non-taponde, yawa ponde pocotsiwa parowa bereca. Jerusalén namto iyande xua po namto Gaza tomara betaerucuiya”, jei matatsunpin. Barapo namto ducuiya ichaxoyo ira xuepana susato tsurucuae nacua iya. ²⁷ Felipe nantacotaxuba, bapoxonae bara ponataba. Poxonae Felipe namtotha ecapona, bapoxonae caxina pebin Etiopía nacuapin. Barapon pon pentacaponaein pon peainya cui jiton. Matautano bapon paratixi tayapu eena xua yabuyo nexa powa Etiopía nacua pepa peewatsiwayo. Bapon Etiopía nacuapin bayatha pona Jerusalén tomara beya xua wuna pe-jainchinexa Nacom. ²⁸ Bapon caewa pia nacua siwa ecapona Etiopía nacua. Cawayu pecapona naeyotha ecapona yawa yorobecapona po diwesi bayatha Isaías tina, pon Nacom peitorobi jume pepaebin.

²⁹ Nacom pia Pejumope tunaxu tatsi Felipe baraichi, jeye: “Imoxoyo ponde cawayu pecapona naeyo beya yawa imoxoyo caquita naecaponde”, jeichichi Felipe. ³⁰ Felipe cuinaepona cawayu pecapona naeyo beya, ichaxota jume tane xua yoroba Etiopía nacuapin. Bapon yoroba Nacom Pejume Diwesi, xua po

diwesi bayatha Isaías tina. Felipe barai bapontha jeye:

—¿Bara yaputaneme xuaunxuae yorobame? jei.

³¹ Bapon Felipe jume notatsi, jeye:

—¿Eta bichin xua tayaputaewa icha dapon aibi pon yabara neyaputane exana barapo diwesi? jeichi Felipe.

Felipe wabatsi xua penontabinaenexa xuano xua peecaenexa ichaxota bapon eca. ³² Po diwesi ichaxota bapon yoroba xua baxue meje:

“Be poxonae jiwi oveja yama capona pebexubinexa tsane, barichi tsane jiwi caponaena jiton pebexubinexa tsane.

Be cordero moya, jopa papayo poxonae na thabatsi

barichi tsane jiton moya tsane, jopa papai tsane poxonae caitacueintinchi poxonae yawa aperatane tsaneno.

³³ Jiton ura exanaeinchi.

Jiwi ura exanaena.

Jopa beta yabara exanae tsainchi poxonae jiton atene tsane poxonae jopa bequein abe exanaeyo.

Jiwi jopa yabara paebi tsane xua pia pexui tatsi, poxoru jopa nantaatsi tsane pexui, pemomoxino.

Jiwi barapo jiton bexubinchi”, jei Nacom Pejume Diwesi, po diwesi Isaías tina xua ichaxota yoroba Etiopía nacuapin.

³⁴ Nexata Felipe yainyabatsi Etiopía nacuapin, jeichichi:

—Incane netsipaebare, ¿jintam Isaías yabara jei? ¿Pia coutha nayabara jei jampa? ¿Bara metha ichan yabara jeichi? jeichichi Felipe Etiopía nacuapin.

³⁵ Felipe yaputane exana Etiopía nacuapin po diwesi xua Isaías tina Jesús jume yabara. Bapoxonae nama paeba po coyene Jesús pia pexeinya jume diwesi tatsi. ³⁶ Poxonae Felipe Etiopía nacuapinno namtotha ecaponabe, bapoxonae Etiopía nacuapin namchi, jeye:

—Taema meniyo eque jeba. ¿Jopa nebautisabim tsane? jeichichi Felipe.

³⁷ Felipe barai, jeye:

—Icha daxita carepaya jume cowantame nejantá coyenetha, methaunxuae bara cabautisabinchi, jei Felipe.

Etiopía nacuapin Felipe jume notatsi, jeye:

—Bara yabara jume cowantan xua Jesucristo, bara Nacom pexanto tatsi, jei bapon.

³⁸ Nexata Etiopía nacuapin cobe itoroba xua duntabina pon xua cawayu pecomaecaein. Nexata duneicabe Felipe Etiopía nacuapinno. Meniyo bejonecabe. Nexata Felipe meniyotha bautisaba Etiopía nacuapin. ³⁹ Poxonae meniyo wejuinabe, Nacom pia Pejumope tñaxá tatsi Felipe puxanatsi. Felipe equeicha jopa taetsi Etiopía nacuapin. Saya equeicha Etiopía nacuapin jñntema pona pia nacua beya. ⁴⁰ Felipe taerucupatsi ichamonae Azoto tomaratha. Felipe daxita tomaran tamropatecapona xua pecueicueijejewa Jesucristo pia pexeinya jume diwesi tatsi, beya yacui jopa Cesarea tomaratha.

9

*Meje yabara poxonae Saulo jume cowanta Jesús
(Hch 22.6-16; 26.12-18)*

¹ Awiya came Saulo ichipa daxita pejutebiwa pomonae Jesucristo pejume cowantsi jiwi tatsi, pon Jesús Pecanamataxeinaein jiwi. Daxota Saulo siwa pona sacerdotemonae pia pepa pentacaponaein tatsi. ² Saulo wuca: “Necare cartan judiomonae pia penacaetutsi bon pia pentacaponaewi nexa. Tha tacaponaetsi Damasco tomara beya. Icha caxinaein pomonae Jesús pejume cowantsiwi tha jiwi pecabi botha caponaetsi Jerusalén tomaratha, pebiwino, yabuxino”, jei Saulo. ³ Saulo Damasco tomara beya pona. Poxonae bara muxu pepatopae, bapoxonae pin coicha yacaincha matawacaicha matatsun uncutabicsi. Barapo coicha peitaboco wejopeica. ⁴ Nexata iratha jopa Saulo. Yawa jume taneno xua pejume xua baraichichi, jeichichi: “Saulo, Saulo, ¿eta xua metha tamonae inta abe exaname?” jei pejume.

⁵ Saulo jume nota, jeye: “Pon jiwi Pecanamataxeinaem, ¿jintamamda?” jei Saulo. Saulo u pejume jume notatsi, jeye: “Apara bara xan Jesús, ponxaein inta abe cana exaname tamonae. ⁶ Nontaponde, tomara be-iyande. Baraxotiya catsipaebina pocotsiwa bewa exanaename”, jeichichi Saulo.

⁷ Pebiwi, pomonae Saulo puna poinchi bi-chocono pijunuwi moya umena tsipei saya u pejume jume tane ichitha pepon jopa xapain taeyo.

⁸ Saulo nantacotaxuba asiya uncua. Poxonae

necotaxuba jopa xapain taeyo. Daxota pomonae Saulo puna poinchi cobe capoinchi Damasco tomara beya. ⁹ Baraxota Damasco tomaratha Saulo eca acoibi po matabibibe. Jopa xapain necotsiyo. Barapo acoibi po matabibibetha jopa nabanaeyo, jopa apaeyono.

¹⁰ Baxota Damasco tomaratha popona pon pejume cowantsin Jesucristo. Bapon pewun Ananías. Ananías tsita naitapeinya xeinatsi Jesús poxonae camaita. Ananías tsipaebatsi Jesús jeichichi: “¡Ananías!” jeichi. Ananías jume nota, jeye: “Jai, apara xote ecanje, pon jiwi Pecanamataxeinaem”, jei.

¹¹ Nexata Jesús Ananías baraichi: “Nontaponde. Namto beya ponde, po namto pewun Bopiya perucuiyae namto. Poxonae Judas pia botha patopame, yainyabare barapo botha. ‘¿Incane Saulo, Tarso tomaramonaepin?’ jande. Iraunxuaerua Saulo Nacom tsipaebauya. ¹² Saulo amachinae xua cacamaita, xua Ananiam xua itacuere wunaetsiname Saulo necobetha”, jei Jesús.

¹³ Nexata Ananías jume nota, jeye: “Pon jiwi Pecanamataxeinaem, pinmonae netsipaeba xua pinae bapon cata abe exanatsi jinya jiwimona, pomonae Jerusalén tomaratha jinompa. ¹⁴ Bapon carta capatopa xote, po carta bayatha sacerdotemona, pia pentacaponae wi caitoroba. Saulo carta capatopa poxoru sacerdotemona jume jejei xua Saulo pinae bara caponaena jiwi pecubi bo beya pomonae cawun ununeiba poxonae Nacom tsipaebibatsi”, jei Ananías.

¹⁵ Jesús Ananías baraichi, jeichichi: “Ponde tsipei yaitama bapon bayatha Saulo itapetan.

Bapon Saulo tsipaebina tajume diwesi icha nacuantha, po nacuantha jinompa pomonae jopa judiomonae naexanaeyo. Matautano tsipaebina pomonaetha pomonae jiwi itorobiya pia pepa peewatsiwichi. Matautano tsipaebina barapo tajume diwesi israelmonaetha. ¹⁶ Tha bexa Saulo tsita itutichi po coyene xua bewa atene tsane tajume diwesi penatsipei cueicueijeixae tsane”, jei Jesús.

¹⁷ Nexata Ananías pona ichaxota Saulo eca. Poxonae joniya botha, Saulo pecobetha ainya cobethabe mata jayabatsi. Ananías namchi, jeye:

—Saulom, pon be tayapin catsicotainchi, nejume cowantsixae Jesús. Bapon Jesús pon jiwi Pecanamataxeinaein neitoroba, pon namtotha catsita naitata xuano xua catsipaebano. Jesús neitoroba nenecotsinexa tsane yawa Nacom necajuntá coyene yuca exanaenexa pia Pejumope tñaxutha, jei Ananías xua Saulo tsipaebatsi.

¹⁸ Barapoxonae caena nainya peitacueretotha be petsebocoton taothopeinatsi. Bapoxonae equeicha caewa wñnaeya daxita carepaya tane. Saulo asiya uncuá bapoxonae caena bautisabatsi.

¹⁹ Poxonae nabane bapoxonae cui thñnei tsanaya. Be caentacabiyobe Saulo eca Damasco tomaratha ichaxota ena pomonae pejume cowantsiwi Jesucristo.

Meje yabara poxonae Saulo Jesús pejume diwesi paeba Damasco tomaratha

²⁰ Caena nainya Saulo pona judiomonae pia penacaetutsi bontha tatsi. Tsipaeba barapomon-aetha, jeye: “Barapon Jesús, apara Nacom Pexanto

tatsi”, jei. ²¹ Daxita pomonae jume tayena barapomonae yabara najuntũ coyene cabenaeca, nabarai, najei:

—Bara baraponda, pon cain matha Jerusalén tomaratha patopa xua abe peexanaponaenexatsi pomonae Jesucristo pewun ununaewichi poxonae Nacom wãqueibatsi. Aparã bapon pon bayatha xote patope xua peteicaenexatsi pomonae pejume cowuntsiwi xuano xua pecaponaenexatsi pomonaetha pomonae sacerdotemonae pia pentacaponaewi xua Jerusalén tomara beya, najei.

²² Ichitha bapon Saulo awiya jume tsacatsacapiya cueicueijeji. Bapon tsita itapeinya xeina xua Jesús apara Mesías. Daxota barapomonae judiomonae moya umenarũcupa tsipei yabara najuntũ coyene cabenaeca pocotsiwa xua Saulo paeba.

Meje yabara poxonae Saulo panepa judiomonae pecuiyainwa

²³ Poxonae ainya matakabin yapucaewa judiomonae caemonae peburũya nanta xeina xua bepa bexubichei Saulo. ²⁴ Saulo ichun muxu baraichi: “Bepã cabexubei ichamonae”, jei. Saulo ewatumeinchi tomara coibotontha po coiboton xua tomara peyacaincha toxoroto dutsiwa coiboton. Barapo coibotontha Saulo ewatumeinchi daxita matakabi, yawa merawino. ²⁵ Ichitha Saulo merawi panepa poxonae pijimonae pitatsi yawa yacote yorecatsi pepã tomara juma deca xua tomara peyacaincha toxoroto dutsiwa juma deca.

Meje yabara poxonae Saulo Jerusalén tomaratha popona

²⁶ Poxonae Saulo Jerusalén tomaratha patopa bepa bequein barꝰ nacaetutei Jesús pejume cowꝰntsiwichi tatsi, ichitha barapomonae Saulo cunuwatsi tsipei nanta xeina xua Saulo jopa xapain Jesús pejume cowꝰntsiwichi jiwana tatsi.

²⁷ Ichitha Bernabé Saulo cuaranotatsi Jesús pia peitorobi jiwí tatsi peitabaratha tatsi. Bernabé barapomonaetha namchi, jeye: “Pinae bayatha Saulo namtotha tsita naitꝰtatsi Jesús pon jiwí Pecanamataxeinaein. Mataꝰtano pinae Saulo muxu tsipaebatsi. Mataꝰtano pinae tsipaeba Jesús pejume diwesi Damasco tomaratha xua pinae cui tsacatsacapiya cueicueijeí”, jei Bernabé.

²⁸ Daxota Saulo napopona ducuaeta Jerusalén tomaratha ichaxota Jesús pia peitorobi jiwí tatsi. Saulo Jerusalén tomaratha jume tsacatsacapiya cueicueijeí ducuaeta Jesús pejume diwesi tatsi pon jiwí Pecanamataxeinaein. ²⁹ Saulo yabara barꝰ natsipaeba Jesús pejume diwesi, yawa barꝰ najume matsontsonobatsi judiomonae, pomonae xua griego jume penatsipaebiwi. Barapomonae judiomonae, ichichipa xua Saulo pebexubiwatsi.

³⁰ Pomonae irꝰ Jesús pejume cowꝰntsiwi tatsi jume tane, xua bepa Saulo imoxoyo bexubichei judiomonae. Daxota Saulo Cesarea tomara becayiyatsi. Baxota punaxubathopatsi. Equeicha Saulo dabe pu itorobiyatsi Tarso tomara beya.

³¹ Daxita Jesús pejume cowꝰntsi jiwí tatsi jꝰntema jinompa Judea nacuatha, Galilea nacuatharꝰ, Samaria nacuatharꝰ, tsipei jopa ichamonae abe exanaeyo barapomonaetha. Mataꝰtano barapomonae mataropeichiya nacuidubapona xua pejume cowꝰntaponaewa

Nacom. Matautano exanapona pocotsiwa Nacom ichichipa. Nacom pia Pejumope tɛnaxɛ tatsi barapomonaē yaweinchi pejɛntɛ coyeneintha tatsi. Pinmonaē Jesús jume cocowɛntapona.

Meje yabara poxonaē Eneas axaibi exanatsi

³² Poxonaē Pedro siwa pona ducuaeteiba daxita tomaran Jesús pejume cowɛntsi jiwi tatsi, bapoxonaē yawa siwa ponano pomonaē Jesús pejume cowɛntsi jiwi pomonaē ena Lida tomaratha.

³³ Baxota Pedro caxina pon pecuenobinchi xua saya camatha boca. Bayatha caena xeina baxua ocho po weibe. Bapon pewɛn Eneas. ³⁴ Pedro, Eneas baraichi:

—Eneas, Jesucristo caaxaibi exana. Asiya uncuatabare. Jinya cama xaxainta xore, jei Pedro.

Barapoxonaē caena yacuinaya nantacotaxuba Eneas. ³⁵ Nexata Lida tomarapiwi, irɛ Sarón tomarapiwino, barapomonaē Eneas tainchi xua equeicha beta pona. Bapoxonaē barapomonaē nacui barapenta xua copiya jume cowɛnta pejume cowɛntsinexa Jesucristo, pon jiwi Pecana-mataxeinaein.

Meje yabara poxonaē Dorcas equeicha caewa asɛ exanatsi poxonaē tɛpa

³⁶ Irurɛ jame caena bayatha Jope tomaratha porona powa pejume cowɛntsiwayo Jesús. Baropowa pewɛn Tabita. Barapo wɛn seicaya griego jume wɛn “Dorcas” baraichi. Barapowa pocotsiwa wɛnaē itapeta exaneiba nawita. Matautano barapowa yaweneiba pomonaetha pomonaē peacopebiwi. ³⁷ Barapowa caena nainya atene tsanaya. Caena nainya tɛpanaya.

Daxita petupaein matapaeta perua iquicatsi. Bapoxonae po tutu athabeicha baxota boichatsi. ³⁸ Jope tomara Lida tomara imoxoyo nacaquita ecabe. Baxota Pedro popona Lida tomaratha. Baxota Jope tomaratha pomonae Jesús pejume cowantsiwichi tatsi jume tane xua juinya Pedro Lida tomaratha popona. Bapoxonae itoroba pebinbe nacueyatabe xua bepa pinae tawabathopiyaetsi xua Pedro pewabathopiyaenexatsi Lida tomara beya. Baponbe namchibe. Pedro baraichi: “Cawaba pomonae Jesús pejume cowantsiwichi tatsi. Bepa pinae anetha iyaem”, jeibe baponbe.

³⁹ Bara Pedro puna pona baponbetha. Poxonae Pedro patopa Jope tomaratha, barua jjoniyatsi Pedro, ichaxota po tututha boca petupaewa Dorcas. Daxita pecuenta werapaewaxichi piseurixi caquita wecoyei tsumenaetsi Pedro. Yawa barapowaxi Pedro tsita itubatsi doroburu, camisanno xua bayatha Dorcas taxuxuca poxonae cataunxuae abua popona. ⁴⁰ Pedro pesato beitaweya daxita barapomonae. Pedro imoxoyo caquita eca pentabocototha. Nacomtha tsipaeba. Bapoxonae powa tɔpuncua Pedro pexainya benecoya, Pedro barai bapowa, jeye:

—Tabita, asiya uncuatabare, jei Pedro.

Bapoxonae powa tɔpuncua necotaxuba. Poxonae Pedro tainchi, bapoxonae nantacotecataba. ⁴¹ Pedro Dorcas cobe pitatsi. Asiya cuaranotatsi. Bapoxonae Pedro waba pomonae Jesús pia pejume cowantsi jiwi tatsi, iruru powaxi pecuenta werapaewaxichi piseurixi. Barapomonae Pedro tsita ituta xua equeicha Dorcas asu. ⁴² Jope

tomarapiwi jume taerucupa xua equeicha Dorcas petapaewa nacosata. Bapowa equeicha asu popona. Daxota pinmonae jume cowanta Jesús pon jiwi Pecanamataxeinaeinchi. ⁴³ Jope tomaratha Pedro baxota popona ainya maticabin. Pedro popona Simón pia botha tatsi pon xua duwei peboco wnaeteibin.

10

Meje yabara Pedro iru Cornelio

¹ Iruru jame Cesarea tomaratha pebin warapaeya popona. Bapon pewun Cornelio. Cornelio, jame yatsicaya pia nacua tatsi Italia nacua. Bapon soldadomonaie pia pentacaponaein tatsi. Iruru soldadomonaie pia nacua tatsi Italia nacua. ² Cornelio piamonaie baru jume cowanta Nacomtha. Matautano Nacom wnae jaintatsi. Bapon Cornelio matowa yaweneiba judiomonaie, pomonaie peacopeibiwi. Bapon paratixi catsibeiba barapomonaie. Bapon Cornelio tsipaebeiba Nacomtha. ³ Icha mataqueitha, Cornelio mataqueitha quiripitha amachinae.

Cornelio tane Nacom pia matatsunpin tatsi be poxonaie camaita. Matatsunpin patopaeya namchi, jeye: “¡Cornelio!” jei. ⁴ Cornelio junuwiya camaitiya tane matatsunpin. Cornelio jume epa pita, jeye: “Pon jiwi Pecanamataxeinaem, ¿eta xua jinyatsi?” jei Cornelio. Cornelio jume notatsi matatsunpin jeye: “Bayatha Nacom cajume tane poxonaie tsipaebame pexainya beya. Cacui taneno xua yaweneibame peacopeibiwi. Nacom cayabara nanta xeina. ⁵ Cornelio, ichamonaie Jope tomara beitorobiyama pewabinexa tsainchi pon

ainya w_hnbe pexeinaein. Bapon Simón baraichi yawa Pedro baraichi. ⁶ Barapon Simón Pedro eca icha Simón pia botha tatsi pon Simón seicaya pon duwein peboco w_hnaeteibin. Barapon Simón mar mene itapatha yabo uncua”, jeichichi Cornelio matatsunpin.

⁷ Poxonae matatsunpin napitaba, barapoxonae Cornelio ichamonae waba, pomonae xua pia botha petanacuichiwichi. Ir_h soldadomonaepin waba, pon xua pia botha tanacuitatsi. Barapon soldadomonaepin pej_hnt_h coyene xanepanaein Nacomtha. ⁸ Barapomonaetha tsipaebatsi pocotsiwa bayatha Cornelio tsipaebatsi matatsunpin. Cotacaya Cornelio itoroba barapomona Jope tomara beya.

⁹ Icha mataqueitha barapomona warapa Jope tomara beya. Poxonae cataunxuae itiya pona poxonae mateinyaxae, poxonae bara imoxoyo patichaba, bapoxonae ir_hr_h Pedro bo matatupa beecoinyar_h, po bo matatupa pereca. Nacom tsipae-bawiya poxonae bayatha mataeinyaxae tsuxubi.

¹⁰ Pedro bichocono jainpeca, bepa bequein xaei. Ichitha poxonae awiya cataunxuae tasetatsi, Pedro tsita nait_htatsi be poxonae camaita. ¹¹ Pedro athabe necoicha xua peitaboco nayausaranaxuba. Yawa taneno xua pin paparuwa pexainya betaruneicatsi, be xua jiton nantiya carunicabe. ¹² Bapoxonae barapo paparuwatha Pedro tane daxita xua xuan saya pecobetha pona be cawayun. Yawa tane daxita xua xuan saya petaxutha bobenapona be maquib_hn. Yawa tane daxita xua xuan saya petompacuetontha bobenapona be jomon. Mata_htano tane daxita xua xuan saya

yapupuna be peyapupunaewi. ¹³ Nexata Pedro peitabocotha jume tane xua namchi, jeye: “Pedro asiya uncuatabare. Pon xua ichichipame, pire. Moya bexore. Yawa xaema”, jei barapo jume.

¹⁴ Nexata Pedro jume nota, jeye: “Bara, bay-atha apara jopa bapana camatsawan xaeinyo, xua tamonae jopa copatsiyo xua pexaewa”, jei Pedro. ¹⁵ Equeicha Pedro jume tane pejume xua tsipaebatsi, xua jeichichi: “Xua Nacom catsijainya exana, baraxua jopa camatsawa jaintocuaetsi”, jeichichi.

¹⁶ Pedro matha acoibi po jumeyobe tsipae-batsi baxua. Bapoxonae paparuwa caibe juinya peitaboco beicha. ¹⁷ Xua Pedro baraichi Nacom, baxua Pedro yabara nanta xeina nawita: “¿Eta xua metha Nacom yabara nejumichira?” najei. Pomonae Cornelio itoroba, barapomonae i dapo bon yainyainyaba tsiniya: “¿Incane Simón pia bo?” jei. Bapoxonae bapomonae pata Simón pia curara coibototha tatsi. Poxonae barapomonae pata, Pedro cataunxuae yabara nanta xeina xua tsipae-batsi xua Nacom tsipaeba. ¹⁸ Poxonae Cornelio pijimonae tatsi pata baxota, pin jumetha namchi, jeye: “¿Incane Simón pon icha wуn ‘Pedro’ baraichi? ¿Baxota bara ecara?” jei.

¹⁹ Awiya came Pedro baxua yabara nanta xeinequiya xua pocotsiwa bapon tane. Nexata bapoxonae Nacom pia Pejumope τῆναχῆ tatsi Pedro baraichi, jeye: “Pedro, nejume taema. Acoibi poyobe pebiwi cawenawenei tsompae. ²⁰ Nontaponde nainya ira bedunatabareinca. Barapomonae naponde, beitatema napontabare, yaitama barapomonae itoroban”, jeichichi Pedro.

²¹ Bara nexata Pedro ira bedunatabareca. Pedro barai barapomonaē, jeye:

—Apara bara xan, po jiton xua pana newe-nawenei tsonpaem. ¿Eta xua metha papatame? jei.

²² Barapomonaē Pedro jume notatsi, jeye:

—Papatan yaitama Cornelio, pon soldadomonaē pia pentacaponaein tatsi, bapon pana itoroba. Barapon pejuntū coyene xanepanaein. Barapon Nacom jume cowantatsi. Irū daxita judiomonaē barapon barū cui itura jineibatsi yawa antobetsi. Pinae Nacom pia matatsunpin tatsi Cornelio itorobatsi Simón Pedro wabare nejume taenexa tsane jei pinae, jei barapomonaē, xua Pedro tsipaebatsi.

²³ Nexata Pedro waba barapomonaē xua petamaitenaewa tsainchi barapo botha. Icha matabitha piawa xaxainta xua caponaena. Bapoxonaē Pedro napona barapomonaē. Irū ichamonaē naponano, pomonaē irū Jesús pejume cowantsiwi tatsi, pomonaē xua ena Jope tomaratha.

²⁴ Icha matabitha pata Cesarea tomaratha. Baraxota Simón Pedro ewatatsi. Cornelio pia matabūyomonaē pewabixae barū ewateca, yawa pia jiwi tatsino. ²⁵ Poxonaē Pedro Cornelio pia botha tapatopatsi, Cornelio Pedro jacobatsi. Bapoxonaē Cornelio Pedro peitabaratha pentabocototha tauncuatsi, pewūnaē jainchinexa tsainchi Pedro. ²⁶ Ichitha Pedro, Cornelio asiya cuaranotsiya baraichichi, jeye:

—Cornelio, nontaponde. Saya apara xan pebin naexanan icha xam ichim barichin apara, jei Pedro.

²⁷ Poxonae Pedro natsipaebiya jonyiabe, baxota Pedro pin bicheito tane xua nacaetuta. ²⁸ Nexata Pedro barai barapomonae, jeye:

—Bara bayatha payaputaneme xua waxainchi judiomonae jiwichi wacui coyenewa xeinatsi xua jopa nacui yabara copatichi xua wabarũ nacaetuteibiwa pomonae jopa judiomonae naexanaeyo. Matautano jopa nacui yabara copatichi xua pia bonthano waponeibiwa. Ichitha Nacom aunxuae necuiduba xua pinae jopa bewa ichamonae catsapiwi jaintin tsane.

²⁹ Daxota bichoina patopan yaitama pinae pana wabame. ‘Bara’, jopa janyo. Methaunxuae paca yainyabinchi: ¿Eta xua metha pana tsiwabame? jei Pedro.

³⁰ Nexata Cornelio, Pedro jume notatsi, jeye:

—Petain cuatro po matabibe tsuxubi, quiripitha xote tabohta poxonae yabara nainbotan xua Nacom tsipaeban barapoxonae matatsunpin jemeicha tabohta patopa. Barapo matatsunpin paparuwa nama xatata po paparuwa bichocono daedaena. ³¹ Matatsunpin nebarai: ‘Cornelio, bayatha Nacom cajume tane poxonae tsipaebame pexainya beya. Cacui taneno xua yaweneibame peacopeibiwi daxota Nacom cayabara nanta xaina’, jei.

³² Nebaraino: ‘Ichamonae Jope tomara be itorobiyama, pewabinexa tsainchi pon ainya wũnbe pexeinaein. Bapon Simón baraichi, yawa Pedro baraichi. Pedro eca ichũn Simón pia botha tatsi, pon Simón pon seicaya duwein peboco wũnaeteibin. Barapon Simón mar mene itapatha yabo uncua’, nejei. ³³ Daxota nainya

itoroban ichunbe acoibi poyobe yaitama apara cawabatsi. Barabun patopame. Daxita paxan xote Nacom peitabaratha pajinompan. Matautano paca ewatatsino tsipei yaitama tha paca jume taetsi xua Nacom, pon Pecanamataxeinaein, cana cajume itoroba, jei Cornelio.

Meje yabara poxonae Pedro pin diwesi paeba Cornelio pia botha tatsi

³⁴ Pedro barapomonaetha namchi, jeye:

—Anoxuae yaputan xua Nacom jopa cana exanaeyo jiwi xua ichun ainya cui xua beyacaincha ichun. Nacom daxita jiwi tsita najupatsi. ³⁵ Daxita nacuantha pomonaе xua Nacom wunaе jaintatsi xuano xanepanaya exanano, Nacom antobe barapomonaе. ³⁶ Bayatha payaputaneme xua Nacom Pejume Diwesi nacariwesi itoroba paxantha pomonaе Israel pia pemomoxi susato jiwi tatsi panxaein. Barapo pexeinya diwesi jume juntema jinompa pana exana poxonaе Jesucristo pajume cowuntan. Nacom Jesús Pecanamataxeinaein exanatsi daxita carepaya jiwi nexa. ³⁷ Paxam bara payaputaneme xua Juan Jesús yabara cueicueijeichi yawa bautisaba jiwi Galilea nacuatha. Bapoxonaе irun Jesucristo tamropata pitaba xua cueicueijeі Galilea nacuatha yawa daxita Judea nacuatha. ³⁸ Matautano bara payaputanemeno xua Nacom cata pia peayapusu itorobi coyenewa, Jesucristo Nazaret tomarapin catatsi. Yawano Jesucristo nacana jumope tunaxu catatsi. Bapoxonaе Jesús daxita carepaya tomarantha popona ducuaeta. Yawa axaibi

exana ducuaetaano peatene jiwi. Yawa taitaweta ducuaetaano pomonae xua cauri pexeinaewi. Daxota bapon baxua beta exana Nacom pebaru poponaexae. ³⁹ Bayatha pacui tan daxita carepaya xua Jesús exana Judea nacuatha, Jerusalén tomarathano ichaxota jinompa judiomonae. Bapoxonae nama Jesús naetotha cobe matatabarutatsi, xua poxonae tupa exanadutatsi naetotha. ⁴⁰ Poxonae acoibi po matababibe tsuxubi Nacom petupaein equeicha asu exana. Matautano bapon pana netsita naitata exana. ⁴¹ Ichitha daxita jiwi jopa tsita naitata exanaetsi. Saya paxan pana netsita naitata exana. Nacom pana itapeta pia patayopichinexa ichamonaetha pocotsiwa Jesús exana xuano xua paebano. Paxan Jesús pabarū nabanān, matautano pabarū apanno poxonae equeicha asu popona. ⁴² Jesús pana itoroba daxita nacuantha pata paebinexa tsane Nacom Pejume Diwesi, xuano bapon pejume diwesino. Nacom cana exana, Jesucristo cana exanatsi be pon jiwi peyabara paebin penatsicuentsiwa xua abe peexanaexae. Bexa tsane Jesús daxita jiwi nanantaatsiya jiwana torotsiya itawetsina, pomonae cataunxuae jinompa yawa pomonae bayatha werapano. ⁴³ Bayatha pomonae Nacom pia peitorobi jume pepaebiwi Jesús pejume diwesi paeba. Barapomonae namchi: 'Daxita pomonae Jesús pejume cowantsiwichi barapomonae Nacom yabara jantemainaena abe pia peexanae cuiru coyenein tatsi Nacom pia peayapusuwathaxae', jei barapomonae, jei Pedro.

Meje yabara poxonae pomonaе jopa judiomonaе naexanaeyo peꝓntꝓ coyeneintha tapatatsi Nacom pia Pejumope tꝓnaxꝓ tatsi

⁴⁴ Poxonae cataunxuae Pedro cueicueije, baroxonaе Nacom pia Pejumope tꝓnaxꝓ tatsi tapatatsi pomonaе jume tane xua Pedro paeba.

⁴⁵ Judiomonaе, Jope tomarapiwi, pomonaе peꝓume cowꝓntsixae Jesucristo, barapomonaе Pedro puna poinchi. Barapomonaе daxita yabara najꝓntꝓ coyene cabenaeca xua irꝓ barapomonaе pomonaе jopa judiomonaе naexanaeyo irꝓ peꝓntꝓ coyeneintha taenatsi Nacom pia Pejumope tꝓnaxꝓ tatsi. ⁴⁶ Judiomonaе yaputane xua bara xaniwaicha Nacom pia Pejumope tꝓnaxꝓ tatsi tapatatsi pomonaе jopa judiomonaе naexanaeyo. Yaputane tsipei barapomonaе barompaya tsanaya icha jumeintha cueicueije. Ichitha barapomonaе jopa xapain najume copi yaputaeyo. Judiomonaе jume taneno xua pomonaе jopa judiomonaе naexanaeyo Nacom wꝓnae jaintatsi. ⁴⁷ Pedro namchi, jeye:

—Barapomonaе apara Nacom pia Pejumope tꝓnaxꝓ tatsi xeina icha waxainchi ichichi. Jiton dapon aibi pon jeye: ‘Jopa bewa bautisabi, apara pomonaе jopa judiomonaе naexanaeyo’, xua pon pejeiwa, jei Pedro.

⁴⁸ Pedro cui itoroba judiomonaе. Pedro namchi, jeye: “Pabautisabare barapomonaе pomonaе jopa judiomonaе naexanaeyo. Jesucristo pewꝓn pawꝓn taibare poxonaе pabautisabame”, jei Pedro. Baroxonaе pirapae barapomonaе, pomonaе xua aena taenatsi Nacom pia Pejumope tꝓnaxꝓ

tatsi, Pedro apusiwatsi xua jopa warapae tsane yawa xua caeto abun ecaenano.

11

Meje yabara poxonae Pedro diwesi tsipaeba pomonaetha pomonae Jesús pejume cowantsi jiwi Jerusalén tomaratha

¹ Jesús pia peitorobi jiwi tatsi irun pomonae pejume cowantsiwi Jesús, pomonae ena Judea nacuatha, barapomonae daxita jume tane xua irun pinae pomonae jopa judiomonae naexanaeyo bayatha jume cowanta Nacom Pejume Diwesi. ² Poxonae Pedro Jerusalén tomara bewarapiya, judiomonae pomonae xua jume cowanta xua ainya cui Jesús pejume cowantsi jiwi tatsi pewi thabiwa tsainchi, barapomonae Pedro jume daunweya tsipaebatsi. ³ Pedro baraichi, jeye:

—¿Eta xua metha barapomonae siwa poname pomonae jopa judiomonae naexanaeyo? ¿Eta xua metha naxaneme barapomonaetha? jei judiomonae.

⁴ Nexata Pedro diwesi eetapona xua cueicueije barapomonaetha. Po diwesin eetapona, barapo diwesin xua poxonae siwa pona pomonae jopa judiomonae naexanaeyo. Pedro namchi:

⁵ —Poxonae Jope tomaratha Nacom tsipaeban, pin paparawa tan be poxonae camaitan. Barapo paparawa peitaboco weruneica be pematontha nantiya yacaincha opi queraba. Taxainya duneica. ⁶ Barapo paparuwatha tan xua bobena. Baraxuan tan xua saya pecobetha pona be cawayun. Baraxuanno tan xua saya petaxutha bobenapona be maquibun. Baraxuanno tan

xua saya petompacuetontha bobenapona be jomon. Baraxuanno tan xua saya yapupuna be peyapupunaewi. ⁷ Peitabocotha jume tan xua nebarai: ‘Pedro asiya uncuatabare. Pon xua ichichipame, pire. Moya bexore. Yawa xaema’, nejei. ⁸ Jume notan nexata: ‘Bara, bayatha apara jopa bapana camatsawan xaeinyo xua tamonae jopa copatsiyo xua pexaewa’, jan. ⁹ Equeicha peitaboco wenebaraichica: ‘Xua Nacom catsijainya exana, baxua jopa camatsawa jaintocuaetsi’, nejei. ¹⁰ Acoibi po jumeyobe nebarai. Saya ɯ barapo jumethabe nebarai. Bapoxonae paparuwa equeicha peitaboco beicha caibe caicha. ¹¹ Paparuwa caibe juinya, irɯɯ pebiwi acoibi poyobe patarɯ. Bapoyobe Cesarea tomarapiwi, taxantha pata. Barapo acoibi poyobe, pomonae Cornelio itoroba. ¹² Nacom pia Pejumope tɯnaxɯ tatsi nebarai: ‘Napuna ponde. Beitatema pontabare’, nejei. Irɯ nebarɯ pona seis poyobe Cesarea tomara beya pomonae pejume cowantsiwi Jesús. Pajojoniyan Cornelio pia botha tatsi. ¹³ Cornelio pana netsipaeba xua pinae pia botha tapatopatsi matatsunpin. Matatsunpin namchei: ‘Pebiwi Jope tomara beitorobiyama, pewabinexa tsainchi pon xua ainya wɯnbe xeina, Simón yawa Pedro. ¹⁴ Barapon Simón Pedro paca tsipaebina Jesús pejume diwesi, paca necayawa capanenebiyaenexa tsane Nacom’, jei pinae matatsunpin poxonae pinae Cornelio tsipaebatsi, jei Pedro barapomonaetha. ¹⁵ Pedro equeicha namchi:

—Poxonae Jesucristo pejume diwesi paebaxoyan Corneliobarɯtha, barapoxonae Nacom pia

Pejumope tɯnaxɯ tatsi tapatatsi barapomonaē. Icha cain painta ichi, barichi pomonaētha Nacom nacana jumope catsiba. ¹⁶ Baroxonaē nantana pitaban Jesús pejume, poxonaē pana barai: ‘Juan saya ɯ meratha bautisaba. Ichitha Nacom seicaya barompaya pia cuitha paca bautisaba. Ichitha Nacom seicaya barompaya pia cuitha paca bautisabina. Baroxonaē painya jɯntɯ coyeneintha pacata patsina Nacom pia Pejumope tɯnaxɯ tatsi’, jei Jesús. ¹⁷ Xaniwaicha beta yaputan xua Nacom nacana jumope tɯnaxɯ cata barapomonaētha pomonaē jopa judiomonaē naexanaeyo, icha cain ichi poxonaē Nacom nacana jumope tɯnaxɯ cata pata xantha poxonaē Jesucristo pajume cowɯntan. Daxota Nacom jopa cui yancatabinyo poxonaē ichichipa exana barapomonaētha, jei Pedro.

¹⁸ Poxonaē Jesucristo pejume cowɯntsi jiwi, pomonaē ena Jerusalén tomaratha, poxonaē baxua jume taerɯcɯpa moya umenarɯcɯpa. Mataɯtano Nacom wɯnaē jaintatsino. Barapomonaē namchi, jeye:

—¡Maisa wɯnaē, irɯ Nacom nacana cui cata pomonaētha pomonaē jopa judiomonaē naexanaeyo xua barapomonaē pejume cowɯntsiwa tsanerɯ Jesús, yawa xua jɯntema pejinompraewa tsanerɯ! Baraxua Nacom ichichipa xua barapomonaē najɯntɯ cui coyene barapenta xua abe, petaxeinaenexa tsainchi peajɯntɯyarusɯwa, po peajɯntɯyarusɯwa xua jopa weraweracaeyo, jei barapomonaē.

Mejeyabara poxonaē Jesús pejume cowɯntsi jiwi

tatsi jinompa Antioquía tomaratha

¹⁹ Jesucristo pia pejume cowantsi jiwi tatsi ducupa, tsipei peanaepanaewi yotaba, poxonae po matabitha Esteban bexotsi. Barapomonaе tsanarucupa, ichun Fenicia nacua beya, ichun Chipre nacua tunaeto beya, ichun Antioquía tomara beya. Barapomonaе saya judiomonaetha cueicueijeі Jesucristo pejume diwesi.

²⁰ Ichamonaе, pomonaе pejume cowantsiwi Jesús, Chipre nacua tunaetopiwi, Cirene tomarapiwino, barapomonaе Antioquía tomaratha pata. Daxita barapomonaе tsipaeba pomonaetha pomonaе jopa judiomonaе naexanaeyo Jesús pejume diwesi tatsi pon jiwi pia Pecanamataxeinaeinchi. ²¹ Barapomonaе yawenatsi nawita Nacom pia peayapusuwa tatsi. Daxota pin bicheito pomonaе jopa judiomonaе naexanaeyo, barapomonaе jume cowantatsi Jesús, pon jiwi Pecanamataxeinaeinchi.

²² Jerusalén tomaratha, Jesucristo pejume cowantsi jiwi tatsi, barapomonaе, jume tane xua Antioquía tomarapiwi jume cowanta Jesucristo pomonaе jopa judiomonaе naexanaeyo. Daxota Bernabé Antioquía tomara beitorobiyatsi.

²³ Poxonaе Bernabé Antioquía tomaratha patopa be ita cui wunaetsi xua Nacom yawena barapomonaetha. Bapoxonaе Bernabé juntu coyene weiweina. Bernabé barapomonaе barai, jeye: “Paajuntucoyeneyapusuya jinompare Nacomtha. Matautano Nacom ajuntuyapusuya pajume cowantaponde”, jeі Bernabé. ²⁴ Bernabé pejuntu coyene xanepanaein. Bapon juntu coyene yucatsi Nacom pia Pejumope tuxaxu tatsi tsipei

daxita i daxuan exana pocotsiwa Nacom itoroba. Matautano bichocono Nacom jume cowantatsi. Daxota pin bicheito jume cowanta Jesús, pon jiwi Pecanamataxeinaeinchi.

²⁵ Nexata Bernabé Tarso tomara bewarapiya, pewenaweneinexatsi Saulo. ²⁶ Poxonae Saulo caxinatsi baxota, Antioquía tomara bebaru warapiyatsi Saulo. Baraponbe cae wei naecabe baxota, cuidubabe pin bicheito xua Jesús pejume diwesi. Baraxota jiwi matha Jesús pijimonae tatsi wan dutatsi xua Antioquía tomarapiwi wan duta xua jeye: “Cristobarumonae”, jeichichi barapomonae pomonae Jesús pijimonae tatsi.

²⁷ Poxonae Bernabé iru Saulo cataunxuae cuidubapoponabe Antioquía tomaratha, Nacom pia peitorobi jume pepaebiwi baxota pata, Jerusalén tomara werendena. ²⁸ Bara caein jiwana pewan Agabo. Agabo asiya uncua barapomonaetha. Bapon wuna tsiwanaya paeba. Agabo yaputane exanatsi Nacom pia Pejumope tuxu tatsi. Agabo namchi, jeye: “Bexa tsane daxita carepaya nacuantha jainbo tsane”, jei Agabo. Baraxua xainyei poxonae jumba matha Claudio romanomonae itorobiya pia pepa peewatsinchi tatsi naexana, baroxonae pin jainbo tsurucuae. ²⁹ Daxota Jesús pejume cowantsiwi tatsi, pomonae ena Antioquía tomaratha, ichipa yawena pomonae iru pejume cowantsiwixae Jesús pomonae peenaexae Judea nacuatha. Daxota barapomonae pomonae Jesús pejume cowantsiwixae peburuya nanta xeina xua paratixi taitorobina. Daxita barapomonae carepaya paratixi cata be xua po coyene cobe

itacɔpatsi xua pecatsiwa. ³⁰ Barapomonae baxua exana. Barapo paratixi Bernabé irɥ Saulo caitorobatsibe pitiri jiwi nexa xua Judea nacua beya.

12

Meje yabara poxonae Santiago bexotsi irɥ xua poxonae Pedro jiwi pecɔbi botha capoinchi

¹ Barapoxonae Herodes pon Judea nacuapiwi peyanacua ewatsinchi, bapon tamropata pitaba xua pomonae Jesús pejume cowɥntsiwi tatsi peraxa exanatsi. ² Herodes itoroba pia jiwi, xua pin cusitha Santiago pebexubiwatsi, pon Juan peweicho tatsi. ³ Herodes jume tane xua judiomonae tsita xanepanatsi xua Santiago bexotsi. Daxota Herodes cui itoroba piamonae xua Pedro pewaetabiwatsi xua pecaponaenexatsi jiwi pecɔbi botha. Baxua exana poxonae Pascua wɥn maticabintha poxonae jiwi pan xane po pan xua jopa xeinaeyo levadura xua pocotsiwa cowa exana. ⁴ Poxonae Pedro jiwi pecɔbi botha eca, soldadomonae yapucaumena, Pedro yapucaumeinchi. Soldadomonae, cuatro po bicheito matabɥɥyobe. Cae matabɥɥyobe xeina be cuatro poyobe. Be cae matabɥɥyobe tamroropatapona poxonae yacaincha umeneibatsi Pedro. Herodes yabara nanta xeina xua peexanaewa tsane xua Pedro pin bicheito peitabaratha cuaranotinchi pepa tomaratha poxonae Pascua wɥn maticabin yapu caewina. ⁵ Awiya came Pedro jiwi pecɔbi botha eca. Ichitha Jesús pejume cowɥntsiwichi jume daunweya wɥca Nacom, Pedro tawɥcatsi.

Meje yabara poxonae Nacom, Pedro capanepatsi jiwi pecubi bo weya

⁶ Herodes merawi nanta xeina xua baya tsane Pedro cuaranotinchi pepa bicheittha peitabaratha. Barapo merawitha, abũ cataunxuae Pedro nantiya cobe nain camaituncuatsibe soldadomonaepinbe. Irũ soldadomonaepinbe yacaincha uncuabe jiwi pecubi bo boupa. ⁷ Caena nainya Jesús pia matatsunpin tatsi Pedro tsita naitutatsi. Jiwi pecubi botha pin coicha pentha tsuxubi bichocono. Matatsunpin Pedro yaubaxotsi. Nexata Pedro nacosataxuba. Matatsunpin namchi, jeye: “Pedro, nanainya nonta ponde”, jei matatsunpin. Bapoxonae Pedro nantiya cobe nain jopeicabe iratha. ⁸ Bapoxonae matatsunpin Pedro baraichi, jeye: “Coreinya bocoto bichocono nacoto epa catutabare. Nainya nataxu xatare jinya nenataxu xatatsiwa”, jei. Baraxua Pedro exana. Equeicha matatsunpin namchi, jeye: “Pire jinya camisa po paparuwa xua nainya weruyame. Antha nepuna ponde”, jei matatsunpin.

⁹ Nexata matatsunpin Pedro pecoiboto bepuna joniya, pesato beya. Ichitha Pedro xapain jopa naita cui coyene taeyo xua jiwi pecubi bo wepuna joniya matatsunpin. Saya nanta xeina be amachinae. ¹⁰ Pedro irũ matatsunpin xenta jonyabe soldadomonaepin pon yacaincha uncuacha ichaxota Pedro etatsi. Bapoxonae equeicha icha soldadomonaepin xenta jonyabe pon ewatuncua pepa boupa xua pesattha. Pedro irũ matatsunpin peboupa penainwa xua peyacaincha dutsiwa bara wejonyabe tomara beya. Barapo boupa

jemeicha nacoibo yausaranaxuba. Pedro matatsunpinno namtotha ponabe. Poxonae icha namtotha patopabe bapoxonae jemeicha matatsunpin Pedro cuenta aichurucuaetsi tomara namtotha.

¹¹ Barapoxonae Pedro xaniwaicha naita cui coyene tane. Bapon nabarai, jeye: “Bara yatsicaya xainyei Jesús pia matatsunpin inta itoroba tsipei metha bepa necapanepae Herodes pia xainya weya tatsi xuano xua judiomonae pia xainya weya tatsi, pomonae ichichipa abe inta peexanaewa”, najei.

¹² Poxonae baxua nacui cananta xeina, Pedro pona María pia bo tatsi beya. Bapowa Juan pena tatsi. Juan icha wɛn xeina, Marcos. María pia botha tatsi pin bicheito nacaetuta pewɛqueibinexa Nacomtha. Baxota Pedro patopa. ¹³ Pedro curara coiboto dadacata. Yabɛyo powa pewɛn Rode muxu naya pia yaputaetsi pon patopa. ¹⁴ Poxonae barapowa Pedro jume copi tainchi xua wawai abɛ jopa saranaxubiyo peboupa. Bapowa bichocono jɛntɛ coyene weiweina daxota caibe cuinaya piamonae tsiwɛn caya. Namchi:

—Pedro curara coibototha uncua, jei Rode.

¹⁵ Barapomonae namchi, jeye:

—¡Apara camatayaiba! jei.

Equeicha bapowa jume nota, jeye:

—¡Babara xainyan, Pedro bapon yatsicaya! jei.

Equeicha barapomonae jume nota, jeye:

—Metha apara Pedro pia matatsunpin tatsi, pon yantatsi, jei.

¹⁶ Awiya came Pedro peboupa dacadacatuncua. Poxonae barapomonae peboupa saranaxoya, Pedro yabara najantꞥ coyene benaecaeya tainchi.

¹⁷ Pedro pecobetha moya jume matawenta. Cotacaya Pedro diwesi tsipaeba barapomonae xua bayatha capanepatsi jiwi pecabi bo weya, xua Jesús capanepa pon jiwi Pecanamataxeinaeinxae tatsi. Pedro namchi, jeye:

—Barapo diwesi Santiago patsipaebare irꞥ ichamonae patsipaebare pomonae Jesús pejume cowantsiwi tatsi, jei Pedro.

Barapoxonae Pedro icha namto be-iya.

¹⁸ Poxonae baya penta tsina soldadomonae nabenaenompa tsipei jopa yabara yaputaeyo po coyene xua Pedro aichurucuae. ¹⁹ Herodes soldadomonae itorobatsi xua jeitatsi Pedro. Ichitha jopa Pedro taebichi. Daxota Herodes cana exana xua barapo soldadomonae natsiaenae cuenta pepanepaxae Pedro. Barapoxonae Herodes icha soldadomonae cui itorobatsi xua barapo soldadomonae jutebinchi. Barapoxonae Herodes Judea nacua wewarapiya, Cesarea tomaratha peponaenexa.

Meje yabara poxonae Herodes tꞥpa

²⁰ Herodes pon Judea nacuapiwi peyanacua ewatsinchi, bapon Tiro tomarapiwi casebatsi irꞥ Sidón tomarapiwino casebatsi. Bequein bayatha copiya Herodes itoroba pexaewa barapo tomarabe nexa ichitha anoxuae jopa daichiyo poxoru Herodes caseba barapo tomarapiwibe. Daxota Sidón tomarapiwi irꞥ Tiro tomarapiwino itoroba pebiwi pesiwa ponaenexa tsainchi Blasto

pon peainya cui jiton xua Herodes pon tanacui-tatsi. Barapomonaē ichichipa xua Herodes xaniwaicha caewa be piamonaē exana, daxota barapomonaē Blasto tsipaebatsi xua barapomonaē peyabara jume yawenaenexatsi xua poxonaē petsipaēbinexatsi Herodes. ²¹ Daxota Herodes w_hn duta, barapo matabi, po matabitha xua Herodes siwa ponaeinchi barapomonaē. Poxonaē matabi tsuxubiba barapo matabitha Herodes pia paparuwa nama xatataba po paparuwa tso-bia, pocotsi paparuwan nama xataba pentacaponawē. Bapoxonaē pia peecaewatha eca. Herodes piamonaetha tsipaeba. ²² Nexata barapomonaē wawai Herodes baraichi, jeye: “¡Apara xua bapon paeba, jopa be pebinyo, apara bara nacom tsecae!” jei barapomonaē. ²³ Bara caena bapoxonaē Nacom pia matatsunpin tatsi Herodes iratha xotsi. Iratha xotsi yaitama bapon jopa Nacom bar_u cui itura jinaetsi poxonaē pia coya Nacom naexana. Oro _un_u caewita poinchi. Jana caewita poinchino. Tsapita poinchino. Herodes t_up_uanaicha.

²⁴ Pomonaē xua jume cow_unta Jesús, barapomonaē taj_u tsipaebapona Nacom Pejume Diwesi daxita nacuantha. Daxota daxita pinmonaē jume cow_untatsi Jesús.

²⁵ Poxonaē Bernabé Saulono nacui wetabe baxua, Jerusalén tomara wewarapiyabe. Antioquía tomara bewarapiyabe. Juan Marcos bar_u warapatsi.

13

Meje yabara poxonaē Bernabé Saulono Nacom

Pejume Diwesi caponabe

¹ Baraxota Antioquía tomaratha jiwana jinompa pomonae pejume cowantsiwi Nacom pomonae Nacom pia peitorobi jume pepaebiwi iru pomonae jiwi pecuidubiwi Moisés pia peitorobi coyene. Barapomonae meje: Bernabé iru Simón pon icha wunno, Negro baraichi, iru Lucio Cirene tomarapin ecaru. Iru Saulo ecaru. Iru Manaén ecaru, pon Herodes bayatha caepinbe naexanabe xua nacuara wichaba ponabe. Herodes Galilea nacuapiwi peyanacua ewatsinchi naexana. ² Caentacabi, poxonae barapomonae Nacom pejume coyene canatsipaeba exana, yawa yabara nainbota, barapoxonae Nacom pia Pejumope tunaxu tatsi barapomonae tsipaebatsi, jeye: “Paitorobare Bernabé, Saulono, petsipaebinexa tsanebe Nacom pia pexeinya jume diwesi tatsi po penacuichiwa baponbe bayatha tsiwabanbe”, jei Nacom pia Pejumope tunaxu tatsi.

³ Nexata poxonae xua Nacom wuca najume weta, xuano poxonae weta xua yabara nainbota, barapoxonae Bernabé Saulono pecobetha mataboco jayabatsibe. Bapoxonae napeyabatsibe.

Meje yabara poxonae Nacom pia peitorobi jiwi tatsi, Nacom pia diwesi tatsi cueicuejei Chipre tunaetotha

⁴ Bapoxonae Bernabé Saulonuru itorobatsibe Nacom pia Pejumope tunaxu tatsi. Seleucia tomara bewarapiyabe. Bapoxonae ponabe jeratha po naetha po nae pin nae, petunaeto beya. Barapo tunaeto pewun Chipre. ⁵ Poxonae patopa

Salamina tomaratha, Nacom pia pexeinya diwesi tatsi cueicueijeji judiomonae pia penacaetutsi bontha tatsi. Juan Marcos bichi napona Bernabé Saulono peyawenaenexatsi.

⁶ Barapoyobe daxita barapo tunaeto matawacaicha enapona petsipaebinexa Nacom pia pexeinya jume diwesi tatsi. Bapoxonae Pafos tomaratha pata. Barapo tomaratha bapoyobe caxinabe judiomonaepin pon pewun Barjesús. Bapon Barjesús mara pexeinaein, pon saya naeraba paeba. Bapon Barjesús namchi, jeye: “Xan tacueicueijein Nacom nexa”, jei. ⁷ Barapon napuna poneiba pontha pon Chipre tunaetopiwi peyatunaeto ewatsinchi ponxae pewun Sergio Paulo. Bapon Sergio Paulo peyaputaein. Bernabé Saulono wabatsibe pia jume taetsibe xua Nacom Pejume Diwesi tatsi pepaebiwa. ⁸ Barapon pon mara pexeinaein icha wun xeina, griego jume, “Elimas”, baraichi. Bapon Bernabé Saulono jume yancatabatsibe, tsipei jopa ichipaeyo xua Sergio Paulo jume cowantsina Nacom Pejume Diwesi. ⁹ Nexata Saulo, pon icha wunxae Pablo, Nacom pia Pejumope tñaxñ tatsi jñntñ coyene yñcatsi. Pablo bichocono pexainya beya tane. ¹⁰ Pablo barai, jeye:

—¡Barjesús, xam pon jiwi nemuxitorobeibin, abe neexanaein, cauri pexantom, daxita xua pewunaewan neaichaxaibim! ¿Eta xua daichim jiwi cui yancababeibame xua pejume cowanteibiwa Jesús, pon jiwi Pecanamataxeinaeinchi? ¹¹ Bara anoxuae Nacomtha natsiaenae cuentsiname. Daxota caitacuere piontababa. Jopa caeto pesato

taem tsane, beya poxonaē matapainya Nacom copatsina xua netaewa tsane, jei Pablo.

Bapoxonaē Elimas nainya itata quirei. Bapon ichawa beya ichan nacobena jayaba, pecobe caponaenexatsi peitata nacutsinxae. ¹² Poxonaē Sergio Paulo baxua tane bapoxonaē bapon Nacom jume cowuntatsi tsipei tsita wunaetsi pocotsiwa Pablo Bernabeno yabara cuidubabe Nacom pon jiwi Pecanamataxeinaeinchi.

Meje yabara poxonaē Bernabé Pablono Antioquía tomaratha ecabe xua Pisidia nacuatha

¹³ Pablo iru pijimonae tatsino Pafos tomara wewarapiya. Perge tomara be-iyiya jeratha, po nae pin nae. Perge tomaratha pata, Panfilia nacuatha. Barapo nacuatha daxita barapomonaē Juan Marcos wu pona. Barapoxonaē Jerusalén tomara bewarapiya. ¹⁴ Nexata Pablo iru pijimonae tatsi Antioquía tomara be-iyiya. Barapo tomara Pisidia nacia nacacuita ecabe. Barapo matabitha, po matabitha pentaquei seicae matabitha, judiomonaē pia penacaetutsi botha tatsi pata, yawa enoundeca. ¹⁵ Baraxota ichan yoroba Moisés pia peitorobi coyene diwesi tatsi. Yawa yoroba xua Nacom peitorobi jume pepaebiwi paeba. Bapoxonaē poxonaē najume weta pentacaponaewi, pomonaē peyabara umenaewi penacaetutsi bo, barapomonaē Pablo wabatsi iru piamonaē tatsi wabatsi. Barapomonaē jeye:

—Pata tajiwimonaem, icha paxei name diwesi, po diwesi xua barapomonaē pejuntu coyene tsacabiwatsi xua junte ma pejinompaewa nexa

barapomonae pomonae xote ene, bara moya papaebare barapo diwesi, jei barapomonae.

¹⁶ Nexata Pablo asiya uncua. Pecobetha jume matawenta xua moya peenaenexa. Pablo barai, jeye:

—Incane pajume taema, israelmonae pam, ir_u paxamno pomonae Nacom abe paca necaexanaeyainwa pam xua icha abe paexaname, pomonae judiomonae jopa naexanaeyo pam. ¹⁷ Wamo susato jiwi, pomonae Israel piamonae, barapomonae Nacom cana exana xua barapomonae nayoyotapona beya xua pin bicheito naexanapona, poxonae cataunxuae Egipto nacuatha jinompa. Nacom itapeta waba barapomonae, xua petanaexanaenexatsi pijimonae jiwana tatsi. Daxota Nacom pia peayapus_w watha wamo jiwi capanepatsi Egipto nacua weya. ¹⁸ Wamo jiwi ira xuepana susato tsurucuae nacua beya warapa cuarenta po weibe. Nacom yaweneiba barapomonae bequein barapomonae abe exaneiba cuarenta po weibe. ¹⁹ Wamo susato jiwi tsimax_u dubatsi Nacom poxonae jutebatsi Canaán nacuamonae. Nacom caewitaxuba Canaán nacuamonae siete po bicheito matab_ux_uyobe. Wamo susato jiwi barapo ira xuya catatsi, Nacom cata. ²⁰ Daxita baraxua Nacom exana barapomonaetha cuatrocientos cincuenta po weibetha.

“Bapoxonae Nacom jiwana cana exana pomonae jiwi peyabara paebiwichi xua penatsicuentsiwa xua abe peexanaexae pentacainompaenexa tsane barapomonae. Nacom baxua exana beya poxonae pon pew_n

Samuel popona pon Nacom pia peitorobi jume pepaebin. ²¹ Nexata israelmonae Nacomtha wuca pon be yatsicaya barapomonaе barompaya itorobiya pia pepa peewatsinchi tatsi tsane. Daxota Nacom taexana barapomonaetha pon pewun Saúl, Cis pexanto tatsi, pon Benjamín pia pemomoxi susato jiwana tatsi. Bapon Saúl, pon jiwi itorobiya pia pepa peewatsin naexana cuarenta po weiyobe. ²² Bapoxonae Saúl cui matawentatsi Nacom abe peexanaexae. Equeicha exana ichun pon jiwi itorobiya pia pepa peewatsinchi, pon pewun David. Nacom yabara jume jei David: ‘David tan, pon Isaí pexanto. David netsita juntu coyene xanepana yawa wunaе exanano. David itapeta exanaena daxita pocotsiwa ichichipan’, jei Nacom. ²³ David pia pemomo susato jiwana tatsi, bapon pewun Jesús. Jopa cain bayatha Nacom Pejume Diwesi paebi penamchixae Jesús capanepa Israel nacuamonae. Baraxua caena bayatha Nacom yabara tsiwunaе muxu duta. ²⁴ Pewunaeya poxonae Jesús tamropata pitabina xua pecuidubiwa Nacom nexa copiya matha Juan daxita Israel nacuapiwi tsipaeba xua pinae bewa nacui barapentsina abe peexanae cuiru coyenein xua Nacom petsita xeinaenexatsi icha juntu coyenein, xuano xua bewa pinae nabautisabina. ²⁵ Poxonae Juan bara imoxoyo tupa, jeye: ‘¡Jopa daponyo xan, pon xua payabara nanta xeiname, pon Mesías baraichi. Cotacaya ichun patopaena xua pon nepuna patopaena. Pocotsiwa bapon exana bichocono ainya cui beyacaincha pocotsiwa exanan. Bichocono pin ura tsita xeinan xua

daxota bewa jopa tataxu m_u isanaxubiwa tsane pia penataxu xatatsiwa tatsi', jei Juan", jei Pablo.

²⁶ Equeicha Pablo jeye: "Tamonaē pam, Abraham pia pemomoxi susato jiwi tatsi pamxaem, iruru pomonaē Nacom abe paca necaexanaeyainwa pam xua icha abe paexaname. Nacom pacata itoroba barapo pecapanenebiyae diwesi jume po diwesi Juan yabara paeba. ²⁷ Barapomonaē pomonaē Jerusalén tomaratha jinompa iru pia pentacaponawewi tatsi jopa Jesús yaitaetsi po coyene xua bapon apara Mesías. Matautano barapomonaē jopa yaputaeyo xua bayatha Nacom peitorobi jume pepaebiwi yabara w_unaē tsiwanaya paeba xua bexa Jesús cana exanaeinchi. Pentaquei seicaē matakabitha poxonaē ichamonaē yoroba po diwesi xua Nacom pia peitorobi jume pepaebiwi tina, judiomonaē pia penacaetutsi botha tatsi barapomonaē jopa yabara yaputaeyo barapo diwesi. Poxonaē Jesús naetotha t_uparucua exanatsi, barapomonaē nanta j_upiya exana Jesustha icha be pocotsi coyeneya bayatha Nacom pia peitorobi jume pepaebiwi paeba. ²⁸ Barapo judiomonaē jopa xeinaeyo po coyeneya xua Jesús pebexubiwa tsainchi. Bequein Jesús jopa abe exanaeyo ichitha barapomonaē Pilato w_ucatsi xua Pilato itorobina soldadomonaē xua Jesús pebexubiwa tsainchi. ²⁹ Barapomonaē exana daxita po coyene bayatha xua Jesús yabara w_unaē tsiwanaya paebatsi Nacom Pejume Diwesitha. Barapoxonaē Jesús pijimonaē pet_upaēin naeto wepichicatsi. Pijimonaē m_uth_utha xotsi pet_upaēin pitapatororo

m̄th̄tha. ³⁰ Ichitha Nacom, Jesús equeicha caewa as̄ exanatsi pet̄paē cuiru coyene weya. ³¹ Matha cain Jesús puna jinompeibatsi ichamonae poxonae Galilea nacuatha popona, Jerusalén tomarathano. Barapomonaetha equeicha Jesús tsita nait̄ta ducuaenaebiya ainya matakabi dapaēin. Pomonae Jesús bayatha tsita nait̄ta, barapomonaē apara pomonae xua anoxuae daxita tomaran tsipaeba dubenanaebiya Jesús yabara.

³² “Daxota paca tsipaebatsi Jesucristo pia pexeinya diwesi jume xua bayatha Nacom yabara tsiw̄nae muxu duta wamo susato jiwitha. ³³ Baxua Nacom exana poxonae Jesús equeicha as̄ exanatsi. Nacata exana poxoru waxainchi wamo susatopiwi pijimonaetsi. Icha be pocotsi coyeneya bayatha tina Nacom Pejume Diwesitha xua salmos penax̄nae weixi diwesintha, po wei xua ichaxota ‘dos’, jei xua jeye: ‘Xam, taxantom, itawan caexanatsi bara’, jei. ³⁴ Nacom, Jesús as̄ exanatsi, xua equeicha jopa pet̄paenexa tsane, xua equeicha jopa tsabanuncuae tsane. Daxota jei pejume diwesitha: ‘Paca catinchi xua bayatha David tayabara tsiw̄nae muxu dutan’, jei. ³⁵ Daxota pon xua tina salmos penax̄nae weixi diwesintha, barapo diwesintha Nacom baraichi: ‘Jopa copatsim xua nexanto petsabanuncuaewa tsane pon bichocono pejunt̄ coyene xanepanaein’, jei. ³⁶ Xainyei, David exana xua Nacom ichipa poxonae bar̄ popona Israel nacuapiwi. David bayatha t̄pa. M̄th̄tha xotsi ichaxota pamo jiwi tatsi yam̄th̄ umena. Yawa bayatha tsabanuncua. ³⁷ Ichitha barapo pepon

po pepon Nacom asu exana, barapo pepon jopa tsabanaeyo. ³⁸ Tamonae pam, maisa bepayabara yaputaename Jesús po coyene xua bapon Jesús pacata cayawa tupa abe painya neexanae cuiru coyenein xua daxota Nacom jumentaina barapo abe painya neexanae cuiru coyenein. ³⁹ Tsipei Jesús tupa daxota daxita pomonae jume cowanta bapontha, Nacom juntu coyene wunaetsina. Bequein jiwi exana daxita pocotsiwa Moisés pia peitorobi coyenewatha itoroba, ichitha barapo coyenewa bapana jopa jiwi juntu coyene xanepana exanaetsi abe pia peexanae cuiru coyenein tatsi weya. ⁴⁰ Dota, icha metha jopa Nacom pajume cowantsipaem, bara paichim tsipae icha be pocotsi coyeneya bayatha pomonae Nacom peitorobi jume pepaebiwi yabara tina. Namchiya tina, jeye:

⁴¹ ‘Ja, jiwi pecui caponaemonae pam, bara pana nabenaecare, pawerapare. Xan, Nacom, anoxuae exanaein bichocono pepa pewunaewa poxonae cataunxuae pajinompame. Baxua xua exanan, jopa pajume cowantsim, bara bequein ichamonae paca tsipaeba’, jei Nacom”, jei Pablo.

⁴² Pablo, iru pia pepuna ponaewichi daxita barapoyobe judiomonae pia penacaetutsi bo tatsi wejojoniya. Pomonae baxota umena pomonae jopa yacuiya naexanaeyo xua judiomonae penaexanaewa, barapomonae Pablo wacatsi xua bepa pinae Pablo equeicha cuidubina po diwesi anoxuae paeba xua equeicha icha diwesi mataropeichiya cuidubina xua icha mataqueitha tsane xua pentaquei seicae matabitha.

⁴³ Poxonae najume weta Pablo iru Bernabé, puna poinchibe judiomonae iru pomonae jopa judiomonae naexanaeyo. Barapomonae Nacom jume cowanta nawita icha judiomonae ichi. Pablo Bernabeno tsipaebabe barapomonae: “Nacom pajume cowanta dubenanaebiyama xua Nacom wanae pia pacata exanaenexa painya juntu coyeneintha pia paca necaantobexae”, jeibe.

⁴⁴ Icha matabi, po matabitha pentaquei seicae matabitha, pin bicheito pomonae tomaratha ena, nacaetuta xua pejume taenexa Nacom pia pexeinya jume diwesi tatsi, pon Pecanamataxeinaeinchi jiji. ⁴⁵ Ichitha poxonae judiomonae pinmonae necota, jume uwa tsipei pinmonae nacaetuta pejume taenexatsi Pablo. Pablo jume matawentatsi xua paeba yawa tsumu jume baru paebatsino. ⁴⁶ Nexata Pablo Bernabeno tsipaebabe barapomonae. Jopa auriya paebiyobe. Jeibe:

—Bara xanepana xua copiya Nacom Pejume Diwesi paca tsipaebatsi pomonae judiomonae pamxaem. Daichitha, jopa bepajume taem barapo diwesi tsipei jopa paichichipaem xua painya nexainaewa peajuntayarusawa po peajuntayarusawa ataya tsiteca. Daxota anoxuae ichamonaetha pata tha ponaetsi pomonaetha pomonae jopa judiomonae naexanaeyo. ⁴⁷ Pata Tanecanamataxeinaein Nacom pana itoroba. Pana baraino, jeye:

‘Paca exanatsi xua painya neyawenaewa daxita pomonae jopa judiomonae naexanaeyo xua xanepanaeya pejinompaenexa tsane. Matautano paca exanatsi xua beta

painya netsipaebinexa Nacom Pejume
 Diwesi daxita nacuantha, xua jiwi
 pecapanenebiyaenexa tsainchi Nacom abe pia
 peexanae cuiru coyenein weya tatsi',
 jei Nacom, jei Pablo.

⁴⁸ Poxonae baxua jume taerucupa, pomonae
 jopa judiomonae naexanaeyo, barapomonae
 bichocono juntu coyene weiweinarucupa, junte
 jinompano. Pablo tsipaebatsi: "Nacom Pejume
 Diwesi jume xeica. Bichocono jume wanae", jei.
 Daxita barapomonae jume cowanta pomonae
 Nacom cuita itapeta petaxeinaenexa tsainchi
 peajuntayapusawa, po peajuntayapusawa ataya
 tsiteca. ⁴⁹ Barapomonae pomonae Jesús pejume
 cowantsiwichi daxita nacuantha tsipaeba
 Jesús pia pexeinya jume diwesi tatsi, pon jiwi
 Pecanamataxeinaein. ⁵⁰ Ichitha judiomonae
 anaepana exana yabuxi powaxi Nacom cananta
 xeinatsi bichocono. Yawa pebiwi pomonae
 peainya cui jiwi, barapo pebiwi anaepana
 exanatsiru. Iru judiomonae Pablo Bernabeno
 abe yabara cueicueijeichibe, daxota daxita jiwi
 Pablo iru Bernabé casebatsibe. Barapo jiwi
 Pablo Bernabeno itawetaxotsibe pia nacua
 beya. ⁵¹ Nexata Pablo Bernabeno nataxu
 nunatababe tсорobo. Baxua exanabe petsita
 itapeinya xeinaenexa po coyene bapomonae abe
 exana poxonae jume itaweta Nacom Pejume
 Diwesi. Barapoxonae warapabe Iconio tomara
 beya. ⁵² Ichitha pomonae Jesús jume cowanta,
 barapomonae bichocono juntu coyene weiweina.
 Matautano barapomonae juntu coyene yucatsi
 Nacom pia Pejumope tanaXu tatsi.

14

Meje yabara poxonaē Pablo Bernabeno Iconio tomaratha poponabe

¹ Iconio tomaratha Pablo Bernabeno judiomonaē pia penacaetutsi botha tatsi joniyabe. Beta paebabe daxota pinmonaē Jesús jume cowanta. Judiomonaē jume cowanta, iruru pomonaē jopa judiomonaē naexanaeyo jume cowanta Jesús. ² Ichitha po judiomonaē jopa Jesús pejume cowantsiwichi barapomonaē cui tsacaba pomonaē jopa judiomonaē naexanaeyo cui tsacabatsi. Daxota barapomonaē pomonaē jopa judiomonaē naexanaeyo abe yabara nanta xaina xua pomonaē Jesús pejume cowantsiwi tatsi abe yabara nanta xeinatsi. ³ Pablo Bernabeno barapo tomaratha ecabe. Ainya matacabi dapaein baraponbe ecabe baraxota. Nacom Pejume Diwesi jume daunweya cueicueijeibe Pecanamataxeinaein nexa. Baponbe Nacom cata pia peayapusawa peexanaenexabe pexeinya petsita itutsi coyenewan. Poxonaē jiwi cui tane xua baponbe exanabe, barapo jiwi yaputane xua Nacom yawena baponbe, peantobexaetsibe. ⁴ Daxita jiwi tomaratha be ainya jiwibe natsababe. Ichamonaē judiomonaē ichichipa. Ichamonaē Jesús pia peitorobi jiwi tatsi ichichipa. Daxota ainya bicheitobe nacana exanabe. ⁵ Nexata bapoxonaē judiomonaē iru pomonaē jopa judiomonaē naexanaeyo peburuya yabara jume baru nanta xinarucupa xua pentacaponawewi paeba po coyene xua Pablo yawa Bernabé abe peexanaewa tsainchibe xuano xua ibotontha

pecuinbabinexatsibe. ⁶ Poxonae Bernabé Pablobe jume taebabe nainya naetsirucuabe Listra tomara beya, Derbe tomara beyano. Barapo tomarabe Licaonia nacuatha ecabe. Matautano icha tomaran beya ponabe Pablo Bernabeno xua po tomaran ena barapo Licaonia nacuatha. ⁷ Barapo tomarantha cuiduba ducuaanaebiyabe Jesús pia pexeinya jume diwesi tatsi.

Meje yabara poxonae Pablo Listra tomaratha ibotontha cuinbabatsi

⁸ Listra tomaratha pebin popona pon pemabinchi, pon xua jopa peponaein. Bapon pexuyotha caena yawa naexaneca, xuano bapana jopa ponae. ⁹ Bapon pon pemabinchi Pablo jume tainchi xua pocotsiwa cueicueije. Pablo pemabinchi tane. Pablo nanta xeina, xua pon pemabinchi bara Nacom jume cowantatsi. Pablo nanta xeinataba xua axaibi peexanaewa tsainchi pon pemabinchi. Daxota bichocono Pablo naita cui duya bapontha beya. ¹⁰ Nexata Pablo jume daunweya barai, jeye:

—Asiya uncuare, jei.

Pon pemabinchi asiya uncuatabiya jirawana yawa nainya ponano. ¹¹ Poxonae Pablo cui tainchi barapomonae, jume daunweya wawai pin jumetha, Licaonia pijumetha tatsi:

—¡Nacombe be pebin juta tsecae waxainya berena patopabe! jei.

¹² Barapomonae namchi: “Maisa Bernabé bara mexeya nacom tsecae, po nacom pewun Zeus. Iru Pablo bara mexeya icha nacom tsecae, po nacom pewun Hermes”, jei. Barapomonae bapo wun duta poxoru tsipei Pablo penantacapaebin tsecae.

¹³ Ir_u barapo nacom Zeus pia sacerdotemonaepin xeinar_u, pon Zeus w_unae jainteibatsi pia penacaetutsi bo tatsitha. Barapo penacaetutsi bo uncua tomara coiboto juma weya. Barapo sacerdotepin vaca pebton wiyaba pentonon pecaponaenexa Zeus pia penacaetutsi botha tatsi. Barapo tomarapiwi ir_u Zeus pia sacerdotepin ichichipa juteba vaca pebton petautsinexa xua petuxusi exanaenexa Pablo ir_u Bernabé nexabe pia Pablo ir_u Bernabé yabara nanta xeinaebe barapomonaexua barapomonaexa bara peju_{ntu} coyene xanepanaewi. ¹⁴ Bernabé Pablobe jume tanebe xua taexanaeinchibe baxua barapomonaexa. Bapoxonaexa anaya nama paparuwa tsitsinaxubabe. Cuinaeponaya wawaibe poxoru aichaxaibibe xua baxua barapomonaexa exanaena. Jeibe:

¹⁵ —¿Eta xua daxua pana cana_{ut}tame? Apra saya jiwi panbe. Be paxam paichim bara paichinbe. Papatopanbe tsipei apra pata paca catsipaebinexa tsainchi xua painya nenacui barapentsiwa tsane barapo coyenexi xua jopa pecui xanepanaewiyo. Maisa Nacomtha panantana pende. Barapo Nacom pon peant_ucuiyapus_un, exana peitaboco, iranno, pin meneinno. Daxita xua xuanno yawa muxuna dubena tsiniya Nacom bayatha exana. ¹⁶ Waw_unaeya Nacom cui copata daxita nacuapiwi xua bara pejinompaenexa icha be pocotsi coyeneya ichichipa xua pejinompaewa. Daxita jiwi pia cui nata exana saya. ¹⁷ Nacom xua pew_unaewan nacopiniwa tsita it_uba daxota jiwi naita cui coyene tane xua Nacom exana. Barapon Nacom apra pon ema pacata itorobica, pexuwi-

wanno paca tsijain exaneica catsicano. Pexaewa paca cata. Paca jũntũ coyene weiweina exana, jei.

¹⁸ Bequein Bernabé Pablobe jume daunweya yabara paebabe baraxua, awiya barapomonae ichichipa jutebina vaca pebton xuano xua wũnae pejainchinexatsibe Pablo irũ Bernabé. Barapomonae muxu pejutebi vaca daichitha jopa jutebiyo.

¹⁹ Bapoxonae judiomonae pomonae jopa pejume cowũntsiwi, Antioquía tomara weparena, irũrũ Iconio tomara weparena. Daxita barapo judiomonae Listra tomarapiwi barũ cueicueijeichi pebarũ anaepanaenexatsibe Pablo irũ Bernabeno. Nexata barapomonae Listra tomarapiwi ibotontha cuinbabatsi Pablo. Barapomonae najũntũ coyene xeina xua bayatha tũpa Pablo. Pablo tomara coiboto juma bejojontapoinyatsi.

²⁰ Jesús pejume cowũntsiwichi Pablo cacuita mata wacaicha umenarũcũpatsi. Bapoxonae Pablo asiya uncuataba. Equeicha tomara bepoinya. Icha mataqueitha Bernabé Pablobe Derbe tomara beya ponabe.

²¹ Barapoxonae Bernabé Pablobe muxu tsipaebabe Jesús pia pexeinya jume diwesi tatsi. Pinmonae jume cowũnta Jesús. Equeicha bapoxonae Listra tomara beya, caibeya ponabe. Iconio tomarano, Antioquía tomara beyano bara bewarapiyabe.

²² Bernabé irũ Pablo barapo tomarantha jũntũ coyene tsacababe pomonaetha pomonae pejume cowũntsiwi xua xanepanaya pejinompaewa tsane. Mataũtano cui itorobabe barapomonaetha xua bewa barapomonae beta xanepanaya jume cowũnta dubenanaebiyaena.

Barichino matautano tsipaebabe xua pinae poxonae ichamonae pepatsiwa tsane Nacom pia peitorobi nacua beicha bewa matha ajantucoyenetane exaneibinchi xua ichamonae taexanaena. ²³ Bernabé Pabloe tamroropata itapeta tsiniyabe pitiri jiwi daxita Jesús pejume cowantsiwi pia penacaetutsi bontha. Barapo pitiri jiwi itapetatsi peyawenaenexa xua peyawenaenexatsi pomonae Jesús pejume cowantsiwi. Poxonae daxita najume weta xua Nacomtha petsipaebiwa, xuano xua yabara nainbota pitiri jiwi nexa, barapoxonae Pablo iru Bernabé, Nacom pon Pecanamataxeinaein jiwi, jeichichi: “Nacom, barapo pitiri jiwi beta eenare jinya necajume cowantsixae”, jeibe.

Meje yabara poxonae Bernabé iru Pablo Antioquía tomaratha equeicha caibe patopiyabe xua po tomara peecaexae Siria nacuatha

²⁴ Copiya matha Pisidia nacua bewarapiyabe. Bapoxonae Panfilia nacuatha patopabe. ²⁵ Jesús pia pexeinya jume diwesi tsipaebabe Perge tomaratha. Barapoxonae equeicha Atalia tomara bewarapiyabe. ²⁶ Baraxotiya Atalia tomaratha Antioquía bewarapiyabe jeratha, po naetha po nae pin nae. Antioquía tomara barapo tomara ichaxota bayatha matha barapomonae Bernabé iru Pablo tawucatsibe Nacomtha poxonae juntucuru warapabe. Bayatha cain barapo Antioquía tomarapiwi tawuca Nacomtha, xua Nacom beta eenaena peantobexae xua Pablo iru Bernabeno beta eenainchibe poxonae nacuitabe Nacom pia penacuichiwa. Baxota

equeicha Pablo Bernabeno pecoutha patopabe tsipei barapo pia penacuichiwabe bayatha wetabe. ²⁷ Bernabé iru Pablo poxonaē patopabe Antioquía tomaratha caetutabe pomonae pejume cowantsiwi Jesús. Baponbe barapomonaetha tsipaebabe po coyene bayatha Nacom Pablo iru Bernabé taexanatsibe. Matautano tsipaebabe xua Nacom pon Pecanamataxeinaein jiwi, pomonae jopa judiomonae naexanaeyo tacopatatsi xua iru barapomonaē peitacupaewatsi xua pejume cowantsinexatsi Jesús. ²⁸ Bernabé iru Pablo baraxotiya ainya dapaēin naecabe barapomonaē pia xantha tatsi pomonae Jesús pejume cowantsi jiwichi.

15

Meje yabara poxonaē nacaetuta Jerusalén tomaratha Jesús pia peitorobi jiwi tatsi iru penapataē jiwi

¹ Barapoxonaē iru pebiwi, pomonae Judea nacuatha jinompa, pata Antioquía tomaratha. Barapomonaē tamropata notarupa xua pecuidubiwa pomonaetha pomonae iru pejume cowantsiwixae Jesús. Jeye: “Icha paichichipame xua painya nepaca capanenebiwa matha pana nawi thabare pebiwi pam ichaxota pana nareixacaename icha be ichi pocotsi coyeneya bayatha Moisés paca itoroba”, jei. ² Pablo iru Bernabeno jume daunweya tsipaebabe xua baxua jopa xainyeyo. Ichitha jume matsontsonobatsibe barapomonaē. Daxota Pablo iru Bernabé wun dutatsibe, iru ichamonae wun dubatsi xua daxita barapomonaē peponaenexa

Jerusalén tomara beya. Matautano barapomonaē itorobatsi xua barapo penawi thabi coyene yabara petsipaebinexatsi Jesús pia peitorobi jiwi tatsi, iruru pitiri jiwi petsipaebinexatsi pomonaē penacaetutsi jiwi jiwana xua Jerusalén tomaratha.

³ Barapo Antioquía tomarapiwi pomonaē Jesús pejume cowantsiwi pu taeumena. Pablo iru Bernabé iru icha pebiwi pu taeumeinchi. Barapoxonaē Pablo Bernabeno iru icha pebiwino warapa. Barapomonaē siwa pona Fenicia nacua beya, Samaria nacua beyano. Barapomonaē Pablo Bernabeno tsipaebabe, jeibe: “Pomonaē xua jopa judiomonaē naexanaeyo, barapomonaē pia cui coyenein nacui barapenta po coyenein xua jume cowanta bayatha pia jume cowantichi Nacomtha”, jeibe Pablo, Bernabeno. Daxita pomonaē iru pejume cowantsiwixae Jesús bi-chocono juntu coyene weiweina poxonaē jume tane baxua.

⁴ Bernabé iru Pablo poxonaē patopabe Jerusalén tomaratha, pomonaē pejume cowantsi jiwi baponbe matenta weiweinaya wabatsibe. Iruru Jesús pia peitorobi jiwi tatsi matenta weiweinaya waba. Barichiru pitiri jiwi matenta weiweinaya waba. Bernabé iru Pablo tsipaebabe barapomonaetha po coyene bayatha Nacom taexana baponbetha.

⁵ Ichitha ichamonaē fariseomonaē, pomonaē bayatha jume cowanta Jesús, asiya umena. Barapomonaē namchi, jeye:

—Pomonaē jopa judiomonaē naexanaeyo pomonaē pejume cowantsiwi Jesús bewa exanaetsi xua penawi thabiwa tsane xua

ichaxota nareixacaena xua ichaxota pebiwixae xeina. Matautano bewa cui itorobichi xua bewa exanaponaena pocotsiwa bayatha Moisés itoroba pia peitorobi coyenewatha, jei.

⁶ Bapoxonae Jesús pia peitorobi jiwi tatsi iru pitiri jiwimonaeno nacaetuta peyabara paebinxaxa barapo penawi thabi coyene. ⁷ Caena bayatha bapomonaenajume matsontsonobompa. Bapoxonae Pedro asiya uncuataba. Barai barapomonaetha, jeye:

—Tamonaenapam, pomonaeniru painya nejume cowantsiwixae Jesús, paxam payaputaneme, xua caena bayatha Nacom neitapeta painya xantha. Newaba tacueicueijeinxaxatsane Jesús pia pex-einya pecapanenebiyae diwesi jume pomonaetha pomonaenjopa judiomonaenaexanaeyo, xua iruru barapomonaenajume cowantsinxaxa barapo diwesi. ⁸ Nacom rejuntu coyene yaputaenjiwi daxota naca yaputane exana xua bapon tsitatsi xua barapomonaenajuntu coyene xanepanaewi bequein jopa judiomonaenaexanaeyo. Nacom bara nanajumope tuxaxa cata barapomonaetha icha matha naca cana ichi. ⁹ Nacom bichocono antobe barapomonaenacha ichi xua bichocono naca antobe. Nacom juntu coyene puxana exana barapomonaenaxua abe pia peexanaenacuiru coyenein tatsi nejume cowantsixaxaetsi icha naca ichi. ¹⁰ Maisa anoxuae jopa bepayaabara yaputaem pocotsiwa Nacom exana. Matautano barapo nejume cowantsiwi pomonaenjopa judiomonaenaexanaeyo pacui itorobame xua penawi thabiwa xua ichaxota nareixacaena xua ichaxota pebiwichi xeinatsi. Matautano be paca

ita cui jicha xua barapomonae bewa exanaena pocotsiwa Moisés itoroba. Apará baraxua jopa naca itacupaeyo xua waexanaewa. Irũ wamo susato jiwi jopa itacupaetsi xua peexanaewa baxua. ¹¹ Nama apará waxainchi wanaca capanenebiyae jiwichi xua saya amanaya xua Jesús pon jiwi Pecanamataxeinaein peichichipaexae baxua. Barapo pejume cowantsiwi irũ bara cana ichichi, jei Pedro barapomonaetha.

¹² Bapoxonae barapomonae moya umena. Barapomonae Bernabé irũ Pablo jume taeumenatsibe. Tsipaebabe: “Paponeibanbe pomonaetha pomonae jopa judiomonae naexanaeyo. Paexaneibanbe barapomonaetha pexeinya petsita itatsi coyenewan Nacom pia peayapusuwiyatha tatsi”, jeibe. ¹³ Poxonae Bernabé irũ Pablo najume wetabe xua paebabe, bapoxonae Santiago namchi, jeye:

—Tamonaé pam, pomonae irũ painya nejume cowantsiwixae Jesús, pana nejume taema: ¹⁴ Simón Pedro aunxuae naca tsipaeba. Pedro namchi: ‘Poxonae Nacom copiya tamropata pitaba xua yawena pomonae jopa judiomonae naexanaeyo, Nacom jiwana itapeta pomonae xua peantobenexa tsainchi bapon’, jei Pedro. ¹⁵ Xuaunxuae Pedro paeba caena bayatha Nacom pia peitorobi jume pepaebiwí yabara tsiwanae muxu dutsiya tina Nacom Pejume Diwesitha xua Nacom nexa, jeye:

¹⁶ ‘Poxonae daxita baraxua wetsina, xan Nacom equeicha patoparecaein. Exanaein xua caein, pon David pia pemomo jiwi tatsi jiwana matacapoponaena

piamonae, icha matha David ichi
poxonae piamonae matacapopona.

¹⁷ Poxonae baraxua exanaein, barapoxonae icha-
monae

pomonae jopa judiomonae naexanaeyo newe-
nawenei

tsane pia tanejume cowantsinexa tsane.

Barapomonae pia Pecanamataxeinaein tatsi
naexanaein taitapetsixae barapomonae.

¹⁸ Nacom pon jiwi yaputaeya

exanatsi barapo coyenein caena bayatha
pepaebixae baxua daxota xaniwaicha

Nacom exanaena', jei Nacom pia

peitorobi jume pepaebiwi, Nacom Pejume
Diwesitha xua Nacom nexa, jei Santiago.

¹⁹ Santiago cataunxuae awiya cueicueijei, jeye:

“Daxota nanta xeinan, equeicha waxainchi
jopa bewa itorobi tsainchi pomonae jopa
judiomonae naexanaeyo xua peexanaewa po
coyenein xua taayapubetsi. Barapomonae nacui
barapenta pia cui coyenein po coyenein xua
jume cowanta bayatha pia jume cowantichi
Nacomtha. ²⁰ Betatinaetsipatsi carta pomonae

jopa judiomonae naexanaeyo. Barapo cartatha
jeichipaetsi: ‘Jopa equeicha pewi paxaeinde po
wi jiwi tajeba ibo nacom nexa. Painya xoba
yabaxi panotame po yabaxi jopa painya seurixi.
Painya xoba duwei pawu xaneme pon saya pipato
tura xuano pon saya bunopa. Matautano jopa
paxaeinde pejanan’, bejei tsipaetsi. ²¹ Baraxua
bewa exanaetsi poxoru caena cain bayatha
pomonae Nacom Pejume Diwesi pecanatsipaebi
jiwi yorobeiba barapo diwesi judiomonae pia

penacaetutsi bontha tatsi. Daxita tomarantha xua po matababintha pentaquei seicae matababintha barapomonaе yorobeiba Nacom Pejume Diwesi, po diwesi xua Moisés tina bayatha pocotsiwa yabara tsiw_unae muxu duta Nacom”, jei Santiago.

Meje yabara poxonaе barapo bicheito carta tatina pomonaetha pomonaе jopa judiomonaе naexanaeyo

²² Jesús pia peitorobi jiwi tatsi ir_uu pitiri jiwi, ir_u daxita pomonaе pejume cow_untsiwi juntu-curu najiwana itapeta. Bapoxonaе xua Antioquía tomara beya penajiwana itorobinexa Pablo ir_u Bernabé. Judas w_un dutatsi pon icha w_un Barsabás. Ir_u Silas w_un dutatsi, baponbe ponbe bichocono peainya cui jitonbe xua pomonaе ir_u pejume cow_untsiwi pia xantha tatsi. ²³ Jesús pia peitorobi jiwi tatsi ir_uu pitiri jiwi, ir_u pomonaе Jesús pejume cow_untsiwi, barapomonaе carta tina xua pecaitorobinexa xua Pablo ir_u Bernabé ir_u Judas ir_u Silas barapoyobe pecaitorobinexatsi. Barapo carta namchi, jeye:

“Paxan Nacom pia peitorobi jiwi tatsi pan, ir_u pitiri jiwi panno xua nacaemonae jiwichi xua wajume cow_untsiwichi Jesús. Paxan pajacoban patamonaе pomonaе jopa judiomonaе naexanaeyo pomonaе ir_u Jesús pejume cow_untsiwichi, pomonaе pejinompaexae Antioquía tomaratha, xuano xua pejinompaexae Siria nacuatha, Cilicia nacuathano. ²⁴ Payaputan ichamonae xua patamonaе pata tomara weya pipato paca siwa pona painya tomara beya. Paca cajume acaura. Barapomonaе namchi:

‘Pana nawi thabare. Matautano paexande pocotsiwa Moisés pia coyenewatha itoroba’, jei. Jopa paitorobinyo barapo jume. ²⁵ Daxota be juntucuru pawnaein xua cuita pananta jupaya nanta xeinan. Paitoroban ichamonae pata xainya weya pia paca necataenexa tsane. Napuna ponabe Bernabé Pablono ponbe bichocono paantobein. ²⁶ Baponbe Pablo iru Bernabé muxu pebocaebe xua pebexubiwatsibe pecueicueije tsurucuaenaebiyaexaebe Jesucristo nexa, pon Wanacanamataxeinaein. ²⁷ Paitorobanbe Judas Silasno. Baraponbe saya pia coutha paca tsipaebinabe daxita xua barapo cartatha papaeban painya neyaputaenexa. ²⁸ Paxan iru Nacom pia Pejumope tuxaxu tatsi pananta jupaya nanta xeinan xua jopa bepaca itorobichi icha cui coyene po cui coyene bichocono pacata ayapube xua painya neexanaewa tsane. Meisa saya u baxua xua pacata tinatsi po cartathe baxua panantawenoname xua painya neexanaewa tsane. ²⁹ Painya xoba paxaneme pewi po wi jiwi tajeba ibo nacom nexa poxonae tauta barapo duwei xua tuxusi exana barapo ibo nacom nexa. Barichi painya xoba duwei paw xaneme pejanano po duwei pipato tumpumena. Matautano ichamonae painyamonae jiwana pia xoba nota yabuxi powaxi jopa piseurixi tatsi. Icha baraxua panacui barapentsiname xanepanaya pajinompaename. Baja”, jei barapo cartatha.

³⁰ Bernabé iru Pablo, iru Judas Silasno barapomonaeyobe peitorobixaetsi bara Antioquia tomara be-iyiya. Barapo tomarathiya barapomonaeyobe caetuteta pomonae pejume

cowantsiwi. Matautano barapomonaeyobe barapo carta cata barapomonaetha. ³¹ Pomonae iru pejume cowantsiwixae Jesús bara yoroba barapo carta. Barapomonaetha bichocono juntu coyene weiweina tsipei barapo cartatha cui matateicaeya yabara paebatsi. ³² Judas iru Silas peitacupaexaetsibe xua beta petsipaebiwabe Nacom Pejume Diwesi xua Nacom yaputane exana, daxota juntu coyene tsacababe barapomonaetha pomonae iru Jesús pejume cowantsiwi tatsi xua beta pejinompaewa tsane. Matautano baponbe cui matateicabe. ³³ Barapoyobe barapo pejume cowantsiwitha naecabe caena bayiyo. Barapoxonae barapomonaetha pomonae pejume cowantsiwixae Jesús barapoyobe juntu coyene xanepanaya pu napeyabatsi xua penawibiyaexae caibeya ichaxota werena bayatha pomonae peitorobirenaexaetsi. ³⁴ Ichitha Silas juntucuru narunta. ³⁵ Pablo iru Bernabé Antioquía tomaratha ecabe. Baponbe iru ichamonaeno pomonae pinmonae, daxita barapomonaetha cuiduba dubenanaebiya yawa tsipaeba dubenanaebiya Jesús pon Pecanamataxeinaein jiwi pia pexeinya jume diwesi tatsi.

Meje yabara poxonae Pablo equeicha warapa nacueyatabe po cuiyobetha xua Jesús pia pexeinya jume diwesi tatsi pecueicueijejiwa nexa

³⁶ Pirapaeyo icha mataqueitha, Pablo barai, Bernabé baraichi, jeye:

—Anthax equeicha Jesús pejume cowantsiwi siwa ponaeinchi daxita jupaya tomarantha

ichaxota matha cain Jesús pon jiwi Pecana-mataxeinaein pia jume diwesi tatsi tsipaebatsibe. Wayaputaenexabe icha metha bara beta jinompa bapomonaē, jei Pablo.

³⁷ Bernabé ichichipa xua puna poinchibe pon Juan, pon icha w_hnno Marcos. ³⁸ Ichitha Pablo jopa ichipaeyo xua pebar_u ponaewatsi Juan Marcos tsipei bayatha Panfilia tomaratha Bernabé ir_u Pablo cuenta ponatsibe. Bayatha Juan Marcos juntucuru jopa benapuna nanacuichiyo Jesús pia pexeinya jume diwesi tatsi. ³⁹ Najume mat-sontabe. Bernabé ir_u Pablo naw_u tsatajopabe. Bernabé tsana bar_u jopa Marcos. Weratha ponabe Chipre tunaeto beya. ⁴⁰ Barapoxonaē Pablo cuita waba Silas. Antioquía tomaratha pomonaē pejume cow_hntsiwixae Jesús, Pablo Silasno tatsipaebatsibe Nacomtha xua Nacom peenaenexa peantobexae xua Pablo ir_u Silas peenaenexatsibe poxonaē cueicueijeibe Nacom Pejume Diwesi. ⁴¹ Pablo ir_u Silas warapabe Siria nacua beya, Cilicia nacua beyano. Baponbe j_unt_u coyene tsacababe pomonaetha pomonaē pejume cow_hntsiwi Jesús xua beta pejinompaewa nexa.

16

Meje yabara poxonaē Timoteo cueyata, Pablo ir_u Silas cueyatatsibe

¹ Pablo ir_u Silas Derbe tomaratha patopabe. Equeicha bapoxonaē Listra tomaratha patopabe. Baraxota Listra tomaratha caxinabe pebin pon pejume cow_hntsin Jesús. Bapon pew_hn Timoteo. Pena tatsi saya judiomonaewayo. Barapowa

ir_u pejume cow_untsiwayo Jesús. Timoteo paxa tatsi griegomonaepin. ² Jesús pejume cow_untsiwi, pomonae jinompa Litra tomaratha, ir_u pomonae Iconio tomaratha jinompano, barapomonae Timoteo beta yabara paebatsi xua pinae peju_{ntu} coyene xanepanaein. ³ Pablo ichichipa xua bepuna ponaiechatsi Timoteo xua peyawenaenexatsi. Ichitha matha copiya cui itorobatsi Timoteo xua pewi thabinexatsi xua ichaxota nareixacaeca xua ichaxota pebinxae xeina. Pablo baxua exana tsipei jopa ichipaeyo xua judiomonae anaepana peexanaewa tsainchi xua jopa pewi thabixae tsipaetsi Timoteo. Tsipei Pablo yaputane xua judiomonae nawita ichaxota poneibinabe. Barapomonae judiomonae nawi thabeiba tsipei pia cui. Matautano barapomonae judiomonae yaputane xua Timoteo paxa tatsi griegomonaepin. Daxota Timoteo jopa caena bayatha wi thabichi tsipei canta griegomonae jopa daxua exaneibiyo. ⁴ Daxita jupaya tomarantha pateiba, Pablono, Silasno, Timoteono. Barapomonaeyobe tsipaebabe pomonaetha pomonae Jesús pejume cow_untsiwi pocotsiwa bayatha Jesús pia peitorobi jiwitatsi ir_u pitiri jiwitina cartatha poxonae nacaetuta Jerusalén tomaratha pomonae pejume cow_untsiwi Jesús. ⁵ Daxota pomonae penacaetutsi jiwitara xanepanaya beta jume cow_unta. Daxotano pinmonae jume cow_unta. Daxita matabi mataropeicha pinmonae tsoponae xua jume cow_untapona Jesús.

Mejeyabara poxonae Pablo camaita Macedonia

nacuapin

⁶ Nacom pia Pejumope t̃nax̃ tatsi Pablo jopa copatichi xua pecueicueijeiva tsane Nacom pejume diwesi Asia nacuatha. Daxota Pablobar̃ Frigia nacua iya pona xuano xua Galacia nacua iya pona. ⁷ Misia nacua iyiya. Baraxotiya bequein ichichipa pata Bitinia nacuatha, ichitha Jesús pia Pejumope t̃nax̃ tatsi apusiwa. ⁸ Daxota Misia nacua iyiya. Troas tomaratha mene itapatha pata. ⁹ Baraxota merawi Pablo camaita pebin pon Macedonia nacuapin. Bapon Macedonia nacuapin nantacotuncua. Pablo jume daunweya wabatsi: “¡Anetha denande! Macedonia nacua berena. ¡Pana yawende!” jeichichi Pablo. ¹⁰ Pablo camaita bapon, daxota paxainxainyan xua pata warapaenexa Macedonia nacua beya. Ir̃ xan, Lucas tsocuaein, naponan. Paxan tsipei payaputan xua bara Nacom pana itoroba barapo nacuatha xua pata cueicueijeiva tsane Jesús pia pexeinya jume diwesi tatsi.

Meje yabara poxonae Pablo ir̃ Silas Filipos tomaratha ecabe

¹¹ Jeratha pawarapan, po naetha po nae pin nae. Paponar̃c̃upan Troas tomara mene itapa weya. Weratha bopiya payiyan petunaeto cacuitiya Samotracia tunaeto. Icha matabitha papatan Neápolis tomaratha. ¹² Equeicha baxotiya Filipos tomara bepaiyan, po tomaratha xua romanomonae cueranta ena. Barapo Filipos tomara yatsicaya pepa tomara, pepa Macedonia nacua. Baraxota ainya matabin paenan. ¹³ Caentacabi, po matabi pentaquei seicae

matacabitha, tomara pepuya beya paponan mene itapa beya, ichaxota judiomonae Nacom w_hqueiba. Paenan baraxotiya. Jesús pejume diwesino pacueicueijan yab_hxitha powaxi xua cou bayatha nacaetuta. ¹⁴ Barapowaxi caewayo jiwana pana jume tane. Barapowa pew_hn Lidia, Tiatira tomarapiwayo. Bapowa caenaeteiba papab_hr_h, po papab_hr_h m_h tsobia po papab_hr_h ainya matoman. Barapowa w_hnae jainteiba Nacom. Barapowa beta jume tane pocotsiwa Pablo paeba. Nacom pon jiwi Pecanamataxeinaein, barapowa icha j_hnt_h coyene cana exanatsi xua peexanaenexa pocotsiwa Pablo paeba. ¹⁵ Barapowa bautisabatsi, yawa piamonae matab_hx_hyo tatsi bautisabatsi. Baroxonae bapowa pana barai, jeye:

—Icha bara metha xaniwaicha pananta xeiname xua Jesús tajume cow_hntsiwayo, pon jiwi Pecanamataxeinaein, nexata antha tabohta pamaire, pana nejei Lidia.

Pecono jumeyohta pana barai, bepa pinae xua pia botha pamaichin.

¹⁶ Icha mataqueitha poxonae namtohta paenaponan xua poxonae paponan ichaxota jiwi w_hqueiba Nacomtha, baxota yab_hyo pacaxinan namtohta. Barapowayo cauri xeina. Barapowayo pebusi cui taetaewayotsi xua amanaya petanacuichiwa pia pentacaponaein nexa. Mata_htano barapowayo paratixi caetuba pia pentacaponaein tatsi nexa xua bapowa pecueicueijeji tsaibixae pocotsiwa cauri yaputane exana. ¹⁷ Barapowa, Pablo, ir_h paxan pana pu wabapona. Bapowa wawaya namchi, jeye:

—¡Barapomonaē tanacuita Nacom nexa, po Nacom itabocotha eca! ¡Paca muxu tsipaeba Nacom pia pecapanenebiyae diwesi! jei barapowayo.

¹⁸ Bapowa baxua exaneiba ainya matakabin. Pablo amuxufaetabi. Pablo barapowa taitaweta cauri. Pablo cauritha namchi, jeye:

—Jesucristo wuntha caitawetatsi. Naetsiriware. Xubariware bapowayo, jei Pablo.

Bara caena barapowayo copatabatsi cauri.

¹⁹ Barapoxonaē yabūyo cui tainchi pia pentacaponae wichi tatsi xua equeicha jopa amanaya tacaetubi tsane paratixi barapomonaē nexa. Daxota Pablo Silasno waetabatsibe. Pematacaitorobi bicheito jiwi peitabaratha capoinchibe tomara panatha. ²⁰ Barapomonaē Pablo irū Silas cuarano-tatsibe peitabaratha tatsi pomonaē jiwi peyabara paebiwi xua penatsicuentiwa xua abe peexanaexae. Barapomonaetha jeye:

—Baponbe judiomonaē jitonbe, watomaratha baponbe wamonaē cui tsacabatsi xua najume matsontsonoba. ²¹ Baraponbe pia cui coyeneya naca cuiduba. Barapo coyene jopa becopatichi xua wajume taenexa xuano xua waexanaenexa, tsipei romanomonaetsi, jei barapomonaē.

²² Bara nexata Pablo irū Silas barū anaepanarūcapatsibe jiwi. Matautano pomonaē jiwi peyabara paebiwi xua penatsicuentiwa xua abe peexanaexae, barapomonaē ichamonaē cui itorbatsi xua Pablo irū Silas peuma xuenaxubinexatsibe paparūwa, bapoxonaē xua pecuainchinexatsibe iwatontha. ²³ Matha bichocono cuaintatsibe. Bapoxonaē caponatsibe jiwi pecubi bo beya. Pon peyabara equeibin pomonaē cabebatsi jiwi

pecubi botha bapon cui itorobatsi jeichichi: “Beta yapu eenare, xua jopa penaetsiriwanexabe”, jeichichi barapon. ²⁴ Poxonae bapon jume tane pocotsiwa pentacaponae wi cui itoroba, bapoxonae po tutu tajū beya baxota Pablo irū Silas cuaranoyatsibe. Bichocono naepaewatha taxu cateitabetatsibe jiwi petaxu cateibabi naewatha.

²⁵ Papaetha Pablo irū Silas Nacomtha tsipaebabe yawa Nacom pijume weino naxūnabe. Ichamonae baraxota cūbebatsi jiwi pecubi botha. Barapomonae Pablo irū Silas jume tayenatsibe. ²⁶ Barapoxonae jemeicha bichocono jijiyataxuba. Ibowano jijiyataxubano xua bomūxū peyūtanotsiwa. Bapoxonae jemeicha nainya saya dubenanaya peboupan. Matautano pomonae jiwi pecubi botha jebatsi daxita taxu nain sarababatsi. ²⁷ Pon peyabara equeibin pomonae cūbebatsi, bapon nacosataxuba. Bapon tane xua barapo jiwi pecubi bo saya peboupa umenarūcūpa. Bapoxonae pia cusi namara jonta. Muxu penabexubi, tsipei bapon nanta xeina xua bara daxita panenebiya, Pablo, Silasno irū ichamonaeno. ²⁸ Ichitha Pablo waba bapon pon peyabara equeibin pomonae cūbebatsi jiwi pecubi botha, jeye:

—jopa jinya coutha nabexubinde, tsipei apara cataunxuae xote pajinompan! jei Pablo.

²⁹ Nexata pon peyabara equeibin pomonae cūbebatsi jiwi pecubi botha, wawaya namchi, jeye: “Painta itanatabare”, jei. Jijiyeya cuinaepondenā. Pablo irū Silas imoxoyo petaxutha pentabocototha caquita tauncuatabatsibe. ³⁰ Bapoxonae bapon pon peyabara equeibin pomonae cūbebatsi

jiwi pecubi botha, bapon Pablo iru Silas pesato becayatsibe. Pablo iru Silas baraichichibe, jeye:

—Ja, zeta bichocuaein tsane xua tana necapanepawa tsane Nacom beicha? jei bapon.

³¹ Pablo iru Silas jume notabe, jeye:

—Jume cowunde Jesús pon jiwi Pecanamataxeinaein, bapoxonae necapanepae jitom tsane iru jinyamonae matabuxuyo pecapanenebiyae jiwi tsainchi, jeibe.

³² Tsipaebabe bapontha, Jesús pon jiwi Pecanamataxeinaein, pia pexeinya jume diwesi tatsi. Matautano tsipaebabe piamonae matabuxuyo jiwitha tatsi, pomonae pia botha petaenaexaetsi. ³³ Caena barapoxonae, pon peyabara equeibin pomonae cubebatsi jiwi pecubi botha, Pablo, iru Silas wan quiatatsibe. Bapoxonae bapon bautisabatsi iru piamonae matabuxuyo tatsi bautisabatsi. Pablo, iru Silas bautisababe. ³⁴ Bapoxonae Pablo iru Silas bo beya caponatsibe. Pexaewa catatsibe. Bapon piamonae matabuxuyo tatsino bichocono juntu coyene weiweina pejume cowuntsixae Nacom.

³⁵ Pomonae jiwi peyabara paebiwi penatsicuentisiwa xua abe peexanaexae, barapomonae caemumbotha itoroba, policiamonae itorobatsi ichaxota pon peyabara equeibin pomonae cubebatsi jiwi pecubi botha. Bapon copatatsi xua bara Pablo iru Silas pepu copatsinexatsibe.

³⁶ Nexata pon jiwi peyabara equeibin pomonae cubebatsi jiwi pecubi botha, bapon Pablo baraichi, jeye:

—Pomonae jiwi peyabara paebiwi penatsicuentisiwa xua abe peexanaexae,

barapomonaē necui itoroba xua tapaca isanaxubiwa tsainchibe. Bara paca itac̄pabe xua bara papu seicaenamebe, jei bapon.

³⁷ Ichitha Pablo barai policiamonaetha, jeye:

—Apara barapomonaē pana cuainta pepa bicheito peitabaratha. Dacotsiwa barapomonaē abe painta exana. Seicaya apara romanomonaē pan. Copiya matha jopa pana caponaeyobe ichaxota pon jiwi peyabara paebin xua penatsicuenta siwa xua abe peexanaexae. Saya barapomonaē pia coutha paeba xua abe paexananbe. Daxota jiwi pec̄bi botha pana caponabe. Deta aena poxonaē juntucuru pana isanaxubapaebabe moya namicha pana itorobabe. Pentacaponae wi patsipaebare, pomonaē pana cuainta, b̄ jame barapomonaē pia coutha pana nepu sotababe, jei Pablo.

³⁸ Baxua policiamonaē bayatha jume yopita pomonaetha pomonaē jiwi peyabara paebiwi xua penatsicuenta siwa xua abe peexanaexae. Barapomonaē bichocono junuwa poxonaē jume tane xua Pablo ir̄ Silas apara romanomonaē pinbe. ³⁹ Barapomonaē ponar̄c̄pa jiwi pec̄bi botha, Pablo, ir̄ Silas siwa poinchibe peauraxae xua bayatha Pablo, ir̄ Silas cuaintatsibe. Barapomonaē Pablo ir̄ Silas tsipaebatsibe, jeichichibe: “Maisa paauran tsipei abe paca exanatsibe. Moya paponarebe. Jopa po tomarathe paecaeindebe. Jopa pana neyopichinde”, jei. ⁴⁰ Poxonaē Pablo ir̄ Silas jiwi pec̄bi bo wenaetabiyabe, Lidia pia bo tatsi be-iyabe. Siwa ponabe pomonaē pejume cow̄ntsiwixae Jesús. Barapomonaetha

baponbe juntu coyene tsacababe xua xanepanaya pejinompaewa tsane. Bapoxonae bara wewarapiyabe.

17

Meje yabara poxonae Tesalónica tomarapiwi namtsebiya anaepanaeya wawai xua Pablo, iru Silas pecasebixaetsibe

¹ Pablo iru Silas Anfípolis tomara iyabe. Apolonia tomara iyabeno. Barapoxonae Tesalónica tomaratha patopabe po tomara ichaxota judiomonae pia penacaetutsi bo tatsi uncua. ² Pablo pia cui xeina xua judiomonae pia penacaetutsi bontha tatsi pateiba. Daxota baxota eca acoibi po semanabe. Matautano daxita pentaquei seicae maticabintha barapo judiomonae pia penacaetutsi botha Pablo iru Silas cuidubabe. ³ Pocotsiwa Nacom Pejume Diwesi paeba, baxua Pablo tsipaeba po coyene xua pinae pon Mesías bewa bexubinchi ichamonae, xuano xua pinae bapoxonae equeicha asu tsane. Pablo jeye barapomonaetha:

—Pon xua Jesús xuaunxuae yabara paca muxu tsipaebatsi, bapon apara bara Mesías, jei Pablo.

⁴ Ichamonae, judiomonae jume cowanta. Barapomonaе Pablo, iru Silas caemonae naexanatsibe. Barichi pin bicheiton griegomonae jume cowantar, pomonae Nacom wanae jaintatsi. Barapomonaе jume cowanta Jesús. Iru ainya yabuxi bicheiton jume cowanta Jesús powaxi baru cui itura jineibatsi xua jiwi baru cui itura jineiba. ⁵ Ichitha

icha judiomonae pomonae jopa pejume cowantsiwi, baxua yabara uwa. Daxota barapomonae pebiwi baru nacaetuba po pebiwi peajuntucoyeneyapubewi xua po pebiwi saya pejinompaewi namtontha. Daxita barapomonae namtsebiya wawai tomaratha. Jasón pia botha tatsi anaepanaya jojoniya xua Pablo iru Silas pejeichinexatsibe xua pewaetabinexatsibe xuano xua pecaenaetsinexatsibe jiwitha. ⁶ Ichitha baxota Pablo iru Silas jopa taebichibe. Daxota catsaya waetabatsi Jasón, iru ichamonae pomonae pejume cowantsiwixae Jesús. Pablo iru Silas waetabatsibe. Daxita barapomonae pentacaponae jiwitha becayiyatsi. Daxita barapomonae yabara wawaichiya jeichibe:

—¡Barapo pebinbe daxita nacuantha abe paeba ducuaenaebiyabe yawa waxainya becui joparenabe! ⁷ Jasón barapomonae matenta weiweinaya waba pia botha. Jasón pia botha maitecabe. Daxita Pablo baru jopa exanaeyo po peitorobi coyenewan xua pon romanomonae itorobiya pia pepa peewatsinchi itoroba. Matautano barapomonae paeba xua pinae ichun popona pon jiwit itorobiya pia pepa peewatsinchi, bapon pinae Jesús, xua jopa yabara cananta xeinaetsi pon romanomonae itorobiya pia pepa peewatsinchi, jei barapomonae xua namtsebiya wawai.

⁸ Poxonae baxua jume tane, pentacaponae iru pomonae xua baxota umena, daxita barapomonae anaepanaeya namtsebiya wawai. ⁹ Barapo pentacaponae wecobe nota paratixi xua Jasón iru pomonae pejume cowantsiwi wecobe notatsi. Barapo pentacaponae namchi

xua pinae equeicha caewa catsinchi Jasón barapo paratixi poxonae Pablo_{ru} tomara weya ponaena. Bapoxonae pentacaponae_{ru} Pablo_{ru} pu sorobabatsi pewartapenexa tsane tomara weya.

Meje yabara poxonae Pablo iru Silas Berea tomaratha poponabe

¹⁰ Barapo merawitha pomonae iru pejume cowantsiwixae Jesús, barapomonae Pablo, iru Silas itorobatsibe xua nainya pewartapenexabe Berea tomara beya. Poxonae barapo tomaratha patopiyabe judiomonae pia penacuetutsi botha tatsi jonyabe. ¹¹ Judiomonae, pomonae Berea tomarapiwi, barapomonae pejuntu_{ru} coyene xanepanaewi icha be jopa Tesalónica tomaratha ichiyo. Jame barapo Berea tomarapiwi bara xanepanaya jume tane Jesús pejume diwesi. Daxita matabi barapomonae Nacom Pejume Diwesitha yorobeiba pia yaputaetsi barapo diwesi, po diwesi xua Pablo iru Silas paebabe icha metha baraxua bara xainyeibe. ¹² Daxota pinmonae jume cowanta Jesús. Judiomonae jume cowanta Jesús. Iru griegomonae jume cowantano, yabaxi, iru pebiwi. Powaxi jume cowanta Jesús, barapowaxitha jiwi baru cui itura jineiba. ¹³ Judiomonae, Tesalónica tomaramonae, jume tane xua Pablo cuiduba Nacom Pejume Diwesi Berea tomaratha. Daxota barapomonae Berea tomara be-iyiya. Baxotiya barapomonae namtsebiya wawai xua Pablo iru Silas pecasebixaetsibe. ¹⁴ Ichitha pomonae pejume cowantsiwixae Jesús, Pablo itorobatsi

xua nainya peponaenexa imoxoyo mar mene beya poxonaе cataunxuae Silas iru Timoteo ecabe Berea tomaratha. ¹⁵ Pomonaе Pablo cueyabatsi barapomonaе Pablo punaxubathopatsi Atenas tomaratha. Barapomonaе equeicha caibe nawibiya Berea tomara beya. Barapomonaе Silas iru Timoteo tsipaebatsibe xua Pablo najume caruta xua bepa pinae Silas iru Timoteo nainya patopaenabe Atenas tomaratha.

Meje yabara poxonaе Pablo Atenas tomaratha popona

¹⁶ Pablo ewata, Silas iru Timoteo ewatatsibe Atenas tomaratha. Barapoxonaе barapo tomaratha Pablo tane xua barapomonaе ainya ibo nacomuñ xeina. Daxota bichocono yabara najuntu coyene exaba. ¹⁷ Daxota Pablo tsipaeba Nacom Pejume Diwesi judiomonaetha judiomonaе pia penacaetutsi botha tatsi. Matautano baxotano tsipaeba pomonaе bequein jopa judiomonaе naexanaeyo, barapomonaе Nacom wanae jaintatsi. Barichi daxita matabi pomonaе Pablo caxibeiba pomonaе nacaetuteiba tomara pin panatha barapomonaethano Pablo cuidubeiba Nacom Pejume Diwesi. ¹⁸ Barichi griegomonaе ichichipa xua pejume taewa pocotsiwa Pablo paeba. Ichamonaе griegomonaе itapeta jume cowanta pocotsiwa epicureomonaе cuiduba. Iru ichamonaе griegomonaе itapeta jume cowanta pocotsiwa estoicomonaе cuiduba. Barapomonaеbe Pablo tsipaeba. Bapoxonaе ichamonaе Pablo yabara jeichichi, jeye:

—¿Eta xua bapon naca barai tsipae, pon xua jopa juniya cueicueije tsaibiyo? jei.

Ichamonae jeye:

—Mexeya maisa bapon cueicueije pia nacomɯn nexa, jei.

Barapomonae baraxua paeba, tsipei Pablo Jesús pia pexeinya jume diwesi paeba ducuaenaebiya, mataɯtano poxoru paeba xua Jesús equeicha pinae asɯ. ¹⁹ Nexata ichamonae Pablo teicatsi pecaponaenexatsi atororotha ichaxota ba pentacaponaewi nacaetuteiba, poxonae ichauxi muxu peexaneibi. Barapo pentacaponaewi matabɯɯyo pewɯn Areópago, Pablo yainyabatsi, jeichichi:

—Pana netsipaebare bepayabara yaputaein po diwesi xua cuidubiya paeba ducuaenaebiyame. ²⁰ Xuaunxuae pana tsipaebame, barapo diwesi jopa payaputaeyino bayatha. Pata bequein yabara yaputaetsi xua po diwesi baxua yabara caunuta, jei barapomonae.

²¹ Atenas tomaramonae irɯ pomonae penanapaincha jinompaewi xua icha nacua werena peponaewi, pomonae anoxuae jinompa xote, daxita barapomonae ɯ saya pepaebeibi. Yawa saya ɯ cou paebeiba poxonae pena jume jume taiba, saya baxua paebeiba.

²² Nexata Pablo Areópago wɯn matabɯɯyo peitabaratha tatsi asiya uncuataba. Pablo namchi, jeye:

“Paxam Atenas tomaramonae pam. Bara paca cui yaputainchi xua painya nacomɯn wɯnae pajaintame. ²³ Poxonae ponan ichaxota painya nacomɯn wɯnae pajaintathopeibame tan ainya ibo

nacom matabon. Matautano tan baxota, ichaxota nacom wunae pajaintame, xua cou ichaxota pocotsiwatha xua be pexaethopaewa xua ichaxota duwei patautathopame baxua cou panta tinadutame. Baxua panamchim couje: ‘Barapo nacom xua pon jiji jopa yaputaeyo’, pajam. Xu-aunxuae cou asiya pawun dutame pon, bapon, apara pepa Nacom. Xuaunxuae po diwesi yabara paca tsipaebatsi, barapon pejume diwesi apara.

²⁴ “Barapon pon pepa Nacom, daxita barapo ira exana. Daxita carepaya jupaya exana. Barapon pon pia coya peewatsin barapo susato nacuano, yawa barapo itabocono. Po bon patsiacabeibame Nacom xua po botha jiji wunae pejaintithopeibinexa Nacom, apara ba Nacom jopa poponaeyo barapocotsi botha.
²⁵ Xua pocotsiwan jiji taexana Nacom nexa, baraxua Nacom jopa nantawenoneibiyo. Barapo Nacom saya pia coutha daxita nacata exana. Peayapusawano, naca cata. Daxita barapo petusato tutu joibo naca cata. Baxuan daxita amanaya saya nacata exana. Daxita ichauxino muxuna exanano.

²⁶ “Copiya meisa bapon Nacom compa exana pebin, bara caein. Barapo cae janatha daxita yanacua exana jiji. Daxita wunae tsiwanaeya yaputaneno poxona naexanaena daxita jiji. Matautano yaputane xua eta po weiyobetha jinompaena. Matautano yaputane xua pia iranthe bexa naexanumenaponaena. ²⁷ Icha pebin cuita cananta xeinaetsipa Nacom, bara Nacom cana exanaetsipa xua bapon bara Nacom pejume cowuntsiwa tsainchi. Nacom jopa

tajɯ ecaeyo ichitha bara waxantha imoxoyo popona. ²⁸ Nacom pepoponaexae daxota asɯ jinompatsi. Nacom naca exana, daxota beta nacuiyenabatsi, yawa daxota wacobexitha ɯ waexanae. Ichaunxuae ichin xua paca tsipaebatsi barichi painyamonaе baxua paeba pomonaе diwesi petinaewi poxonaе jei, ‘Nacom apara pia jiwichi waxainchi’, jei. ²⁹ Waxainchi Nacom pia jiwichixaetsi, daxota jopa bewa nanta xeinaetsi xua Nacom po Nacom pepa Nacom, apara jɯpa po nacomɯn jiwi exana pecobetha. Barapo nacomɯn po nacomɯn xua jiwi cana exana xua oro nainton yawa xua plata nainton yawa xua ibowan, saya jiwi pia coyene cuirutha nanta xeina xua peexanaewa barapo nacomɯn. ³⁰ Matha copiya bayatha Nacom saya beitemaya tane jiwi abe pia peexanaewan tatsi, tsipei barapomonaе jopa yabara yaputaeyo pocotsiwa Nacom ichichipa. Ichitha matapainya anoxuae daxita jiwi Nacom cui itoroba xua petsita xeinaenexatsi icha jɯntɯ coyene, xua jopa equeicha peexanaenexa abe peexanae coyene. Saya ɯ penanta xeinaenexa tsane pocotsiwa Nacom ichichipa. ³¹ Nacom matabi wɯn duta xua po mataqueitha tsane Jesús caetucaetutetsina daxita jiwi pia peitabaratha. Barapo matabitha tsane Jesús xaniwaicha yabara paebina daxita jiwi xua penatsicuentisiwa xua abe peexanaexae. Pomonaе xua abe exana itawetsinchi, pomonaе xua wɯnae exana jopa itawetsi tsainchi. Nacom itapeta, xua Jesús tsiitapetatsi barapo penacuichiwa tsipei Jesús saya xaniwaicha pepaebin. Poxonaе Nacom

Jesús asu exanatsi petupaewitha, Nacom naca tsita itapeinya xeina xua apara Jesús tsiitapetatsi barapo penacuichiwa”, jei Pablo.

³² Poxonae barapomonae Pablo jume tainchi po coyene xua equeicha petupaewi pinae asu tsaibi tsane, ichamonae Pablo jume cui caponatsi nawita. Ichamonae namchi, jeye:

—Bexa paca jume taeinchi equeicha xuaunx-uae paebame, jeichichi Pablo.

³³ Nexata Pablo cuenta ponataba barapomonae.

³⁴ Ichitha ichamonae Pablo puna poinchi yawa bapomonae Jesús jume cowuntatsi. Ichun barapomonae jiwana pewun Dionisio. Bapon Dionisio Areórago wun matabunxuyo jiwana pin. Petsiriwa powa iru napona powa iru pejume cowantsixae Jesús, bapowa pewun Dámaris. Ichamonae iru napona pomonae iruru Jesús pejume cowantsiwichi.

18

Meje yabara poxonae Pablo Corinto tomaratha popona

¹ Pirapae equeicha Pablo Atenas tomara wewarapiya. Corinto tomara bewarapiya.

² Baraxota Pablo caxina judiomonaepin, pon pewun Aquila. Bapon Ponto nacuapin. Piowa tatsi pewun Priscila. Piseuribe mexuaetha Italia nacua wewaraparenabe, tsipei pon romanomonae itorobiya pia pepa peewatsinchi pon pewun Claudio, bapon judiomonae daxita itorobatsi xua pewarapaewa tsane barapo Roma tomara weya. Daxota Corinto tomaratha patopabe. Pablo siwa pona, Aquila petsiriwano siwa poinchibe.

³ Pablo naeca Aquila pia botha tsipei bapon pia penacuichiwiyo iru xeina icha Aquila piawabe ichi. Pia penacuichiwiyo xeina xua chivo boco bouton exana. Aquila piowabe nacuitabe, iru Pablo piawa nacuita. ⁴ Daxita matabi, po matabintha pentaquei seicae matabintha Pablo poneiba judiomona pia penacaetsi botha tatsi. Baxota Pablo jume daunweya cueicueijeji pomonaetha pepa judiomonaetha iru pomonaetha jopa judiomona naexanaeyo. Pablo cueicueijeji barapomonaetha tsipei ichichipa xua barapomona Jesus pejume cowantsiwa tsainchi.

⁵ Poxona Silas iru Timoteo Macedonia nacua wepatoparenabe, barapoxona daxita matabintha Pablo cuidubeiba judiomonaetha. Pablo paeba xua pinae pon Jesus jeichichi xua apara pinae bapon apara bara Mesias, pon xua pinae barapomona pewnae ewatsixae.

⁶ Barapomona tamropata pitaba xua Pablo abe yabara paebatsi yawa tsuru jume baru paebatsi. Nexata Pablo pepatomeicha nama paparuwa nuntaba. Baxua exana poxoru barapomona anthfaetabiya jume tane. Pablo barai barapomona, jeye:

—Bara apara painya coutha icha pana natsicuentame xua daxota poxonae pawer-aweracaename. Jopa tacouthinyo xua jopa paxeinaem tsane peajuntacuiyapuswa, tsipei bayatha yabara paca tsipaebatsi barapo peajumeyapusu diwesi. Tha anoxuae Nacom Pejume Diwesi caponaetsi pomonaetha pomona jopa judiomona naexanaeyo, jei Pablo.

⁷ Barapoxona Pablo judiomona pia

penacaetutsi bo tatsi wewarapiya. Pablo pona Justo pia bo beya tatsi. Bapon Justo, icha wɔn xeina, Ticio baraichi. Bapon wɔnae pejainteibin Nacom. Bapon yabo uncuia ichaxota imoxoyo judiomonae pia penacaetutsi bo tatsi peuma werena. ⁸ Irɔ Crispo, pon judiomonae pia penacaetutsi bo peyapucauncaein, bapon piamonae matabɔxɔyo barɔ jume cowɔnta Jesús pon jiwi Pecanamataxeinaein. Barichi pinmonae pomonae Corinto tomaratha jinompa poxonae jume tane Nacom Pejume Diwesi, bapomonae irɔ jume cowɔnta Jesús. Pomonae pejume cowɔntsiwi barapomonae daxita bautisabatsi. ⁹ Baropxonae Pablo merawi camaituncua Nacom pon Pecanamataxeinaein jiwi. Pablo baraichichi, jeye: “Jopa junuwinde. Nacom Pejume Diwesi paeba ducuaenaebiyama. Jinxoba moyam. ¹⁰ Tsipei apara, xan cabarɔ popoinchi, daxota ichamonae jopa itacɔpaetsi xua abe necaexanaewa. Barapo tomarathe tamonae, pinmonae apara inta jinompa”, jei Jesús. ¹¹ Pablo baxota popona dieciocho po xometiyobe Corinto tomaratha. Baxota Pablo cuiduba ducuaenaebiya Nacom Pejume Diwesi.

¹² Irɔrɔ pebin popona pon pewɔn Galión. Bapon Galión Acaya nacuapiwi pia peyanacua ewatsinchi exanatsi. Barapoxonae judiomonae pomonae Acaya tomarapiwi nacaetuta Pablo yabara nacaetutatsi pecasebixaetsi xua pecaponaenexatsi Galión peitabaratha tatsi. ¹³ Judiomonae namchi, Galión baraichi, jeye:

—Poxonae bapon Pablo paeba ducuaenaebeiba pinmonae baraxua jume jejei tsaibi. Pablo

cuidubeiba jiwi, xua pinae jame bewa jiwi wanae jainteibi Nacom po coyene jopa jupaeyo Moisés pia peitorobi coyenewa tatsi, jei barapomonaе.

¹⁴ Pablo bara muxu pepaebi, iru Galión pae-baxoyaru. Nexata barapon namchi judiomonaе baraichi, jeye:

—Ў judiomonaе pam. Painya xoba pana tsipae-bame. Jame icha bapon caiba, icha jiton bexotsi, icha ichawiyo exana xua abe, metha jame bapoxonaе paca jume jejei tsipaetsi. Ichitha bapon jopa abe exanaeyo. ¹⁵ Saya u payabara cueicueijam tsaibi barompaya painya cui xua painya amo jiwi pia cui coyeneya tatsi. Moya baxua paxam paexande pocotsiwa Pablo payabara paebame. Tsipei jopa bepacata naexanaetsi be pon jiwi peyabara paebin xua penatsicuentsiwa xua abe peexanaexae. Moya painya coutha pacui itawere, jei Galión.

¹⁶ Bapoxonaе Galión pesato benapuna torobabiya barapo judiomonaе. ¹⁷ Bara nexata daxita judiomonaе Sóstenes waetabatsi pon judiomonaе pia penacaetutsi bo tatsi peewatsin. Barapomonaе Sóstenes butsi Galión peitabaratha tatsi. Daichitha baxua Galión saya cui tane, jopa tsita ainya cuichi.

Meje yabara poxonaе Pablo equeicha Antioquía tomara beya caibeya warapa. Baxotiya tamropata pitaba xua warapa acoibi po cuiyobetha xua pecueicueijeinexa Jesús pia pexeinya jume diwesi tatsi

¹⁸ Pablo awiya came baxota popona ainya maticabin Corinto tomaratha. Bapoxonaе nama copiya napeyaba pomonaе pejume

cowantsiwixae Jesús. Siria nacua bewarapiya weratha, po naetha po nae pin nae. Aquilano piowabe naponabe. Barapoxonae juntucuru bara ponatabichiba copiya matha nanta catepateya sibaxuba Cencrea tomaratha xua penayabara tsita itapeinya xeinaenexa xua nayabara jume cui wetsina xua exanaena xua bayatha Nacomtha nayabara tsiw_hnae muxu duta. ¹⁹ Bara Efeso tomaratha patar_hu_hpa. Baxota Pablo Aquila piseuribe xubetatsibe pia ponaetsi ichaxota judiomonae nacaetuta barompaya pia penacaetutsi botha. Baraxota Pablo bar_h cueicueijeji barapo judiomonae. ²⁰ Efeso tomarapiwi bequein Pablo apusiwatsi xua ab_h peecaewa tsane. Ichitha Pablo juntucuru jopa beecaeyo baxota ainya matababin. ²¹ Nexata Pablo napeyaba barapomonae. Pablo namchi, jeye: “Tha nama Jerusalén tomara beequiyaetsi. Tha naewatequiyaetsi xua jiwi petsinacaetutsinexa pexaewa xua penabanaewa. Metha equeicha paca taeyoparenaeinchi icha Nacom metha new_hnae ichipaena”, jei Pablo.

—Bara warapataba Pablo. Efeso tomara wewarapiya jeratha po naetha po nae pin nae. ²² Poxonae Cesarea tomaratha patopa Jerusalén tomara be-iyá, pia jacobichi pomonae Jesús pejume cowantsiwichi. Bapoxonae equeicha Antioquía tomara bewarapiya. ²³ Poxonae bara juntucuru yaainya merawin jopa baxotiya equeicha icha nacuabe bewarapiya. Galacia nacua bewarapiyano. Frigia nacua bewarapiyano. Baxota Jesús pejume diwesi cuiduba Pablo pomonaetha pomonae Jesús

pejume cowantsiwi. Pablo juntu coyene tsacaba xua barapomonaē ajuntayapusya pejume cowantaponaewa tsane Jesús.

Meje yabara poxonaē Apolos Nacom Pejume Diwesi cueicueijeī Efeso tomaratha

²⁴ Caein judiomonaē jiwanapin Efeso tomaratha patopa. Bapon pewun Apolos. Bapon seicaya iru Alejandría tomarapin. Bapon Nacom Pejume Diwesi peyaputaēin yawa beta cacueicueijeī barapo diwesi. ²⁵ Apolos beta yabara cuidubatsi ichamonaē xua Jesús, pon Pecanamataxeinaēin jiwi, pia cui. Juntu coyene weiweinaya paeba. Xaniwaicha piamonaē cuiduba Jesús yabara bequein saya yaputane xua po coyene pinaē Juan pebautisabiwa jiwi xua icha juntu coyene pexeinaenexa Nacomtha. ²⁶ Apolos judiomonaē pia penacaetutsi botha tatsi bichocono juntu coyene wanaeya cueicueijeī Nacom Pejume Diwesi. Priscila, Aquila piowabe jume tanebe bapon. Wababe bapon, pia bo becayabe. Aquila, Priscila pia pebinbe yabara muxu tsidutabe icha diwesi xua Nacom pia pepa diwesi po diwesi xua jopa yaputaeyo. ²⁷ Apolos ichichipa xua peponaewa Acaya nacua beya. Bapoxonaē pomonaē pejume cowantsiwixae Jesús, Apolos canatsiwana tinaxotsi carta xua tatinatsi pomonaē pejume cowantsiwixae Jesús. Daxota barapomonaē tatina xua Apolos pententa weiweinaya wabinexatsi. Poxonaē Apolos patopa Acaya nacuatha, bapon yawena pomonaetha pomonaē bayatha Nacom jume cowantatsi pomonaē Nacom peantobexae. ²⁸ Apolos

daxita jiwi peitabaratha jume amanayaba poxonae Jesús beta yabara paebatsi. Daxota barapomonae judiomonae jopa itacupaetsi xua pejume notsiwatsi bapon po coyene xua poxonae bapon abe pepaebiwa. Poxonae Apolos yoroba Nacom Pejume Diwesi bapon tsita itapeinya xeina xua Jesús apara Mesías pon Nacom itorobica.

19

Meje yabara poxonae Pablo Efeso tomaratha popona

¹ Poxonae Apolos Corinto tomaratha eca, bapoxonae iru Pablo seicaya ducuanabiya daxita tomanan jupaya, po tomanantha ichaxota atororon. Efeso tomaratha patopa, baxota Pablo caxina ichamonae pomonae Cristo pejume cowantsiwichi. ² Pablo yainyaba barapomonae, jeye:

—¿Bayatha Nacom pia Pejumope tɨnaxɨ tatsi painya jɨntɨ coyenetha pacata pata poxonae pajume cowantame Jesús? jei.

Barapomonae Pablo jume notatsi, jeye:

—Jume, jopa payaputaeinyo. ¿Eta pocotsiwara xua Nacom pia Pejumope tɨnaxɨ tatsi? Bayatha jopa payabara jume taeinyo baxua, jei.

³ Pablo yainyaba, jeye:

—¿Eta pabichim poxonae pajume cowantame poxonae paca bautisaba? jei.

Pablo jume notatsi, jeye:

—Apara saya payabara jume cowantan xua Juan cuiduba, po coyene xua Juan itorobatsi xua jiwi pebautisabiwatsi, jei.

⁴ Pablo jume nota, jeye:

—Aja, Juan bautisaba pomonaetha pomonae abe pia peexanae cuiru coyenein nacui barapenta xua pomonae pejume cowantsiwichi Nacom. Daxota metha Juan piamonaetha barai: ‘Pajume cowunde pon xua tsiwana patopan’, jei Juan piamonaetha. Xua Juan namchi: ‘Pon xua tsiwana patopan’, jei, bapon apara Jesús, pon ‘Mesías’ baraichi, jei Pablo.

⁵ Poxonae baraxua Pablo jume taerucupatsi, caena barapomonae bautisabatsi Jesús pia pewantha tatsi pon Pecanamataxeinaein jiwi.

⁶ Poxonae Pablo barapomonae pecobetha mata jayaba, barapoxonae barapon Nacom pia Pejumope tñaxu tatsi barapomonae tapatatsi pejantu coyeneintha, yawa cueicueijei exanebatsi icha jumeintha xua ichamonae pia jume tatsi. Matautano barapoxonae barapomonae cueicueijei Nacom Pejume Diwesi pocotsiwa Nacom yaputane exana. ⁷ Daxita barapomonae pomonae baxota ena doce pomonae matabuxuyobe pomonae xua Jesús pejume cowantsixaetsi.

⁸ Baxota Efeso tomaratha, Pablo judiomonae pia penacaetutsi botha tatsi poneiba acoibi po xometiyoBetha Nacom Pejume Diwesi pecueicueijeiwanexa. Bapon jopa junuwiyo poxonae cueicueijei. Matautano yabara tsipaeba po coyene Nacom waba jiwi petanaexanaenexatsi piamonae tatsi pomonae itorobiya peewatsixae.

⁹ Ichitha ichamonae aichaxaibi jume tane. Jopa juntucuru bejume cowantsiyo. Saya barapomonae jiwi peitatha tatsi abe yabara paeba Jesús pia pena pecuidubiwa tatsi. Nexata

barapomonae pia xainya weya tatsi Pablo napitaba. Saya meisa baru pona pomonae Jesús pejume cowantsiwichi po bo penacuidubi bo beya. Pebin pon pewun Tirano barapo bo, bapon pia bo tatsi. Barapo botha Pablo daxita matakabi Nacom Pejume Diwesi cuidubeiba. ¹⁰ Baraxota Pablo ainya weibe paeba ducuaebiya Nacom Pejume Diwesi. Daxita pomonae Asia nacuapiwi judiomonae iru pomonae jopa judiomonae naexanaeyo barapomonae jume cowanta Jesús pia pexeinya jume diwesi tatsi, pon Pecanamataxeinaein jiwi. ¹¹ Nacom Pablo yawenatsi xua pexeinya petsita itatsi coyenewan exana Nacom pia peayapusuwatha tatsi. ¹² Ichamonae paparuwan yawa painyaweran capona Pablo beya xua barapo paparuwantha Pablo peperu jayababinexatsi. Barapo paparuwan nata capona peatene jiwitha. Bapoxonae barapo paparuwantha nainya axaibi tsouneibi. Iru pomonae cauri xeina barapo paparuwantha nacapanenebiya tsaibi. Barapomonae cauri wepu poneibatsi.

¹³ Ichamonae judiomonae, pomonae saya peji-nompaewi, barapomonae pia cui xeina xua jiwi taitaweteibatsi cauri. Barapomonae ichichipa Jesús wun wun taibatsi poxonae itaweta cauri. Barapomonae caurimonae baraichi, jeye: “¡Bara Jesús pewantha paca itawetatsi, pon Pecanamataxeinaein jiwi, xua pon Pablo wun yopita ducuaebiya!” jei barapomonae.

¹⁴ Iru barapoxonaeru judiomonaepin pon pewun Esceva, xeina siete poyobe tatsi pebiwi. Barichi barapo siete poyobe wun wun

taibatsi Jesús, poxonae itaweta cauri. Esceva sacerdotemonaē pia pentacaponae wi jiwana tatsi. ¹⁵ Poxonae barapomonaē paeba barapo w_untha, Jesús pe w_untha tatsi, barapomonaē jume notatsi cauri, jeye: “Bara tayaputaēin Jesús, Pablono bara yaputanno. ¿Incane paxamda? ¿Jintam pamda?” jei bapon cauri.

¹⁶ Bapoxonaē barapo siete poyobe pexainya betanaxorenatsi pon cauri xeina. Barapomonaē bu_utsi. Matau_utano barapomonaē jopa nacuiyenabiyo. Barapo siete poyobe daxita tamasa jebompatsi yawa wan dubatsi. Bo bejumasa du_ucupiya. ¹⁷ Pomonaē Efeso tomaratha peenaewi, judiomonaē, iru_u pomonaē jopa judiomonaē naexanaeyo, daxita bapomonaē jume tane xua siete poyobe jumasa du_ucupa. Barapomonaē junuwa bichocono. Daxota barapomonaē Jesús pon Pecanamataxeinaēin jiwi w_unaē jaintatsi.

¹⁸ Pomonaē Jesús jume cow_untatsi pinmonaē barapomonaē jiwana baxota pata. Barapomonaē jiwi peitu_utha tatsi paeba xua bepa pinae bayatha abe exana poxonaē mara coyeneya exana nawita. ¹⁹ Pomonaē Jesús pejume diwesi coyene nacuiduba, barapomonaē carendena diboron po diboron xua mara yabara penacuidubiwan. Barapo diboron tauteba. Poxonaē barapo diboron tauteba daxita nataeumena. Barapomonaē yabara matoma ununa xua pinae barapo diboron matoma nawita, cincuenta mil po paratiximonaēbe pinae nantomata. ²⁰ Barapoxonaē pin bicheito jume cow_unta Jesús, pon Pecanamataxeinaēin

jiwi. Yawa barapomonaе tsita itapeinya xeina dubenanaebiya xua bara Nacom apara xeina peayapusu itorobi coyenewa.

²¹ Poxonaе baxua weta Pablo najuntu coyene weta xua pesiwa ponaewa tsane tomaran xua Macedonia nacuatha, yawa xua Acaya nacuathano xua bapoxonaе Jerusalén tomara bepewarapiyaenexa. Nanta xeinano xua peponaewa tsane Roma tomara beya.

²² Ponbe Pablo yawenatsi, Timoteono Erastono, baponbe Pablo Macedonia nacua beitorobiyabe. Cataunxuae abu bapon Pablo Asia nacuatha eca.

Meje yabara poxonaе jiwi namtsebiya wawai Efeso tomaratha Pablo pecasebixaetsi

²³ Barapoxonaе Efeso tomarapiwi anaya anaepanaeya najume cayayataxuba poxoru aichaxaibi xua pejume taewa xua Pablo yabara cueicueijei Jesús pia pena pecuidubiwa tatsi.

²⁴ Pon xua abe penajume cayayataxubin xua poxonaе namtsebiya wawai bapon pewun Demetrio. Bapon pinmonaе xeina pomonaе petanacuichiwichi xua petaexanaewichi penainwixi. Barapomonaе Demetrio taexanatsi tsiqui penain boxi xua Artemisa pia bo canaxobeba. Artemisa Efeso tomarapiwi pia nacomwa tatsi. Barapowa jopa be pepa nacomio.

²⁵ Bapon Demetrio pia petanacuichiwichi waba. Pomonaе iru Artemisa pia penain boxi peexanaewi wabatsino. Demetrio namchi daxita barapomonaetha, jeye: “Bara metha payaputaneme xua paratixi xeinatsi poxoru Artemisa pia penain boxi exanatsi

wacaenaetsinexatsi, daxota xeinatsi paratixi.
²⁶ Pon pataneme yawa pajume tanemeno, barapon Pablo. Bapon paeba ducuaenaebiya xua pinae pomonae icha nacom canaetsiya exana apara pinae xapain jopa daxua pepa nacomiyo. Pomonae Pablo cuidubeiba jume jejei tsaibichi ayei jiwi Efeso tomarathano, Asia nacuathanor_u jume jejei pinmonae.
²⁷ Baxua bichocono nacata abe, tsipei icha jiwi jopa comocaetsipae barapo penain boxi xua waxainchi exaneibatsi bapoxonae jopa xeinaetsipaetsi paratixi. Jiwi namchi tsane: ‘Artemisa pia pin bo tatsi abe. Xapain jopa pepa Nacom pin pia boyo’, jei tsane. Cataunxuae anoxuae barapo jiwi Asia nacuapiwi ir_u daxita nacuanpiwi Artemisa w_unae jainteibatsi. Ichitha icha jume cow_untsинchi Pablo, metha equeicha jopa bew_unae jainteibichipaetsi Artemisa”, jei Demetrio.

²⁸ Poxonae baxua Demetrio jume taer_uc_upatsi, anaepanar_uc_upa barapomonae. Yawa barapomonae namtsebiya wawai, jeye: “¡Maisa Artemisa powa pata tanecanamataxeinaewa, barapowa bichocono pej_unt_u coyene xanepanaewa! ¡Maisa Efesiomonae pan Artemisa w_unae pajaintan!” jei barapomonae.

²⁹ Barapoxonae daxita tomarapiwi j_upaya anaepana. Gayo ir_u Aristarco, ponbe Macedonia nacuapinbe, ponbe Pablo pepuna ponaexatsibe, baraponbe waetabatsibe. Po botha ichaxota jiwi nacaetuteiba pecueicueijeinexa tsaibi tsane bara bemax_u cayatsibe. ³⁰ Bepa bequein Pablo najoniyaei barapo botha, petsipaebinexa

tsane barapomonae, ichitha Jesús pejume cowantsiwichi Pablo jopa pu copatichi.

³¹ Barichi pomonae pentacaponae wi jiwana Asia nacuatha, barapomonae Pablo pia jiw tatsi cou tana cajume caitorobatsi xua bepa pinae Pablo jopa najoniyae tsane baxota.

³² Barapoxonae barapo penacaetutswatha, ichamonae icha caununaya wawai iru ichamonae icha caununaya wawai. Daxita barapomonae najume cayayataxubiya wawai. Ichamonae jopa yaputaeyo po coyene xua barapomonae yabara nacaetuta.

³³ Barapo penacaetutswimonae anaepana. Pablo yabara anaepanatsi iru pijimonae tatsi tayabara anaepanatsi. Daxota judiomonae caemonae najiwana napuna totabiya pebin xua bapon peitabaratha peuncuaenexa barapo penacaetutswatha.

Bapon pewan Alejandro. Bapon pecobetha jume matawenta tsipei ichichipa bequein yabara jume yawena judiomonae barompaya piamonae.

³⁴ Poxonae barapomonae Alejandro yaitaerucupatsi xua Alejandro judiomonaepin, barapoxonae equeicha daxita namtsebiya wawai tsompae ainya horabe. Barapomonae namchi, jeye: “¡Maisa pata tanecanamataxeinaewa Artemisa! ¡Maisa barapowa pejuntu coyene xanepanaewa! ¡Maisa efesiomonae pan Artemisa wunae pajaintan!” jei barapomonae.

³⁵ Nexata, pon xua tomara peewatsin, bapon uncu barapo penacaetutswi itabaratha. Bapon jume matawenta xua equeicha jopa penamtsebiya wawainexa tsane barapomonae. Bapoxonae bapon namchi, jeye: “Pomonae

Efeso tomaramonae pam. Bara daxita nacuamonaepiwi naca yaputane xua waxainchi notatsi Artemisa pin pia bo tatsi. Matautano yaputane xua waxainchi botatsi po iboto xua athawe jopeica. Barapo iboto apara bara Artemisa tsipei be Artemisa pia pawī. ³⁶ Jiton dapocotsin aibi pon xua nejume barai xua naeraban, daxota saya iru moya pande. Painya xoba ichawa pananta xeiname poxonaē jopa beta pananta xeinaem. ³⁷ Ponbe, Gayo iru Aristarco, ponbe pacarendename, baponbe jopa abe paebiyobe. Baponbe jopa caibiyobe xua xoyo boca Artemisa pin pia botha tatsi. Matautano Artemisa nacomwa jopa cui aebiyobe. ³⁸ Icha Demetrio iru petanacuichiwichi nanta xeina xua ichamonae Demetriobaru abe taexainchi moya jame barapomonae bewa ponaena po bo ichaxota ena pomonae jiwi peyabara paebiwi xua penatsicuentsiwa xua abe peexanaexae. Bapoxonae barapomonae itacupatsi xua petsipaebiwa pomonaetha pomonae tomara pentacaponae wi po coyene xua ichamonae abe exana barapomonaetha. ³⁹ Icha ichawa painya paebichi abu anoxuae jopa papaebinde. Po mataqueitha poxonaē pentacaponae wi ba nacaetuta pejume taenexa xua jiwi paeba bapoxonae jame papaebare. ⁴⁰ Wanamtsebiya wawaijeixae anoxuae daxota romanomonae naca yabara anaepanaena tsipei nanta xeinaena xua waxainchi aichaxaibichi xua barapomonae naca itoroba. Jopa xeinaetsi po diwese xua yabara tsipaebinchi barapomonaetha pocotsiwa xua yabara namtsebiya wawaichi”, jei tomara

peewatsin. ⁴¹ Poxonae najume wetaba baxua, barapomonae pesato beitorobiyatsi.

20

Meje yabara poxonae Pablo siwa pona Macedonia nacua, Grecia nacuano

¹ Bara najume wetarucupa daxita poxonae namtsebiya wawai tsompae. Bapoxonae Pablo waba pomonae Jesús pejume cowantsiwichi pebaru nacaetutsinexa. Barapomonaetha Pablo yabara tsipaeba Jesús pejume diwesi xua barapomonae peajuntuyapusuya xanepanaya pejinompaenexa tsane Nacomtha. Bapoxonae Pablo barapomonae napeyaba. Macedonia nacua bewarapiya. ² Daxita barapo tomaran, Pablo siwa pona barapo Macedonia nacuatha, cuidubano pomonaetha pomonae Jesús pejume cowantsiwichi, xua peajuntuyapusuya xanepanaya tajinompaenexa tsainchi Nacomtha. Poxonae nacui wetaba equeicha Grecia nacua bepatopiya. ³ Baraxota Pablo acoibi po xometiyobe yapucaewa. Bara juntucuru Siria nacua beya warapa jeratha po nae pin naetha. Bapoxonae jume tane xua pinae judiomonae anaepana xua Pablo bexubapaebatsi. Daxota Pablo najuntu cui weta xua caibeya peponaewa tsane petaxutha Macedonia nacua beya. ⁴ Pablo yanabatsi ichamonae. Iru ichun napona bapon pewan Sópater, pon Berea tomarapin, pon Pirro pexanto tatsi. Iru ichunbe naponabe baponbe pewanbe Aristarco iru Segundo, baponbe Tesalónica tomarapinbe. Iru ichun napona, bapon pewan Gayo, Derbe tomarapin. Iru ichun napona,

bapon pewan Timoteo. Iru ichanbe naponabe, ponbe pewanbe Tíquico iru Trófimo, baraponbe Asia nacuapinbe. ⁵ Barapomonae daxita pana netsiwana nantacapon, Troas tomaratha cou baxota pana ewata. ⁶ Ichitha Filipos tomara weya pawarapan jeratha, po naetha po nae pin nae poxonae weta Pascua wan matabin. Barapo Pascua matabintha jivi xane pan xua pocotsiwa jopa cotowiyo. Poxonae cinco po matabibe caewa papatan Troas tomaratha, baxota barapomonae pacaxiban. Baraxota paenan siete po matabibe.

Meje yabara poxonae Pablo Troas tomara siwa pona

⁷ Pentaquei seicae matabitha, domingotha, pana nacaetutan, pata epanantarabi janacaenexa tsane pan. Pablo cuiduba pomonae Jesús pejume cowantsiwichi, tsipei baya warapaena Pablo. Daxota poxonae cueicueijeji beya yapapae. ⁸ Po tutu athabeicha barapo tututheicha pana nacaetutan. Barapo tututha ainya coichan dubena. ⁹ Pewowindu pewan Eutico, barapoyo bomuxu tututha ventanatha pemuxuburutha eca. Pablo bayiyo tsuxubi xua Nacom Pejume Diwesi cueicueijeji. Barapoxonae Eutico nantacotiya maitecataba. Tajw wejopeica. Po tututha Pablo cueicueijeji tsuncuae xua ichaxota acoibi tututheicha barapo tutu wejopeica. Eutico petupaeyo pitatsi. ¹⁰ Bara nexata Pablo dunatabica. Pablo Eutico caquita ecatsi pentabocototha. Pablo naisa cateita waetaba. Piamonae barai Pablo, jeye:

—Jopa pajunuwinde, bara apara asu, jei.

¹¹ Nexata Pablo equeicha caibe juinya. Pan epa janaxuba, yawa xane. Barapoxonae equeicha Pablo matowa cueicueijeji Nacom Pejume Diwesi, beya yajume pentha tsina. Bapoxonae weta. Bara cou nama matabi wanae tsuxubiba Pablo warapa. ¹² Barapo pewowin Eutico equeicha bara asu. Eutico piamonae bo becaiyatsi. Daxita saya juntu coyene tsacabatsi xua junte ma jinompa xua equeicha Eutico peasaxae.

Meje yabara poxonae Pablo jeratha Troas tomara wewarapiya po naetha po nae pin nae xua Mileto tomara bewarapiya

¹³ Paxan copiya jeratha paponan weratha Aso tomara beya tsipei yaitama Pablo pana itoroba xua bepa pinae weratha paponaein. Bapon yaitama bepa petaxutha ponaei. Bara xotiya, Aso tomaratha paichichipan payapitan Pablo. ¹⁴ Poxonae Pablo Aso tomaratha pacaxibarucupan, bapon equeicha pana yantaba. Mitilene tomara beya pawarapan. ¹⁵ Mitilene tomara wewarapiyan. Bapoxonae icha matabitha imoxoyo Quío tunaetha papatan icha muxunenetha. Baraxota caentacabitha paenan. Equeicha icha matabitha Samos tunaetha papatan. Barapoxonae equeicha icha matabitha Mileto tomaratha papatan. ¹⁶ Baxua Pablo exana tsipei bapon nanta xeina xua jopa beecaeyo ainya matabin Asia nacuatha. Bapon aichaxaibi pona Efeso tomaratha. Ichichipa Jerusalén tomara beya bichoina peponaewa tsane, tsipei imoxoyo bara Pentecostés matabi tsane, icha bara pecui jupaenexatsi.

*Meje yabara poxonae Pablo tsipaeba penapatae
jiwi Efeso tomaratha*

¹⁷ Pablo Mileto tomaratha eca. Pablo najume caitoroba ichamonae xua Efeso tomaramonae pitiri jiwi pewabinexatsi pomonae Jesús pejume cowantsiwichi, xua Mileto tomaratha pepatsinexa. ¹⁸ Poxonae Efeso tomarapiwi, penapatae jiwi pata baxota, Pablo barai, jeye: “Bara paxam payaputaneme xua wɔnae poponan poxonae copiya patopan Asia nacuatha painya xantha. Awiya cataunxuae barichin wɔnae poponan. ¹⁹ Daxita matabi Jesús pejume diwesi cueicueijan tsaibi. Jopa bichocono atsaca tsaibinyo. Jume wɔnaeya natsipaeban saya. Poxonae Nacom pon jiwi Pecanamataxeinaein pejume diwesi cueicueijan, bichocono yaitawanaeya cueicueijan yawa nejume yancababeiba judiomonae yawa bepa nejutebeibi. ²⁰ Paxam payaputaneme xua jopa nacui baraxubinyo xua tapaca tsipaebiwatsi Jesús pejume diwesi xua po coyene painya nepaca yawenaewa tsane. Paca cuidubatsi jiwi peitabaratha tatsi. Matautano painya boxithano paca cuidubatsi. ²¹ Judiomonae jume daunweya cuiduban. Iruru pomonae jopa judiomonae naexanaeyo jume daunweya cuiduban xua barapomonae bewa icha juntu coyene pexeinaenexa Nacomtha xuano pejume cowantsinexatsi Jesús pon Wanacanamataxeinaein. ²² Nacom pia Pejumope tɔnaxu tatsi neitoroba xua bewa ponaetsipanjei Jerusalén tomara beya. Ichitha jopa nayaputaeyo pocotsiwa xua baxotiya

tsane ichamonae inta exanaena. ²³ Jame anoxuae saya meisa yaputan xua Nacom pia Pejumope t̄nax̄u tatsi yabara netsipaeba xua daxita tomaran ichaxota pateibin. Nebarai, jeye: ‘Jiwi pec̄ubi bontha cajebeibina, yawa caperaxa exaneibinano’, nejei Nacom pia Pejumope t̄nax̄u tatsi. ²⁴ Juntucuru xua icha t̄pan, baraxua jopa netsita ainya cuiyo. Bara jemba tsane icha saya poponaein. Icha t̄pan, bara jemba tsane. Daxota neitac̄pa xua j̄nt̄u coyene weiweinaya exanaein pocotsiwa Jesús neitoroba beya yacuiya t̄pajopaein. Matautano daxota neitac̄pa xua wetsin pocotsiwa Jesús neitoroba, pon Pecanamataxeinaeinchi jiwi, xua tapaca tsipaebiwatsi barapo pexeinya jume diwesi po coyene xua bichocono jiwi peantobewatsi Nacom.

²⁵ “Bayatha paca tsipaebatsi Nacom Pejume Diwesi po diwesi yabara xua Nacom waba jiwi, petanaexanaenexa tsainchi pijimonae jiwana tatsi pomonae itorobiya peewatsixae. Anoxuae bara xaniwaicha yaputan paxam pomonae pamxaem xua paca tsipaebatsi barapo diwesi, equeicha jopa pana netaem tsane. ²⁶ Daxota anoxuae paca tsipaebatsi icha jopa pajume cow̄ntsim, baraxua apara jopa tacoyiyo. Bara apara painya coyam tsipei bayatha bequein matowa paca tsipaebeibatsi pexeinya jume diwesi. ²⁷ Daxita xua Nacom neitoroba barapo diwesi omeicha paca tsipaebatsi. Jopa icha diwesiyo copatsinyo. ²⁸ Painya coutha xanepanaya pana naj̄nt̄u coyene yabara nanta xeinare. Matautano xaniwaicha payapu eenare pomonae Jesús pejume cow̄ntsiwichi. Paxam

pitiri jiwi pam, baxua paexande tsipei Nacom pia Pejumope t̄anax̄ tatsi paca itoroba painya neyapu cainompaenexa tsane Jesús pejume cow̄antsiwi tatsi. Matautano baxua paexande tsipei barapomonae Nacom piamonae tatsi, tsipei pexanto tatsi tsit̄upa xua barapomonae jopa peweraweracaewa tsane. ²⁹ Yaputan poxonae warapaein tacoutha patsina ichamonae. Barapomonae Jesús pejume cow̄antsiwichi abe exanaeinchi. Barapomonae Jesús pejume cow̄antsiwichi d̄ac̄upa exanetinchi icha neuth̄u ichi. ³⁰ Barichi painya jiwi jiwanamonae ajumebeya cuidubina xua jopa xainyeyo. Barapomonae cuidubina penaerabi diwesi, xua pomonae Jesús pejume cow̄antsiwichi pejume cow̄antsinexa barapo penaerabi diwesi. ³¹ Dota pam, xua peabe jume, painya nejume cow̄antsiwa. Pana necui yabara nanta xeinare xua paca cuidubatsi acoibi po weiyobe. Paca cuidubatsi merawithano, mataqueithano. Matautano paca siwa wecoyeichi ichacuitha.

³² “Tamonae pam, Nacomtha pacata tsipaebatsi xua paca necayawenaewa tsane, xuano xua Nacom Pejume Diwesi painya necayawenaenexa po diwesi xua paca cuiduba xua pinae Nacom paca antobe. Barapo Nacom Pejume Diwesi peayap̄us̄wa xeina xua aj̄unt̄ayap̄us̄ya paca cana exanapona. Matautano paca catsina daxita pocot̄siwa bayatha pepa piamonaetha yabara tsiw̄nae muxu duta xua catsiba paeba. ³³ Jopa taichichi tsaibinyo xua ich̄n̄n pia paratixi tatsi matautano xua ich̄n̄n pia paparuwan tatsi. ³⁴ Jame bara payaputaneme xua tacoutha natsiyabara nacui-

tan. Bara tawa comotan. Matautano xua pexaewa comotan, paparuwano. Matautano yawenan pomonae xua necueyaba. ³⁵ Bayatha payaputaneme xua daunweya nacuitan. Baxua exanan tsipei ichichipan xua painya neyaputaewa tsane, xua painya neyawenaenexa pomonae peacopeibi jiwi. Jopa pajuntemainaeinde xua Jesús pon Pecanamataxeinaein jiwi namchi, xua jeye: ‘Ba juntu coyene weiweina bichocono pon cata beyacaincha xua pon pecatsixaetsi’, jei Jesús”, jei Pablo.

³⁶ Poxonae Pablo najume wetsiya paeba, poxonae xua pitiri jiwi tsipaebatsi, bapoxonae pentabocototha uncua. Pablo daxita baru tsipaeba Nacomtha. ³⁷ Barapoxonae daxita matowa wecoyei. Yawano matowa naisa teicatsino Pablo poxonae tsutsubatsi, peantobexaetsi. ³⁸ Barapomonae bichocono wecoyei tsipei Pablo bayatha namchi, jeye: “Equeicha jopa pana netaem tsane”, jei. Barapoxonae barapomonae Pablo jera bepuna tayathopiyatsi po naetha po nae pin nae.

21

Meje yabara poxonae Pablo weratha Jerusalén tomara bewarapiya po naetha po nae pin nae

¹ Poxonae Jesús pejume cowantsiwichi pacuenta ponan, barapoxonae Cos tomara bepawarapiyan weratha. Barapoxonae icha matabitha Rodas tomara bepapiyan weratha. Barapoxonae equeicha icha matabitha Pátara tomara bepawarapiyan weratha.

² Pátara tomaratha baxota equeicha icha nae

panotar_{uc}pan. Fenicia tomara bepawarapiyan.
³ Poxonae Chipre tunaeto patan pamatawacaicha toqueban. Barapo tunaeto pata tatsocona iya paxenta iyian. Siria nacua bepaiyan. Barapo nae Tiro tomaratha botouna, pejotsinexa tsane xua capona. Tiro tomaratha paxubar_{uc}pan barapo nae. Baxota painompanno. ⁴ Baraxota Tiro tomaratha pacaxibar_{uc}pan pomonae Jesús pejume cow_{unt}siwichi. Barapomonae pia xantha tatsi pajinompan siete po merawiyobe. Barapomonae Pablo tsipaebatsi, jeichichi: “Jopa Jerusalén tomara beya ponaeinde”, jeichichi. Nacom pia Pejumope t_{unax} tatsi barapomonae yabara tsiwanaya tsipaebatsi po coyene xua ichamonae Pablo cana exanaeinchi barapo tomaratha. ⁵ Poxonae barapo siete merawiyobe payapucaewan paponar_{uc}pan. Daxita pomonae Jesús pejume cow_{unt}siwichi, tomara weya pana nepu taeumenathopiya yab_{ux}ino pexuino. Taetabo mene itapa bepaiyan. Baraxota pentabocototha paumenan. Nacom patsipaeban.
⁶ Pana napeyaban barapomonae, pana naisa teica pata taneantobexae. Bapoxonae equeicha jera panotar_{uc}pan, barapomonae equeicha pia boxi benawibiya.

⁷ Bara papanenebiyan ts_{ur}uc_{pa}e xua Tiro tomara weya paponan. Tolemaida tomara beya papanenebiyan. Baxota equeicha pajacoban pomonae Jesús pejume cow_{unt}siwichi. Caentacabitha baxota pajinompan. ⁸ Icha matabitha, Pablono yawa xua pomonae pata tacueyabixae pan Cesarea tomaratha papatan. Barapo tomaratha Felipe pia bo tatsi bepaiyan.

Bapon Nacom Pejume Diwesi pecueicueijeji ducuaenaebiyae jiton. Bapon jiwana pomonae siete poyobe pomonae peyawenae jiwi. Barapo siete poyobe, matha cain itapetatsi Jerusalén tomaratha xua Jesús pia peitorobi jiwi tatsi peyawenaenexatsi. Barapon pia xantha tatsi paenan. ⁹ Felipe cuatro po pexantiyobe tatsi xeina. Barapowaxi cataunxuae jopa jitha enaeyo. Barapowaxi tsipaeba jiwi Nacom Pejume Diwesi xua Nacom yaputane exana. ¹⁰ Baxota caentacabiyobe paenan Cesarea tomaratha. Barapoxonae Judea nacuapin patopa, pon Nacom pia peitorobi pepaebin, pon pewun Agabo. ¹¹ Agabo pana nesiwa pona. Pablo coreinya bocoto mara wejontatsi. Barapo coreinya bocototha petaxuno, pemaxuno Agabo pia coutha nacaecunta cubaxuba. Bapoxonae Agabo namchi, jeye:

—Bayatha Nacom pia Pejumope tñaxu tatsi netsipaeba po coyene xua judiomonae exanaena Jerusalén tomaratha. Bepa pinae barapomonae caiche tsane pon xua pia bocoto pexeinaein pocotsi bocote, ichaunxuae naichin, bara juta caichi tsane pinae. Matautano bepa pinae barapomonae cacaponae pomonaetha pomonae penanapaincha jinompaewi xua icha nacua werena peponaewi, jei Agabo.

¹² Poxonae baxua pajume tan, paxan iru pomonae Cesarea tomarapiwi Pablo pabaran, pajanje:

—Bara, jinxoba poname Jerusalén tomara beya, pajan.

¹³ Ichitha Pablo pana jume nota, jeye:

—¿Eta xua metha pana siwa wecoyam? ¿Eta xua metha pana itanuwe forotame? Bara bayatha nacui yabara jume wetan tanecabinexa tsane, matautano tatupaenexa tsane Jerusalén tomaratha tajume cowantsixae Jesús, pon jiwi Pecanamataxeinaein, jei Pablo.

¹⁴ Bequein Pablo jume daunweya pabaran xua jopa ponae tsane ichitha Pablo dapo jumetha bepa ponaei. Matapainya saya jopa equeicha pata jumeyo. Matautano pajan:

—Basaya moya baxua exanaena be pocotsi coyeneya xua Nacom ichichipa, pajan.

¹⁵ Bapoxonae poxonae pana jume wetan baxua, bara nama paxainxainyan. Bapoxonae Jerusalén tomara bepawarapiyan. ¹⁶ Ichamonae Cesarea tomarapiwi, pomonae Jesús pejume cowantsiwichi pana nepuna pona. Pana capona bo beya pata tajinompaenexa tsane, pebin pon pewan Mnasón, bapon pia bo beya tatsi. Bapon Mnasón Chipre tunaetopin. Bapon pinae caena bayatha jume cowanta Jesús.

Meje yabara poxonae Pablo, Santiago siwa poinchi

¹⁷ Poxonae Jerusalén tomaratha papatan, baxota pomonae Jesús pejume cowantsiwichi weiweinyaya pana matenta waba bichocono.

¹⁸ Icha matabitha Pablo pana nebaru pona. Pasiwa ponan Santiago. Baraxota iru daxita pitiri jiwi jinomparu. ¹⁹ Barapomonae Pablo jacobae. Bapoxonae tsiwiyo bexa Pablo tsipaeba daxita po coyene xua Nacom exana pomonaetha pomonae jopa judiomonae naexanaeyo. Yawano

paeba po coyene Pablo itorobatsi Nacom, xua petacaponae nexa Nacom Pejume Diwesi tatsi. ²⁰ Poxonae jume tane baxua xua Pablo paeba, barapoxonae barapomonae Nacom w_{nae} jaintatsi. Nexata Santiago Pablo baraichi, jeye:

—Taema, incane jume taema. Judiomonae pin bicheiton tsoponae, pomonae bayatha Jesús jume cow_{ant}tatsi. Daxita barapomonae namuxutainyaba xua pinae daxita jiwi nantawenona xua Moisés pia peitorobi coyene exanapona. ²¹ Cayopita ichamonae xua pinae cuidubame judiomonae pomonae icha nacuantha pejinompaewi. Pinae cuidubame xua equeicha pinae barapomonae bewa jopa yabara jume cui exanae pocotsiwa bayatha Moisés itoroba. Matautano pinae cuidubame barapomonae xua pinae jopa bewa penawi thabi coyene exanae tsane xua pewi thabiwa pia pexui ichaxota nareixacaena xua ichaxota pebiwixae xeina. Matautano pinae cuidubame xua barapomonae bewa jopa exanae barapo peitorobi coyewan xua pinae pocotsiwa wamo jiwi bayatha exaneiba. ²² ¿Eta xua waxainchi exanaeinchi? Tsipei judiomonae, pomonae pejume cow_{ant}siwi Jesús, nacaetutsina xote barapo Jerusalén tomarathe, poxonae jume taena xua patopame. ²³ Paxan xua paca itorobatsi baxua exande. Taema xote pata xantha cuatro poyobe poponabe pebiwi. Barapoyobe yabara nacui w_{nae} tsijume dutabe Nacomtha pocotsiwa xua exanapaeba. Anoxuae baxua barapomonae bewa exanae pocotsiwa bayatha exanapaeba. ²⁴ Barapomonae matakayande paratixi nanacui

barũ nantomare sacerdotemonaepintha, xam nexano irũ barapomonaexano xua jopa painya nenajũntũ coyene taxobinexa. Nanacui barũ nantomare, barapoyobe penanta catepateya sibapentsinexa tsane. Icha baxua exanaename, daxita jiwi cacui yaputaena xua bayatha jopa exanaem xua ichamonae abe cayabara paeba. Yawa daxita jiwi cacui yaputaena xua xam xaniwaichiya exaname pocotsiwa Moisés itoroba. ²⁵ Paxan pata tinan carta pomonaexano Jesús pejume cowũntsiwichi, pomonaexano jopa judiomonaexano naexanaeyo. Pata yabara tinan baxua xua pananta xeinan xua barapomonaexano beexanaetsipa. Pajan barapo cartatha: ‘Painya xoba duwei pawĩ xaneme po duwein jiwi tsiseba ibo nacom. Mataũtano painya xoba paxaneme po duwein pon saya pipato tũpuncua, xuano painya xoba pajana xaneme. Painya xoba pasiwa xeiname yabũxi xua jopa painya seurixi’, pajan, jei Santiago.

Meje yabara poxonaexano soldadomonaexano Pablo maxũ waetabatsi judiomonaexano pin pia botha tatsi, bapoxonaexano jiwi pecũbi bo beya caponatsi

²⁶ Nexata Pablo barũ poĩnya barapo cuatro poyobe. Icha matabi Pablo irũ barapo cuatro poyobe exana po coyene xua jopa penajũntũ coyene taxobiwa Nacomtha. Bapoxonaexano Pablo irũ barapo cuatro poyobe Nacom pin pia botha tatsi jojoniya. Pablo namchi, jeye: “Equeicha papatsinan siete po matabibe poxonaexano pawetsin po coyene xua daxota jopa pata najũntũ coyene taxobiwa

Nacomtha. Pacaponaein duwein sacerdotemon-
aepin pebexubinexa tsane xua pata catsinexa Na-
com”, jei Pablo.

²⁷ Poxonae barapo siete matakabiyobe imoxoyo yapucaewinaba, bapoxonae Pablo judiomonae Nacom pin pia botha tainchi. Pomonae Pablo tainchi, barapomonae judiomonae pomonae Asia nacua weya pona. Pomonae Pablo tainchi, barapomonae exana xua pin bicheito namtsebiya wawai xua Pablo pecasebixaetsi. Bapoxonae Pablo waetabatsi. ²⁸ Jume daunweya wawai, jeye: “¡Pajume taema, paxam pomonae Israel nacuapiwi pamxaem! ¡Pana yawende! Barapon cuiduba ducuaenaebiya daxita jiwi. Abeya naca yabara cui cueicueijei. Matautano abeya yabara cueicueijei Moisés pia peitorobi coyenewan tatsi. Matautano barapo Nacom pin pia bo abeya yabara cueicueijei barapon. Matautano bapon griegomonae matacapoinchi barapo Nacom pin pia bo berena. Poxonae Pablo matakapona griegomonae, Nacom pin pia botha tatsi atutube exana”, jei barapomonae.

²⁹ Baxua paeba, tsipei poxoru bayatha barapomonae Pablo tainchi Jerusalén tomaratha. Baxota Pablo baru pona Efeso tomarapin, pon pewan Trófimo. Daxota barapomonae catsawa nanta xeina xua metha bayatha Pablo Nacom pin pia botha baru pona Trófimo. Daumetha Trófimo baxota joponaeyo.

³⁰ Daxita tomarapiwi japaya equeicha jume daunweya wawai. Daxita cuinaerendena, barapomonae Pablo yoroba teicatsi. Nacom pin pia bo wemaxu capoinyatsi. Barapoxonae barapomonae bichocono yaboupa cateitabanota

pin bicheito soldadomonaē cayabara wawaya punaenapoinchi, jeye: “¡Maisa pabexore bapon!” jei barapomonaē.

Meje yabara poxonaē Pablo paeba barapomonaē peitabaratha

³⁷ Poxonaē juntucuru Pablo soldadomonaē pia bo beya capoinchi, Pablo barai soldadomonaē pia pentacaponaeintha tatsi, jeye:

—¿Metha ichauyo catsipaebichipatsi? jei Pablo.

Poxonaē baxua jume taeba, soldadomonaē pia pentacaponaein tatsi yainyaba, jeye:

—¿Xam necueicueijeinda griego jumera?

³⁸ ¿Xam barapo jitomda egipcio nacuapimda, pon nacaetuteiba exaneiba pijimonaē xua ichamonaē pejutebeibinexa tsainchi? ¿Xam barapomonaē pia pentacaponaein tatsi, pon xua matacaponaponame cuatro mil jiwi ichaxota ira xuepana susato tsurucuae nacuatha? jei soldadomonaē pia pepa pentacaponaein tatsi.

³⁹ Nexata Pablo jume nota, jeye:

—Apara pepa judiomonaepiyon. Tarso tomaratha naexanan. Tatomara ainya cui tsipei pepa tomara. Tarso tomara Cilicia nacuatha eca. Nejume cui yabara copare xua barapomonaē tatsipaebiwa tsane, jei Pablo.

⁴⁰ Soldadomonaē pia pepa pentacaponaein tatsi bara Pablo yabara jume copatatsi xua Pablo bara pepaebiwa tsane. Pablo ichaxota nonababeibiya baxota asiya uncua. Yawa pecobetha jume matawenta barapomonaē xua moya peenaenexa. Poxonaē moya enarucupa barapomonaē, Pablo hebreo jumetha cueicueije. Namchi, jeye:

22

¹ “Tamonaē pam, iru pomonaē pitiri jiwi pam, pana nejume taema xua tapaca tsipaebiwa tsainchi xua tana nabaru jume yawenaewan”, jei Pablo.

² Poxonaē barapomonaē jume taerucupa, xua Pablo hebreo jumetha cueicueije, barapomonaē moya enarucupa. Pablo barapomonaē barai, jeye:

³ “Xan apara judiomonaepin. Bayatha naexanan Tarso tomaratha, Cilicia nacuatha. Saya apara Jerusalén tomaratha wichaban. Baxota nacuiduban po coyenein wamo susato jiwi itorobeiba. Daxita barapo coyenein pebin pewun Gamaliel, necuiduba. Necui eeneiba xua Nacom tanacuiteiban xua daxita tajuntu coyenewatha icha anoxuae daxita paichiponaem.

⁴ Bayatha jeiteiban pomonaē pejume cowantsiwi Jesús pia pena pecuidubiwa tatsi. Teiqueibanno, jiwi pecubi bo beya caponeiban, pebiwino yawa yabuxino. Tsipei ichichipan xua ichamonaē jutebeiba xua barapomonaē pejutebeibinexatsi.

⁵ Sacerdotemonaē pia pentacaponaēin tatsi iru pitiri jiwi paca tsipaebina xua bayatha barapomonaē necata cartan xua barompaya wajudiomonaē nexa xua Damasco tomaratha. Barapo cartanxae neitacupa xua tateicaewa tsane pomonaē Jesús pejume cowantsiwichi. Baxota Damasco tomaratha ponan tajeichinexa pomonaē Jesús pejume cowantsiwichi, tsipei tha Jerusalén tomara becayaetsi barapomonaē, matautano tsipei tha yamaxu cubiya caponaetsi taperaxa exanaenexa tsane barapomonaē”, jei Pablo.

Meje yabara poxonae Pablo diwesi paeba xua poxonae po coyene pejume cowantsiwa Jesustha

⁶ Equeicha Pablo jeye: “Damasco tomara namtotha ecaponan, bara nama mateinyaxae tsuxubi. Poxonae bara muxu tapatopaeba barapo tomaratha, bapoxonae pin coicha neyancataba. Taxainya benematawacaicha jopeica. Peitaboco wejopeica. ⁷ Iratha jopan. Bapoxonae peitaboco wenebaraichica. Jume taeuncuan, nebarai, jeye: ‘Saulo, Saulo, ¿eta xua metha tamonaе inta abe exaname?’ jei. ⁸ Nexata yainyaban: ‘Pon jiwi Necanamataxeinaem, ¿jintamamda?’ jan. Nejume epa pita, jeye: ‘Apara xan Jesús, Nazaret tomarapin ponxaein tamonaе inta abe exaname’, nejei. ⁹ Pomonaе nepuna pona iru coicha taneno. Bichocono bapomonaе junuwa. Saya meisa coicha tane, saya jopa jume taeyo po jume xua nebaraichica. ¹⁰ Nexata yainyaban: ‘Pon jiwi Necanamataxeinaem, ¿eta pocotsiwa metha exanocuaein?’ jan. Bapon nebarai, jeye: ‘Nontaponde Damasco tomara be-iyande barapo tomaratha, ichan yabara catsipaebina pocotsiwa xua bewa exanaename’, nejei. ¹¹ Barapo coicha bichocono neitata naquitaba exana. Pomonaе nepuna pona Damasco tomara benemaxu cayiya.

¹² “Barapo tomaratha, Damasco tomaratha, cou pebin popona, bapon pewan Ananías. Bapon daxita yabara jume cuiya exaneiba Moisés pia peitorobi coyene tatsi. Barapo judiomonaе, Damasco tomaratha, barapomonaе Ananías xanepanaya yabara paebeibatsi. ¹³ Ananías nesiwa pona. Bapon nebarai: ‘Saulo, tamonaе

jitom, equeicha caewa nepu necotsinde', jei. Bara caena barapoxonae equeicha caewa necotaxuban. Bapon bapoxonae taenotan. ¹⁴ Ananías nebarai, jeye: 'Pata amo jiwi pia Nacom tatsi bayatha itapeta cawaba xua neyaputaenexa tsane xua Nacom caitoroba. Caitapeta xua netaenexa pon yatsicaewa pejuntũ coyene xanepanaein, matautano nejume taenexa pocotsiwa catsipaeba. ¹⁵ Aunxuae Jesús yabara cueicueijam tsane daxita nacuan jupayantha. Yabara paebiname daxita xua taneme xuano xua jume tanemeno. ¹⁶ Anoxuae, ¿eta xua metha came ecame? Nontaponde. Barabũ ichan cabautisabina Jesucristo pewantha, pon jiwi Pecanamataxeinaein, necayabara jantemainaenexa abe jinya neexanae cuiru coyenein', nejei Ananías", jei Pablo.

Meje yabara poxonae Pablo nayabara paeba xua peitorobiwatsi ichaxota pomonaetha pomonae jopa judiomonae naexanaeyo

¹⁷ Pablo cataunxuae cueicueijei, jeye: "Poxonae caibe nawiyen Jerusalén tomara beya, Nacom pin pia botha tatsi ponan. Barapo botha Nacom tsipaeban. Bapoxonae camaitan xua netsita naitaũta. ¹⁸ Jesús necotan, pon jiwi Pecanamataxeinaein. Bapon nebarai: 'Anthayacuina yapa pontabare Jerusalén tomara weya, tsipei barapomonae jopa xapain cajume cowantsi tsane xua tana neyabara paebiwam', jei Jesús. ¹⁹ Nexata jume epa pitan: 'Pon jiwi Necanamataxeinaem, barapomonae bayatha necui yaputane xua poneiban daxitan

judiomonae pia penacaetutsi bontha tatsi. Bayatha jiwi pecubi botha caponeiban, pomonae necajume cowantsiwi. Matautano bichocono beibanno. ²⁰ Poxonae Esteban bichocono jana othopeica xan saya cui necotuncuan. Bapon Esteban pon cajume cowanta bayatha. Bapon jinya diwesi pecanantsipaebin. Poxonae Esteban bexotsi, saya cui matu taeuncuan. Yabara jume baru cui jejan poxonae barapomonae Esteban bexubapaebatsi. Barapomonae pipaparuwan tajeban', jan Jesustha. ²¹ Ichitha bapon pon jiwi Pecanamataxeinaein nebarai: 'Antha ponde. Aunxuae tajū caitorobinchi barapomonae beya, pomonaetha pomonae jopa judiomonae naexanaeyo beya', nejei", jei Pablo.

Meje yabara poxonae soldadomonae pia pentacaponaein tatsi Pablo waetabatsi

²² Pablo cataunxuae paebuncua barapo penonobabeibiyathopaewatha soldadomonae pia botha. Poxonae Pablo jume taerucupatsi xua bepa pinae ponaena pomonaetha pomonae jopa judiomonae naexanaeyo beya, bapoxonae barapo bicheito namtsebiya wawai, jeye: "¡Maisa bapon pabexore bara! ¡Dapocotsin jopa bewa poponae!" jei. ²³ Awiya came barapomonae wawai tsompae. Yawa pia paparuwan anaya nunubaba. Yawa taetowan anaya athabe bebeicha. ²⁴ Romanomonae soldadomonae pia pepa pentacaponaein tatsi, bapon pia soldadomonae itoroba xua Pablo pecaponaenexatsi soldadomonae pia bo beya tatsi xua jiwi pecubi bo. Baxota Pablo

capoinchi pecuainchinexa tsainchi xua daxota Pablo peyabara paebiwa tsane baxua xua Pablo peyabara namtsebiya wawaichiwatsi judiomonae. ²⁵ Poxonae bara juntucuru Pablo maxu cutanotatsi xuano juntucuru muxu pebetsino, Pablo barai soldadomonae pia pentacaponaein tatsi, jeye:

—Jopa be pana necuainchipaem tsipei apara xan romanomonaepin. Matautano baxua jopa pana necanaichipaem icha jopa neyabara paebiyo pon jiwi peyabara paebin penatsicuentsiwa xua abe peexanaexae, jei Pablo.

²⁶ Poxonae baxua jume tane, soldadomonae pia pentacaponaein tatsi, bapon pona pia pepa pentacaponaein tatsi beya. Bapon namchi pia pepa pentacaponaeintha, jeye:

—Dota xua xam cana exanaename bapontha. Apra cou deta Pablo iru romanomonaepin, jei.

²⁷ Nexata soldadomonae pia pepa pentacaponaein tatsi, bapon Pablo imoxoyo caquita uncuatabatsi. Bapon Pablo yainyabatsi, jeichichi:

—¿Bara yatsicaya xainyei bara xam romanomonaepim? jeichichi Pablo.

Pablo jume nota, jeye:

—Aa, bara xan tsocuaein, jei Pablo.

²⁸ Soldadomonae pia pepa pentacaponaein tatsi Pablo jume notatsi, jeichichi:

—Xan iru barichin romanomonaepin. Nacui yabara matomatan bichocono pin paratixi matoma xua romanomonaepin tana naexanaewa tsane, jei.

Pablo namchi, jeye:

—Apara seicaya nama xan caena bayatha pexuyothan yacuiya naexanan romanomonaepin, jei.

²⁹ Poxonae Pablo baxua paeba, bapoxonae pomonae Pablo muxu pecuainchichi Pablo pexeinya wetanatsixibarucupiyatsi. Irucubara wenatsixitabiya soldadomonaepia pepa pentacaponaein tatsi tsipei bapon yaputane xua Pablo apara romanomonaepin. Daxota junuwa xua Pablo pemaxucubixaetsi.

Meje yabara poxonae Pablo pentacaitorobi bicheitomonae peitabaratha uncua pomonae judiomonae

³⁰ Icha matabitha soldadomonaepia pepa pentacaponaein tatsi bepa yaputaei, bepa jeyei: “¿Eta xua metha Pablo yabara anaepanatsi judiomonae?” bepa jeyei. Daxota bapon, Pablo taxuenaxotsi xua maxucutatsi. Nexata bapon itoroba xua sacerdotemonaepia pentacaponaei tatsi irucubapentacaitorobi bicheito nacaetutsina. Pablo bara bebarucupiyatsi. Baraxota cuaranotatsi barapomonae peitabaratha tatsi.

23

¹ Pablo pentacaitorobi bicheito beya bichocono naita cui dutsiya necoya. Pablo barapomonae beya namchi, jeye:

—Tamonaepia, caena bayatha beya anoxuae juncucoyene xanepanaya poponan Nacom peitathatatsi, jei Pablo.

² Nexata sacerdotemonaepia pepa pentacaponaein tatsi, Ananías, bapon itoroba xua Pablo

pecoibo cuainchinexatsi pomonae Pablo imoxoyo caquita peumenaexaetsi. ³ Ichitha Pablo jume nota, Ananías jume notatsi, jeye:

—Xam ponxaem itara mexeya xanepanaya nepaebin ichitha jiwi nemuxuitorobin, Nacom cacuainchina. Xam ecame xote jinya tana neyabara paebinexam tana natsicuentsiwa xua abe taexanaexae icha be pocotsi coyeneya Moisés pia peitorobi coyenetha baxua yabara paeba. Ichitha xam jopa xapain exanaem poxonae ichamonae itorobame xua tana necoibo cuainchinexa poxonae Moisés pia peitorobi coyenewatha jopa baxua itorobiyo, jei Pablo.

⁴ Pomonae Pablo imoxoyo caquita umeinchi, jeichichi:

—Apara sacerdote pia pepa pentacaponaein tatsi abe tsipaebame pon Nacom tanacuitatsi, jei barapomona.

⁵ Pablo jume nota, jeye:

—Tamona, jopa yaputaെയိယဝ xua pon tsipae-ban apara sacerdotemona pia pepa pentacaponaein tatsi. Icha yaputaေိယဝ, jopa paebinchipae. Nacom Pejume Diwesitha namchi, jeye: ‘Jopa bewa painya pentacaponaewi jiwana abe pajainchim pomonae xua painya tomaratha’, jei Nacom Pejume Diwesitha, jei Pablo.

⁶ Nexata Pablo cui yabara nanta xeina barapomonaetha tsipei ainya bicheitobe, ichamonae saduceomonaer၎, ichamonae fariseomonaer၎. Daxota bapon Pablo jume daunweya wawai barapomonaetha, jeye:

—Tamona, bara xan apara fariseomonaepin, yawa fariseomonaepin pexanton. Tsipei jume

cowantana xua jiwipi petupaewi equeicha asu tsaibi tsane daxota pana necaponame painya tana neyabara paebinexam xua tana natsicuentisiwa xua abe taexanaexae, jei Pablo.

⁷ Poxonae Pablo baxua paeba saduceomonae iru fariseomonae najume matsontsonobabe. Barapo bicheito ainya bicheitobe naexanabe, tsipei barapo bicheitobe seicaya barompaya nabaru nanta xeina. ⁸ Saduceomonae paeba xua pinae petupaewi jopa equeicha asu tsaibi tsane. Matautano barapomonae paeba xua pinae matatsunpiwi jopa jinompaeyo, matautano pinae dowatsi dapomonae pinae ajibi. Ichitha meisa fariseomonae jume cowanta daxita barapo diwesin, xua pinae pewerapeibiwi equeicha asu tsaibi tsane, matautano xua pinae dowatsi jinompa, xuano xua pinae matatsunpiwi bara jinompa. Daxita barapo diwesin fariseomonae jume cowanta. Ichitha nama saduceomonae jopa daichiyo. ⁹ Daxita barapo bicheitobe namtsebiya wawai. Fariseomonae jiwana ichamonae nonobapona. Barapomonae yaputane nawita Moisés pia peitorobi coyene tatsi. Barapomonae namchi, jeye:

—Bapon Pablo jopa abe exanaeyoba, metha dowatsi bapon tsipaebatsi, ichacuitha metha matatsunpin bapon tsipaebatsi, jei barapomonae.

¹⁰ Barapomonae daxita najume matsontsonobiya biatane. Bapon romanomonae soldadomonae pia pepa pentacaponaein tatsi, bapon bichocono junuwa tsipei Pablo tsana peru xunaeinchi. Daxota bapon romanomonae soldadomonae pia pepa pentacaponaein tatsi

itoroba pia soldadomonaē xua Pablo equeicha caponaēinchi soldadomonaē pia bo beya tatsi.

¹¹ Icha mataqueitha merawi pon Pecana-mataxeinaein jiwi, Pablo imoxoyo caquita uncuatsi xua tsita naitatatsi. Bapon namchi, Pablo baraichi, jeye: “Pablo, najuntũ coyene tsacatabare. Icha ichim xua Jerusalén tomaratha neyabara paebame barichinde equeicha Roma tomaratha neyabara paebare”, jei Jesús.

Meje yabara poxonaē judiomonaē nanta xeina xua Pablo pebexubiwa tsainchi

¹² Icha mataqueitha, ichamonaē judiomonaē pebũrũya nanta jũpaya nanta xeina xua Pablo pebexubiwa tsainchi. Barapomonaē nayabara tsiwũnaē muxu duta Nacomtha xua bepa pinae jopa nabanae tsane, xuano jopa apae tsaneno xua beya pinae yajainbonaya othopaena poxonaē Pablo bexubinchi. ¹³ Barapomonaē pomonaē Pablo bexubapaebatsi xuano xua yabara nainbotapaebatsi bichocono pinmonaē beyacaincha xua pocotsi cuarenta po pebiwimonaeyobe. ¹⁴ Barapomonaē pona sacerdote pia pentacaponaewi tatsi beya, yawa judiomonaē pia pitiri jiwi tatsi beya. Barapo pebiwimonaeyobe barai barapomonaetha, jeye:

—Bayatha pana nayabara tsiwũnaē muxu duban Nacomtha xua jopa pata nabanaewa tsane beya tsane poxonaē cataunxuae jopa pabexubinyo tsane Pablo. ¹⁵ Paxam irũ pomonaē pentacaitorobi bicheito, romanomonaē soldadomonaē pia pepa pentacaponaēin tatsi patsipaebare xua bapon pia soldadomonaē

peitorobinexa xua Pablo pecuaranotsinexa tsainchi painya itabaratha baya tsane. Romanomonae soldadomonae pia pepa pentacaponaein tatsi pamuxuitorobare. Naemata bapon pabarande: ‘Awiya peyainyabiwa paxeinan pata tha yainyabichi Pablo’, pajande. Paxan pata tha nama namtotha ewatumenaetsi. Pata tha bexuichi, poxonae barapomonae Pablo caponaeinchi, jei barapomonae.

¹⁶ Pablo perobi tatsi jume tane xua barapo cuarenta po pebiwimonaeyobe namtotha nantsiyatsiya bobenapaeba pewaetabinexa tsainchi Pablo. Daxota Pablo perobi tatsi pona soldadomonae pia bo tatsi beya. Baxota Pablo perobi tsipaebatsi xua barapomonae Pablo bepa bexubichei. ¹⁷ Nexata Pablo waba pon xua romanomonae soldadomonaepin pia pentacaponaewi jiwana. Pablo namchi, jeye:

—Poye pewowin wato caponde romanomonae soldadomonae pia pepa pentacaponaein tatsi beya, tsipei bapoyo diwesiyo xeina xua petsipae-biwa tsane, jei Pablo.

¹⁸ Romanomonae soldadomonae pia pentacaponaein tatsi Pablo perobi tatsi capoinchi xua romanomonae soldadomonae pia pepa pentacaponaein tatsi beya. Bapon namchi, jeye:

—Pablo soldadomonae pia botha peecaein, bapon neitoroba xua pinae bepa caponaeinjei poye. Tsipei pinae xeina diwesiyo xua necatsipaebinexa, jei bapon soldadomonae pia pentacaponaein tatsi. ¹⁹ Pablo perobi tatsi cobe pitatsi romanomonae soldadomonae pia pepa

pentacaponaein tatsi. Bara natsixitabatsi aisowa beya. Bapoyo baraichichi, jeichichi:

—¿Jinya eta xua netsipaebichi? jeichichi.

²⁰ Nexata pewowin wato jume nota romanomonae soldadomonae pia pepa pentacaponaeintha, jeye:

—Judiomonae pebraya nanta xeina xua bepa sawcaei xua Pablo baya necaponaeintha pentacaitorobi bicheitha. Bepa camuxitorobei. Bepa jeyei: ‘Panantawenonan pata tha Pablo yainyabichi ichawiyo’, bepa jeyei barapomonae.

²¹ Ichitha jopa jume cowantsinde, barapomonae namtotha nantsiyatsiya bobenapaeba pewaetabinexa tsainchi taxuyo. Barapo cuarenta po pebiwimonaeyobe natsiwanae yabara muxu duba Nacomtha xua bepa pinae jopa nabanae tsane yawa jopa apae tsane beya pinae poxonae tsane poxonae Pablo bexubinchi. Anoxuae barapomonae cajume cui ewata xua jam tsane: ‘Baya tsane Pablo pentacaitorobi bicheitha itorobinan’, jam tsane, jei Pablo perobi tatsi.

²² Nexata romanomonae soldadomonae pia pepa pentacaponaein tatsi barapoyo napeyabatsi. Pewowin wato ponataba. Pewowin wato baraichi, jeye:

—Ichantha jopa tsipaebinde xuaunxuae po diwesiyo netsipaebame, jei soldadomonae pia pepa pentacaponaein tatsi.

Meje yabara poxonae soldadomonae pia pepa pentacaponaein tatsi Pablo itorobatsi Félix beya pon Judea nacuamonae pia peyanacua ewatsinchi

23 Romanomonae soldadomonae pia pepa pentacaponaein tatsi waba ainya pentacaponaeinbe. Bapon baraponbetha itoroba. Barai: “Soldadomonae pacui w_hnaerebe doscientos po soldado matab_hx_hbe pomonae xua petaxutha ponaena, ir_h setenta po soldado matab_hx_hbe pomonae xua cawayutha ponaena, ir_h doscientos po soldado matab_hx_hbe pomonae dejonan cajijincaena. Barapo bicheito daxita peponaenexa Cesarea tomara beya merawitha poxonae a las nueve tsuxubi. 24 Mata_htano pacui w_hnaerebe cawayu ayunbe xua Pablo preequeicaenexa tsane. Mata_htano paitorobarebe xua Pablo beta pecaponaenexatsi, xua as_hno Félix beya”, jei. 25 Bapon pia soldadomonae caitoroba carta. Barapo cartatha namchi, jeye:

26 “Xan Claudio Lisias. Félix, ponxaem tacabar_h cui itura jinaeinchi, cajacobatsi. 27 Pon anoxuae cata itorobatsi nexainya beya barapo pebin waetabatsi, judiomonae waetaba. Muxu pebexuichi. Poxonae jume tan xua bapon romanomonaepin najainta daxota nainya soldadomonae bar_h ponan bapoxonae bapon capanepan. 28 Tsipei tha yaputaetsi xua barapomonae Pablo yabara paebatsi, daxota Pablo cuaranotan judiomonae pia pentacaitorobi bicheitha tatsi. 29 Jume tan xua barapomonae Pablo yabara paebatsi xua pinae bapon jopa exanaeyo icha be pocotsiwa barapomonae pia peitorobi coyenewan tatsi paeba. Ichitha barapomonae jopa xeinaeyo po coyene xua daxota Pablo pebexubinexatsi, xuano xua daxota jiwi pec_hubi botha peetsinexatsi.

³⁰ Ichitha bapoxonae jume tan xua judiomonae namuxuweta pebexubinexa tsainchi Pablo. Daxota Pablo nexainya beya itoroban. Tsipaeban judiomonae pia pentacaitorobi bicheito tatsi. Janje: ‘Icha awiya Pablo pacui itawetsiname xua abe bapon exana —cabaraichi— bapon pia xainya beya paponare. Papaebare Félixtha baxua, pocotsiwa Pablo exana’, jan. Baja, Claudio”, jei barapo cartatha.

³¹ Barapo soldadomonae exana pocotsiwa xua bayatha itoroba pon romanomonae soldadomonae pia pepa pentacaponaein tatsi itoroba pon pew^{un} Claudio. Barapo soldadomonae barapo merawitha Pablo capoinchi Antípatris tomara beya. ³² Icha mataqueitha barapomonae soldadomonae pomonae petaxutha pona, caibe nawibiya ichaxota tauncuatsi soldadomonae pia bo beya. Pomonae cawayutha pona awiya Pablo bar^u poinchi. ³³ Soldadomonae Pablo capoinchi Cesarea tomara beya. Barapomonae soldadomonae Félix catatsi barapo carta. Pablono baxota punaxubothopatsi. ³⁴ Félix matha yoroba carta. Bapoxonae Pablo yainyabatsi, jeichichi:

—Pablo, ¿eta po nacua jitomda? jei.

Pablo jume nota, jeye:

—Bara Cilicia nacua piyon, jei.

³⁵ Félix namchi, jeye:

—Poxonae judiomonae patsina, pomonae xua abe cayabara paeba, bapoxonae cajume taeinchi xua tana netsipaebiwam tsane, jei Félix.

Bapoxonae Félix itoroba soldadomonae xua Pablo yapucaenaeinchi ichaxota po botha peitupanae bo, po bo Herodes cuenta naxuba.

24

Meje yabara poxonae Pablo Félix peitabaratha tatsi nayabara jume paeba

¹ Icha matabitha poxonae cinco po matabibe tsuxubi, pebiwi pata Cesarea tomaratha. Ichun pewun Ananías. Bapon Ananías sacerdotemonae pia pepa pentacaponaein tatsi. Iru pitiri jiwimonaeno pata. Iru pon xua petapaebeibin jiwi, pon pewun Tértulo bapon napatopa. Barapomonae nacuara pata Cesarea tomaratha. Barapomonae Félix peitabaratha taumeinchi, xua Pablo abeya peyabara paebinxatsi. ² Poxonae Pablo carendenatsi, Tértulo Pablo abe yabara paebatsi. Félix baraichi, jeye:

—Félix, xam pon pana yanacua ewatame. Daxota juntema xanepanaya pajinompan. Maisa bara beta itorobiya canamataxeiname jiwi jinya neyaputae coyenewatha. Daxota xam beta exaname barapo nacuathe. ³ Félix, xam pon pata paca baru itura jinaeinchim, xua exaname yatsicaya wunae nawita barapo nacue nexa. ⁴ Jopa ichichipaeinyo xua tacayatacutsiwatsi. Daxota catsipaebatsi xua saya caeto pana nejume taema xua pata paca catsipaebiwa tsainchi. ⁵ Anoxuae payaputan xua Pablo bichocono pana cui fayacota xua abe exana. Matautano bapon judiomonae cui tsacabatsi xua nacaseba exanatsi daxita nacuantha. Matautano bapon,

apara pomonae nazarenomonae barapomonae pia pentacaponaein tatsi, pomonae pecuidubi jiwí icha coyeneya pocotsiwa jopa xainyeyo.

⁶ Yawa Nacom pin pia bono tatsi juntucuru abe taexanatsino, poxonae juntucuru baru jonyatsi pon jopa judiomonae naexanaeyo Nacom pin pia botha. Daxota pawaetaban. Paxan paichichipan Pablo paperaxa exanan barompaya pata peitorobi coyenewa cuitha. ⁷ Ichitha soldadomonae pia pepa pentacaponaein tatsi, Lisias, daunweya pana wecobe maxu pitatsi Pablo. ⁸ Soldadomonae pia pepa pentacaponaein tatsi, Lisias, pana barai: ‘Pomonae Pablo abe jaintatsi moya Félix peitabaratha papaebare’, pana jei Lisias, jei Tértulo.

Tértulo equeicha namchi, jeye:

—Félix icha yainyabatsipame Pablotha metha bara yaputaetsipame xuaunxuae cabaraichichi. Xuaunxuae Pablo yabara paeban baxua xaniyan yatsicaya, jei Tértulo.

⁹ Judiomonae, pomonae Tértulo puna poinchi namchi: “Tértulo bara xaniyei paeba”, jei.

¹⁰ Nexata Félix Pablo moya pecobetha jume itorobatsi. Bapoxonae Pablo Félix baraichi, jeye:

—Yaputan xua caena bayatha ainya wei xam naexaname pon jiwí neyabara paebin xua penatsicuentsiwa xua abe peexanaexae xua barapo tomarathe nexa. Daxota juntu coyene weiweinan xua tana nayabara paebiwa neitabaratha. ¹¹ Icha yainyabame barapomonae, Jerusalén tomarapiwi, catsipaebichipa xua bayatha Jerusalén tomara beya ponan. Baxota ponan tsipei Nacom pin pia botha wuna

tajainchinexa Nacom. Anoxuae petain doce matabibe yapucaewan poxonae xua bayatha ponan bara beya. ¹² Jopa jume matsontsonobeibinyo jiwi. Yawa jiwi jopa jume cui tsacabeibinyo xua anaepanaya penajume cayayatsinexa. Baxuan jopa exanaeinyo Nacom pin pia botha. Matautano judiomonae pia penacaetutsi bontha tatsi, baxuan jopa exanaeinyo. Matautano tomaran pecuariyathan jopa baxuan exanaeinyo. ¹³ Pomonae paeba xua pinae abe exanan, barapomonae jopa jume cūpaetsi xua tana necui yopichiwa xua abe exanan. ¹⁴ Xaniwaicha catsipaebatsi xua xan Nacom tanacuitan pon tamo susato jiwi pia Nacom tatsi. Baraxua exanan xua jiwi cuiduban be pocotsi coyeneya xua paeba Jesús pia pena pecuidubiwa tatsi po pecuidubiwa judiomonae yabara nanta xeina xua pinae barapo pecuidubiwa jopa xainyeyo. Xan jume cowuntan daxita Moisés pia peitorobi coyenewan. Matautano po diwesin Nacom pia peitorobi jume pepaebiwi tina, barapo diwesinno jume cowuntan. ¹⁵ Xan barichindū, Nacom yabara barū jume cowuntsiya ewatan icha barapomonae ichi xua po coyene pomonae pewerapaewi equeicha asū tsane, pomonae peajuntūcoyenebe jiwi irū xua asū tsane pomonae pejuntū coyene xanepanae jiwino. ¹⁶ Daxota jopa najuntū coyene acaurinyo tsipei nayaputan xua Nacom beta taexanan. Jiwithano jopa najuntū coyene acaurinyo.

¹⁷ “Ainya wei dapaein saya icha nacuantha poponan. Bapoxonae equeicha tatomara beya poponan, Jerusalén tomara beya. Patopan

baxota Nacom pin pia botha poxoru yaitama paratixi caponan xua tamonaē nexa po paratixi ichamonaē taitoroba. Matautano bara beyan xua baxotiya Nacom tatsita exanaenexa xua pocotsiwa be tacatsiwa Nacomtha, xua duwein tatautsiwa tsane. ¹⁸ Barapo coyenein awiya exanawiyān, bequein bayatha nenacui yabara jume weta exana po coyene xua daxota Nacom jopa tsitanyo xua taajantucoyenebewan be pocotsi coyeneya xua judiomonaē itoroba. Bapoxonaē judiomonaē pomonaē Asia nacua weparena netaeba Nacom pin pia botha. Barapomonaē baxota necaxiba bequein poxonaē jopa jiwi namtsebiya wawaya exanaeinyo. ¹⁹ Pomonaē netane Nacom pin pia botha pomonaē Asia nacua werena pepatsiwi bewa dapomonaē xote patsi xua necatsipaebinexa tsane xua tana neyabara paebinexa tsane xua abe taexanaewa. ²⁰ Icha barapomonaē jopa patsiyo pomonaē xote ena b_u paeba. Barapomonaē netane poxonaē cain matha judiomonaē pia pentacaitorobi bicheito peitabaratha uncuan. Barapomonaē b_u catsipaeba, icha metha bara abe exanan poxonaē barapo pentacaitorobi bicheito peitabaratha tatsi uncuan. ²¹ Saya _u baxua exanan poxonaē peitabaratha uncuan, bapoxonaē bichocono wawan. Janje: ‘Anoxuae poxonaē paxam pana neyabara paebame xua tanatsicuentisiwa xua abe taexanaewa paxam pananta xeiname xua abe exanan yaitama jume cow_untan xua pewerapaewi equeicha as_u tsaibi tsane’, jan jei”, Pablo.

²² Félix caena bayatha yabara yaputane

Jesús pia pena pecuidubiwa tatsi. Daxota Félix cataunxuae ab_u jopa baxua yabara paebiyo pocotsiwa barapomonaē paeba. Daxota Félix namchi, bapomonaetha, jeye:

—Ab_u bexa pacatsipaebinchī, poxonae soldadomonaē pia pepa pentacaponaein tatsi patopaena pon Lisias, bapoxonae yabara paebīn pocotsiwa Pablo exana, jei Félix.

²³ Nexata Félix itoroba soldadomonaē pia pentacaponaein tatsi xua soldadomonaē Pablo cataunxuae yapu eeniya pebar_u jinompaenexatsi Herodes pia botha tatsi, bequein bara copata xua Pablo bara exanaena be pocotsiwa xua bapon ichichipa exana barapo botha. Matautano copatano xua Pablo bara pesiwa ponaenexatsi piamonaē xua piamonaē peyawenaenexatsi xua pocotsiwa nantawenona bapon.

²⁴ Icha matabitha pirapaeyo Félix piowabe patopabe. Petsiriwa pew_un Drusila. Barapowa ju-diomonaewayo. Félix najume caitoroba ich_untha xua Pablo pewabinexatsi Félix berena, matautano xua Pablo Félix yabara petsipaebīnexatsi xua po coyene jiwī jume cow_unta Jesucristo. ²⁵ Pablo Félix tsipaebatsi xua pinae ainya cui xua jiwī beta yanth_uthiya jinompa icha be Nacom ichi xua beta yanth_uthiya popona. Matautano paebano xua pinae jiwī pia xoba abe exaneiba. Matautano namchino xua pinae caentacabitha tsane Nacom wabina daxita jiwī xua peyabara paebīnexa xua penatsicuentsiwa xua abe peexanaexae barapo cae pin nacuathe. Félix naj_unt_u coyene cabenaeca poxonae jume tane baxua. Pablo tsipaebatsi, je-ichichi:

—Jinya tutu beya bara ponde. Bexa equeicha cawabinchi icha ichawiyo jopa neenaeyo, jei Félix.

²⁶ Félix nanta xeina xua paratixi pecatsiwa tsainchi xua Pablo pecatsiwa tsane xua daxota Pablo pepu copatsinexatsi. Daxota memecabiya wabatsi Pablo. ²⁷ Baraxua exana beya yaainya weibe jopa. Barapoxonae Félix weta xua pon peyanacua ewatsin jiwi naexana barapo Judea nacuatha, xua icha nacua beya pewarapaexae. Ichun Félix pecoutha tatsi tapatopatsi pon pewun Porcio Festo pon xuya pon peyanacua ewatsin jiwi naexana Judea nacuatha. Félix ichichipa xua peweyataewatsi xua judiomonae peweyataewa daxota Pablo jopa copatichi xua bara yatsicaewa pepu copatsiwatsi xua pepanepaewa tsane.

25

Meje yabara poxonae Pablo Festo peitabaratha tatsi tauncuatsi

¹ Festo bara patopa xua penaexanaenexa pon peyanacua ewatsin jiwi. Poxonae acoibi po matacabibe weta Cesarea tomara weya pona, Jerusalén tomara beya pona. ² Barapo tomaratha Jerusalén tomaratha sacerdotemonae pia pentacaponae tatsi iru judiomonaeno pomonae pentacaponae aewino, barapomonae Pablo abeya cui yabara canantsipaebatsi. ³ Barapomonae Festo baraichi: “Bu painta ichamonae Pablo Jerusalén tomara beya capoinchi”, jei. Barapomonae baxua Festo jeichichi, tsipei Pablo namtotha ewatabobena-paebatsi pebexubinexatsi. ⁴ Festo jume nota, jeye:

—Canta Pablo Cesarea tomaratha eca xua soldadomonae baru jinompatsi. Tha nama

imoxoyo bara beya equeicha caibeya ponaetsi.
⁵ Painsyamonae jiwana pomonae pentacaponae wi moya b_H barapomonae nepuna pona Cesarea tomara beya. Icha Pablo abe exana, metha moya baraxota Pablo jame be cui yabara paebichipatsi barapomonae, jei Festo.

⁶ Festo cataunxuae Jerusalén tomaratha ocho po merawiyobe yapucaewa xua equeicha ainya dapaeyobe. Barapoxonae Cesarea tomara bewarapiya caibeya. Icha matacabitha Festo eca peequeibithopeibiwatha po tututha ichaxota yabara paebequeiba jiwi xua penatsicuentisiwa xua abe peexanaexae. Festo barai soldadomonae: “Painta caponde Pablo taxainya berena”, jei. ⁷ Poxonae Pablo patopa, judiomonae imoxoyo umenarucupa pomonae Jerusalén tomara weparena. Barapomonae judiomonae Pablo yacaincha matawaqueicha umenatsi. Barapomonae Pablo cui yabara paebatsi xua abe exana nawita. Ichitha xua barapomonae paeba jopa tsita itapeinya xeinaeyo xua apara bara xainyei pocotsiwa barapomonae paeba. ⁸ Nexata Pablo pia coya nayabara paeba, jeye:

—Xan jopa abe exanaeinyo. Jopa abe yabara paebinyo Moisés pia peitorobi coyene tatsi. Matautano Nacom pin pia bo jopa abe yabara paebinyo. Matautano jopa abe yabara paebinyo romanomonae itorobiya pia pepa peewatsinchi tatsi, jei Pablo.

⁹ Festo bepara antobetsei judiomonae. Daxota Festo Pablo yainyabatsi, jeichichi:

—¿Jinya ponaetsi Jerusalén tomara beya xua baxotiya cayabara paebinchi nenatsicuentisiwa

xua abe neexanaexae? jei Festo.

¹⁰ Pablo jume nota, Festo jume notatsi, jeye:

—Xan uncuan peitabaratha tatsi pomonae pentacaponae, pomonae romanomonae itorobiya pia pepa peewatsinchi tatsi itoroba. Barapomonae pentacaponae bara itacupatsi xua barapo tomarathe tana neyabara paebinexa xua tana natsicuentsiwa xua abe taexanaexae. Jopa nantawenonaeinyo xua taponae wa tsane Jerusalén tomaratha. Xam bayatha beta yaputaneme xua jopa abe exanaeinyo judiomonaetha. ¹¹ Icha xaniwaicha abe exanan barapomonaetha, metha moya benebexubina. Jopa junuwinyo xua tatapaewa tsane. Ichitha icha jopa xainyeyo xua barapomonae neyabara paeba, metha nexata barapomonae jopa nebexubichipae. Tha nama warapaetsi romanomonae itorobiya pia pepa peewatsinchi beya, tacoya nayabara paebichi, jei Pablo.

¹² Copiya matha Festo tsipaeba pejume yaweneibiwichi. Barapoxonae Festo, Pablo baraichi, jeye:

—Yaitama aunxuae siwa ponapaebame romanomonae itorobiya pia pepa peewatsinchi tatsi, xua necayabara paebinexa xua nenatsicuentsiwa xua abe neexanaexae daxota moya ponaename bapon beya, jei Festo.

Meje yabara poxonae Pablo uncua Agripa peitabaratha tatsi pon peyanacua ewatsin jiwi

¹³ Icha matabitha Agripa, pon peyanacua ewatsin jiwi, bapon pona Cesarea tomara beya. Petsiriwa puna poinchi, bapowa pewan Berenice. Festo siwa poinchi Cesarea tomaratha

iya. ¹⁴ Baraxotiya Agripa petsiriwano ainya maticabin ecabe. Festo namchi Agripatha, jeye:

—Xote eque pon cain Félix xubeta Cesarea tomaratha xua bapon pebarũ jinompaenexatsi soldadomonae. ¹⁵ Poxonae Jerusalén tomaratha ecan, sacerdotemonae pia pentacaponae jiwitatsi, pitiri jiwino, barapomonae netsipaeba xua bepa pinae Pablo itorobin xua petũpaewa tsane. ¹⁶ Barapomonae baran: ‘Barapocotsi coyene romanomonae pan pata cui coyene. Paxan jopa pacopatsinyo xua ichũn amanaya bexotsi. Jame copiya pomonae xua abe yabara paeba ichũntha, barapomonae bewa paebina bapon peitabaratha tatsi icha bara metha bapon xaniwaicha abe exana. Bapoxonae bapon pia coutha beya nayabara paebichipa xua barapomonae paeba’, jan. ¹⁷ Daxota poxonae barapomonae pata xote, jopa be bayathinyo yaitama. Daxota baya caena nainya ecoundecan, po tututha yabara paebequeiban jiwitatsi xua penatsicuentsiwa xua abe peexanaexae. Itoroban soldadomonae xua Pablo pecaponaenexatsi taxainya berena. ¹⁸ Xan nanta xeinan xua Pablo bichocono abe exana. Ichitha poxonae barapomonae asiya umena peyabara cueicueijeinexa tsainchi, Pablo jopa paebiyo po diwesi xua daxota tananta xeinaenexa xua Pablo bara abe exana cou. ¹⁹ Pocotsiwa xua Pablo yabara cueicueijeichi, saya xua apara pia pejume cowũntsiwa tatsi yabara, mataũtano xua Pablo peyabara cueicueijeixae pebin pon Jesús baraichi, xua pinae equeicha asũ poxonae tũpa. Seicaya nama barapomonae paeba xua pinae bapon apara tũpa, xua equeicha jopa

asuyo. ²⁰ Jopa yaputaeinyo xua baxua exanan xua Pablo abe yabara paebatsi. Daxota copiya matha Pablo yainyaban, janje: ‘¿Xam, jinya ponaetsi Jerusalén tomara beya xua baraxotiya cayabara paebinchi xua nenatsicuentisiwa xua abe neexanaexae?’ jan. ²¹ Ichitha Pablo dapojumetha netsipaeba xua bepa ponaei Augusto beya, romanomonae itorobiya pia pepa peewatsinchi beya, pon xua bepa pinae yabara paebinchi xua penatsicuentisiwa xua abe peexanaexae. Daxota itoroban soldadomonae xua Pablo abu pebaru jinompaenexatsi soldadomonae, beya abu poxonae necui jupa xua itorobin pontha pon romanomonae itorobiya pia pepa peewatsinchi, jei Festo xua Agripa tsipaebatsi.

²² Nexata Agripa Festo baraichi, jeye:

—Tha bequein iru jume taetsiru Pablo, jei Agripa.

Agripa jume notatsi, Festo jume nota, jeye:

—Metha moya baya tsane jume taename, jei Festo.

²³ Bara icha matabitha Agripa iru Berenice patopabe. Paparuwa peitupanaewa nama xatatabe. Agripa pinmonae baru pata, soldadomonae pia pepa pentacaponawewi tatsino, iru Cesarea tomara pia pentacaponawewino. Barapo bicheito Agripa baru pona. Festo itoroba soldadomonae xua Pablo pecarendenaenexa tsainchi. ²⁴ Festo barai, jeye:

—Agripa, xam pon neyanacua ewatsin jiwi, iru pomonae pecanamataxeinae jiwi pamdu. Bapon xote uncue Pablo. Daxita judiomonae iru Jerusalén tomarapiwi, iru Cesarea tomarapiwi,

daxita barapomonae Pablo jume yabara paebatsi xua pinae abe exana. Matautano barapomonae neitoroba nawita xua bepa pinae Pablo itorobin xua petupaewa tsane. ²⁵ Ichitha xan saya tacoya nanta xeinan be jopa neichichi abe exanaeyo, poxonae nejume nota, poxonae tsipaeban. Daxota jopa becaenaetaxubinyo xua pebexubiwa tsainchi. Ichitha Pablo netsipaeba xua bepa ponaei romanomonae itorobiya pia pepa peewatsinchi tatsi beya, pon pewan Augusto, tsipei bepa pinae yabara paebichi xua penatsicuentsiwa xua abe peexanaexae. Daxota yabara najuntũ coyene wetan xua bapon Pablo taitorobiwa tsane bara beya. ²⁶ Yaitama bapon jopa abe exanaeyo, jopa yaputaeinyo xua eta be tajumichiwa tsane barapo cartatha poxonae Pablo itorobin xuano xua cartano cayabara cui pu catsin bara beya. Daxota anoxuae Pablo painya itabaratha cuaranotan. Xam Agripa, pon neyanacua ewatsin jiwi, moya matha copiya yainyabare Pablo, tsipei tha beta cui yabara tatinaetsi bara beya pontha pon romanomonae itorobiya pia pepa peewatsinchi. ²⁷ Tsipei inta jopa xanepanaetsipae icha itorobichipan Pablo pon pewaetabinchi icha jopa yabara paebinchipae xua pocotsiwa bapon peexanaexae, jei Festo xua Agripa tsipaebatsi.

26

Meje yabara poxonae Pablo pia coutha cuita paeba, Agripa peitabaratha tatsi, pon peyanacua ewatsin jiwi

¹ Bara nexata Agripa Pablo baraichi, jeye:

—Icha jinya paebichi, moya taema, jei.

Barapoxonae Pablo nama_{xu} yoicha xua Agripa jacobatsi. Bapoxonae namchi, jeye: ² “Agripa, pon neyanacua ewatsin jiwi, maisa bichocono _{ju}ntu coyene weiweinan, xua anoxuae neitabaratha tana nayabara jume paebixae tsane pocotsiwa bayatha neyabara paeba judiomonae po coyene xua pinae abe exaneiban. ³ Poxoru yaitama, xam Agripa, bayatha yaputaneme pata _{ju}ntu coyenein pomonae judiomonae panxaein. Yaputanemeno baxuan xua pana najume matsontsonoban. Daxota cabaraichi xua saya beta nejume taema xua jopa aitaconaeinde”, jei Pablo.

Meje yabara poxonae Pablo nayabara paeba, poxonae pinae cataunxuae jopa jume cow_untsiyo Jesús

⁴ Equeicha Pablo namchi, jeye: “Daxita judiomonae barapomonae neyaputane xua poxonae pexuyon, poxonae caena bayatha pia xantha tatsi poponan xua tanacuaxae. Barichino neyaputane poxonae Jerusalén tomaratha poponan. ⁵ Icha yainyabatsipame barapomonae, yabara catsipaebichipa pocotsiwa exaneiban xua fariseomonae pocotsi _{ju}ntu coyene cuidubeiba, pocotsiwa judiomonae cuidubeibatsi, tsipei xan fariseomonaepin. Daxita barapomonae yaputane xua caena bayatha jume cow_untan daxita pocotsiwa xua barapomonae itoroba. Fariseomonae itapeta cuita exaneiba pocotsiwa Nacom itoroba beyacaincha ichamonae xua exaneiba. ⁶ Judiomonae necapona xote tsipei

saya poxoru yabara wunaewatan xua bexa Nacom asu exanaena pomonae xua werapa. Baxua pinae Nacom wamo susato jiwi yabara tsiwunaewatan muxu dutatsi. ⁷ Patamonae pomonae Israel nacuamonaewatan pomonae xua doce pomonae bicheitobe, baxua yabara jume cui wunaewatan ewata poxonae petupaewi equeicha asu exanaeinchi, xua poxonae Nacom exanaena. Daxota barapomonae Nacom wunaewatan jainteibatsi. Matautano itapeta exana pocotsiwa Nacom itoroba, merawithano, matabithano. Xam Agripa pon neyanacua ewatsin jiwi catsipaebatsi baxua tayabara jume cowantsixaeru, daxota judiomonae neyabara paeba xua pinae abe exanan. ⁸ Painya xoba pananta xeiname xua Nacom jopa itacupaetsi xua equeicha jiwi asu peexanaewatsi pomonae xua werapa”, jei Pablo.

Meje yabara poxonae Pablo nayabara paeba xua pinae copiya abe exana nawita pomonaetha pomonae pejume cowantsiwichi Jesús

⁹ Equeicha Pablo jeye: “Xan copiya tacoutha nanta xeinan xua bewa bichocono abe exanaein pomonaetha pomonae Jesús pejume cowantsiwichi pon Nazaret tomarapin. ¹⁰ Jerusalén tomaratha baxua exanan. Sacerdotemonae pia pentacaponawati pia peitorobi coyenewa necata xua daxota tana necui jupaewa xua jiwi tacaponawati jiwi pecubi botha. Pinmonaeca caponan, pomonae Jesucristo pejume cowantsiwi. Xan yabara jume jejan xua barapomonae pejutewiwatsi. ¹¹ Anaya caenaetan, peraxa exananno poxoru

ichipan xua barapomonae pentsina xua Jesús pejume cowantsiwatsi. Ƴ baxua exanan. Daxita judiomonae pia penacaetutsi bontha tatsi exananno. Bichocono anaepanan. Daxota icha nacuantha ponan tajeichinexa pomonae pejume cowantsiwichi Jesús xua barapomonae abe taexanaenexa”, jei Pablo.

Meje yabara poxonae equeicha Pablo nayabara paeba poxonae pinae jume cowanta Jesús

¹² Equeicha Pablo namchi, jeye: “Barichi sacerdotemonae pia pentacaponae wi tatsi pia peitorobi coyenewa necata xua daxota tana necui jupaewa xua taponae wa Damasco tomara beya, xua pomonae jume cowanta Jesucristo tacaponae nexa tsane Jerusalén tomara berena. ¹³ Xam pon neyanacua ewatsin jiwi bara xaniwaicha catsipaebatsi poxonae namtotha paenaponan poxonae mateinyaxae tsuxubi pecoicha tan xua peitaboco wejopeica, pin coicha po coicha beyacaincha xua xometo. Barapo coicha pomonae nepuna pona nebaru matawacaicha matatsun uncueica. ¹⁴ Nexata daxita iratha paothopan. Jume tan xua pon hebreo jumetha nebarai, jeye: ‘Saulo, Saulo, ¿eta xua tamonae inta abe exaname? Poxonae tamonae peraxa exaname, apara jinya coutha atene nacana exaname icha be buey ichi poxonae ba pia coutha xua xota sojei nataxu matababa’, nejei. ¹⁵ Nexata jume notan janje: ‘Pon jiwi Necanamataxeinaem, ¿jintam xamda?’ jan. Nejume nota jeye: ‘Apara bara xan, Jesús ponxaein inta abe exaname tamonae pomonae

tana nejume cowantsiwi. ¹⁶ Nontaponde. Xua anoxuae necotame catsita naitutatsi. Aparatha tana nejume yopichim. Matautano bexano equeicha ichawa necotsiname tana neyabara paebinexam tsane baxuanno. ¹⁷ Cacui itorobatsi xua Nacom Pejume Diwesi necueicueijamexam. Nexata cacapanepaeinchi poxonaе juntucuru caperaxa exana judiomonaе iru pomonaе jopa judiomonaе naexanaeyo. ¹⁸ Caitorobatsi judiomonaetha iru pomonaetha pomonaе jopa judiomonaе naexanaeyo xua jopa equeicha pejinompaenexa poxonaе jopa jume cowantsiyo. Matautano caitorobatsi xua barapomonaе jopa peexanaponaenexa pocotsiwa caurimonaе pia pentacaponaein tatsi itoroba, pon Satanás, jame meisa peexanaenexa pocotsiwa Nacom itoroba. Matautano caitorobatsi xua barapomonaе tana nejume cowantsinexa. Bapoxonaе yabara janteminaein barapomonaе abe pia peexanae cuiru coyenein tatsi, matautano xua pexeinaenexa pocotsiwa Nacom yabara tsiwunaе muxu duba', nejei Jesús", jei Pablo.

Meje yabara poxonaе Pablo exana pocotsiwa Nacom itoroba poxonaе tsita naitutatsi namtotha

¹⁹ Equeicha Pablo namchi, jeye: “Agripa, xam pon neyanacua ewatsin jiwi, xan jopa jumefebinyo xua Jesús neitoroba poxonaе itaboco wenetsita naitutsica xua namtotha netsita naituta poxonaе pecoichatha jume tan xua Jesús netsipaeba. ²⁰ Copiya matha Damasco tomarapiwi tsipaeban Nacom Pejume Diwesi. Bapoxonaе equeicha barapo diwesi tsipaeban

Jerusalén tomarapiwi. Bapoxonae equeicha daxita Judea nacuamonaepiwi barapo diwesi tsipaebanno. Irũ pomonaetha pomonae jopa judiomonae naexanaeyo tsipaebanno. Barapo diwesi tsipaeban xua barapomonae icha jũntũ coyenein pexeinaenexa, yawa Nacom pejume cowantsinexatsi, mataũtano xua barapomonae petsita itapeinya xeinaenexa jiwitha xua bara Nacom jume cowantatsi xua beta peexanaexae.

²¹ Daxota judiomonae newaetaba poxonae Nacom pin pia botha patopan yawa bepa nebexubei. ²² Ichitha Nacom neyawena. Daxota awiya Nacom Pejume Diwesi paeban bichocono daxita i dapomonaeintha pomonaetha pomonae pepawi jiwĩ irũ poponaethano pomonae peainya cui jiwĩ. Baraxua saya meisa paeban be pocotsi coyeneya matha juinya Moisés yabara wũnae tsiwanaya paeba irũrũ be pocotsi coyeneya matha juinya Nacom peitorobi jume pepaebiwi yabara wũnae tsiwanaya paeba.

²³ Barapomonae tsipaeban po diwesi yabara xua pinae bexa Mesías peraxa exanaeinchi ichamonae. Mataũtano bapon pinae pon xua copiya pomonae pewerapaewi asũ nanta caexanaeinchi. Mataũtano xua pinae judiomonae irũ pomonae jopa judiomonae naexanaeyo yabara yaputane exanaeinchi pecapanenebiyae diwesi jume”, jei Pablo xua Agripa tsipaebatsi.

Meje yabara poxonae Pablo paeba Jesús pejume diwesi Agripatha xua Agripa pejume cowantsinexa

²⁴ Poxonae baraxua Pablo najume weta xua nayabara jume paeba, Festo jume daunweya

wawai, jeye:

—¡Pablo, maisa cantsiyaibeca poxoru saya ɯ necuidubi daxota cantsiyaiba! jei Festo.

²⁵ Pablo jume nota, jeye:

—Festo ponxaem tacabarɯ cui itura jinaeinchi, jopa nentsiyaibiyo apara. Xuaunxuae paeban, apara seicayarɯ xua xaniwaicha paeban xua bara apara pexainyeiwa. ²⁶ Ee taema, Agripa, pon pepa peyanacua ewatsin jiwi pon xote eque. Bapon yaputane xua xaniwaicha paeban. Bapontha jopa junuwinyo xua tsipaeban. Xuaunxuae catispaebatsi bapon baxua daxita yaputane poxoru jopa namicha exanaeinyo. ²⁷ Agripa, xam pon neyanacua ewatsim jiwi. ¿Jume cowantame pocotsiwa Nacom pia peitorobi jume pepaebiw paeba? Bara yaputan xua bara jume cowantame, jei Pablo.

²⁸ Agripa jume nota, Pablo jume notatsi, jeye:

—Saya caeto netsipaebame. Saya barapo jumetha nanta xeiname xua xan nainya jume cowantsinan Jesús, jei Agripa.

²⁹ Nexata Pablo namchi, jeye:

—Xua caeto paca tsipaebatsi yawa icha matowa paca tsipaebatsi bara ba Nacomtha pacata wɯcatsi xam nexa, irɯ pomonae nexa, pomonae ne-jume tane painya nejume cowantsinexam tsane Jesús. Ichichipan xua painya neexanaewa icha ichin xua tajume cowantsiwa, bara bequein jopa ichipaeinyo xua painya nemaxatha painya nex-einaewa jiwi pecubi nainto be pocotsi nainto xu-aunxuae tamaxatha ducua, jei Pablo.

³⁰ Poxonae Pablo najume weta baxua, Agripa pon peyanacua ewatsin jiwi irɯ Berenice asiya

uncuatababe. Iru Festo pon peyanacua ewatsin jiwi asiya uncuataba. Pomonae iru ena asiya umenarucupa. ³¹ Aisowa be-iyiya barapomonae natsipaeba, najei:

—Barapon Pablo jopa apara abe exanaeyo po coyeneyatha xua daxota bapon pebexubinexatsi, matautano po coyeneyatha xua daxota bapon jiwi pecubi botha peetsinexatsi, najei barapomonae.

³² Agripa tsipaeba, Festo baraichi, jeye:

—Icha metha jopa naca wucaetsipae Pablo xua peponaewa tsane pontha pon romanomonae itorobiya pia pepa peewatsinchi xua baxotiya peyabara paebinexatsi penatsicuentisiwa xua abe peexanaexae metha pu copatsipatsi xua bara pepanepaewa tsane yatsicaewa, jei Agripa.

27

Meje yabara poxonae Pablo Roma tomara beitorobiyatsi

¹ Barapomonae najuntu coyene weta xua pata taneitorobiwa Italia nacua beya. Pablo iru ichamonaeru pomonae peteiquebiwichi daxita barapomonae itorobatsi Roma tomara beya. Pon barapomonae matabapoinchi bapon pewun Julio, pon soldadomonae pia pentacaponaein tatsi. Barapo matabuxuoyo soldadomonae bicheito wan dutatsi “Augusto soldado bicheito”, jei, poxoru barapo soldadomonae Augusto tanacuitatsi, pon romanomonae itorobiya pia pepa peewatsinchi. Barapo soldadomonae Pablo iru ichamonaecaponatsi Augusto beya. ² Pepa weranaetha pawarapan, po nae Adramitio tomara werena

pona. Barapo nae equeicha Asia nacua beya ponaena. Po tomaraxi pitapatha ena barapo tomaraxi bepa siwa ponaei. Ichun pana cueyata. Bapon pewun Aristarco Tesalónica tomarapin. Barapo tomara Tesalónica tomara eca Macedonia nacuatha. ³ Icha matabitha Sidón tomaratha papatan. Baraxota barapon Julio, Pablo baru jume wunaetsi. Matautano bapon Julio, Pablo copatatsi xua bara Pablo piamonae pesiwa ponaewa tsainchi, xuano xua bara Pablo peyawenaenexatsi xua xoxi nantawenona. ⁴ Bara Sidón tomara wepawarapiyan weratha. Bara weratha paenaponan joibo cuiyainwa Chipre tunaeto pantawaqueban, yaitama bichocono pin joibo dena ichaxoyo copiya payiyan. ⁵ Bara mar mene iya paenaponan, Cilicia nacua, Panfilia nacuano imoxoyo pacaquita enaponan. Bapoxonae Mira tomaratha papatan, po tomara Licia nacuatha eca.

⁶ Baraxota pon soldadomonae pia pentacaponaein tatsi bapon icha nae taeba baraxota. Barapo nae Alejandría tomara werena pona. Barapo nae iru seicaya Italia nacua beya ponaena. Barapo naetha equeicha Julio pana baru iya Italia nacua beya. ⁷ Ainya matabin saya bewayo paenaponeiban, poxoru yaitama joibo jera caewa carena tsaibi. Gnido tomara paxenta enaponan. Salmón tomarano paxenta enaponan. Creta tunaetono pantawaqueban. ⁸ Bewayo weratha paenaponan, pitapa pacaquita enaponan. Tomaratha papatan ichaxota pexutoroto. Baxota pajebounan, po tomara pewun Buenos Puertos. Barapo tomara imoxoyo

eca ichaxota Lasea tomara.

⁹ Baraxota came awiya ainya matacabin paenan. Bayatha yapu caewa barapo matacabin poxonae barapomonae warapapaeba barapo matcabitha xua pin mene mara mene iya. Tsipei imoxoyo awabo tsurucuae tsoponae, daxota Pablo nanta xeina xua icha metha paponatsipan, panacabetsipan. Daxota barapomonae Pablo muxuweta. ¹⁰ Pablo namchi, jeye:

—Pebiwi pam, pana nejume taema. Ichaunxuae warapaeinchi methaunxuae nacabetinchi. Matautano methaunxuae weranae abe exanaena. Matautano xoxino xua capoinchi methaunxuae napentsina. Matautano jiwi methaunxuae napentsina, jei Pablo.

¹¹ Ichitha soldadomona pia pentacaponaein tatsi, bapon Julio, jopa jume naitomatsiyo xua Pablo tsipaeba. Ichitha dapo jumetha saya meisa pon jera pecanamataxeinaein iru pon jera pexeinaein, baponbe itapeta jume naitomatat-sibe. ¹² Barapomona nanta xeina, xua baraxota jopa beenaeyo poxoru barapo tomara jopa cui wunaeyo xua jera pebocaewa poxonae awabo pin joiboxae. Pinmonae barapomonae jiwana tsita xanepanatsi xua Buenos Puertos weya warapaenexa jeratha Fenice tomara beya, po tomara eca Creta tunaetotha. “Methaunxuae tsiwanaya payaeinchi penacabetsi awabo, joi-bono”, jei. Barapo tomara cui wuna xua ichaxota jera jebouneiba. Baxota joibo yayapa poxoru tomara naita cafeteca, poxoru joibo jopa patopaeyo pocotsiwa wetsica yawa pocotsiwa

wetsina. Baraxota bepa enaei poxonae awabo tsuxubi.

Meje yabara poxonae maratsaca daunwei pepa mar mentha

¹³ Nexata bewayo joibo tsuncuae, be pocotsiwa parowa wejopeina. Daxota barapomonaе namchi: “Бу poinchi cataunxuae saya tsiqui joibiyo”, jei. Bapoxonaе totabiya jera. Barapo Creta tunaeto imoxoyo pitapa pacaquita enaponan weratha. ¹⁴ Poxonaе saya caeto

paenaponan bapoxonaе pin joibo pana epa taepona, Creta nacula tunaeto wejoparena. Jera epa yutaba. ¹⁵ Nexata joibo jera muxunenababa. Canta joibo nawita, daxota jopa paponaeinyo joibo beya. Daxota saya pacopatan xua saya bara joibo pana yanacaputabiyaenaba.

¹⁶ Cauda tunaetiyo bepana yanacaputabiya. Baraxota ichaxota joibo yayapa, tsica naeyo jeriyo po naeyo paquetoutan, pajontaxuinan pepa naetha. ¹⁷ Panacuitontan xua pajonta xuinan. Barapo naeyo pepa jeratha pacutabotan.

Nexata jera penacuichiwi pepa бумacantha реума wemухубуру саpabina, мухубуру babataruba xua pewacatabiyainwa joibo. Nexata barapomonaе bichocono junuwa poxoru nanta xeina xua mexeya itara jera naxatabaweі taetabotha, po taetabo pewun Sirte. Daxota wera jontabota jeratha. Saya jera caputabiya joibotha.

¹⁸ Icha matabitha came awiya maratsacan bichocono daunwei. Daxota ichawan mentha bebai xua xuan capona. ¹⁹ Icha matabitha daxota pabeban xua jeratha jeba tsipei ichichipa

xua tafafanatsi. ²⁰ Ainya matabin came

awiya jopa panecotsinyo xometo. Opiteino jopa panecotsinyono. Pajunuwan. Pananta xeinan: “Metha aparaunxuae jopa nacapanenebiya tsainchi. Bunothropaeinchi aunxuae”, pajan.

²¹ Ainya maticabin pana yapu xenaca xua jopa panabanaeinyo. Pablo nontapona. Barapomonae baraichi, jeye:

—Bara bayatha paca tsipaebatsiba: ‘Creta tunaeto beya, jopa pawarapaeinde’, paca baraichiba. Daumetha equeicha pawarapame. Daxota aunxuae jera abe exana. Matautano pananta puxanameno xuaunxuae pabebam xoxi pacaponame. ²² Ichitha saya jopa pajunuwinde. Jopa pajiwana tupaem tsane, bequein meisa jera naxubina. ²³ Merawi matatsunpin netsita naitata. Barapo matatsunpin Nacom itoroba pon Tanacom xuano xua taexanaexae pocotsiwa bapon neitoroba. ²⁴ Barapo matatsunpin nebarai: ‘Pablo jopa junuwinde poxoru bexa tsane romanomonae itorobiya pia pepa peewatsinchi pon Augusto, peitabaratha tatsi uncuaename. Daxota pomonae xua napona cata capanepatsi Nacom’, nejei matatsunpin. ²⁵ Daxota, paxam pana najuntu coyene tsacabare, poxoru xan nanta xeinan xua pocotsiwa matatsunpin netsipaeba bara baxua exanaena. ²⁶ Ichitha petunaetotha naca monapentsina, jei Pablo.

²⁷ Poxonae catorce po maticabibe tsuxubi, barapoxonae mar mene pacaxiban. Barapo pepa mar mene pewun Adriático mene. Barapo mentha joibo pana yana muxunenababa. Merawi papaetha, pomonae petanacuichiwi barapo naetha, barapomonae nanta xeina xua imoxoyo

ira itiya pona. ²⁸ Barapomonae mene epa tutu canaꝯbareca. Treinta y seis po mꝯ epat iyobe xeina xua iratha deca. Caeto equeicha mene epa tutu canaꝯba, baxota veinte y siete po mꝯ epat iyobe xeina xua iratha deca. ²⁹ Barapomonae pejunuwixae xua jera tofotabina poxonae yꝯtabina ibowantha, daxota barapomonae po nainto arewe, xua jera duntaba exanaduta petafe xoreca. Cuatro po naintobe xoreca peruntaba exanadutsinexa. Mataꝯtano barapomonae Nacomtha wꝯca xua xometo pentha tsane, penecotsinexa tsane. ³⁰ Pomonae petanacuichiwi barapo naetha barapomonae nanta xeina xua perꝯꝯpaewa. Daxota barapomonae naemata po nainto arewe dureca pebꝯꝯreca. Ichitha tsiqui naeyo mentha durecano, poxoru pia namicha dꝯꝯpaetsi barapo naeyo tha. ³¹ Pablo barai Julio, pon soldadomonae pia pentacaponaein tatsi, xuano baraino soldadomonaetha, jeye:

—Icha pomonae petanacuichiwi barapo naetha icha jopa enae tsane barapo pin naethe, jopa Nacom capanenebiyae tsane, jei Pablo.

³² Daxota soldadomonae jeriyo mꝯ ucuiba. Jeriyo mentha jopeica.

³³ Poxonae caemꝯambo, Pablo pijiwimonae jain itoroba. Pablo pijiwimonae barai, jeye:

—Bayatha dos po semanabe painya junuwi jopa bichocono panabanaem poxoru pajunuwame xua pabunothopame. ³⁴ Daxota pin jumetha paca jeichichi. Moya matha paxaema tsipei baxua ainya cui xua painya nenacapanenebiyaenexam. Bara caein jopa napuxanae tsane. Mataꝯtano jopa caentanatiyo aichurucuae tsane.

³⁵ Poxonae Pablo najume weta, pecobetha pan pita, Nacomtha tsipaeba barapomonae peitabaratha tatsi. Barapoxonae pan epa janaxuba. Barapoxonae xane. ³⁶ Barapoxonae barapomonae najuntũ coyene tsacabarũcũpa. Mataũtano barapomonae daxita juntema nabanerũcũpa. ³⁷ Jerapiwi doscientos setenta y seis po matabũxũmonaebe pan xua daxita pan. ³⁸ Poxonae barapomonae najain wetarũcũpa, daxita barapomonae trigo xu bebai pepa mentha poxoru bepa jera tafafanaetsei.

Meje yabara poxonae jera bunareca

³⁹ Poxonae xometo baya pentha tsina, pomonae petanacuichiwi barapomonae jopa yaitaeyo ira, po iratha muxu pepatsi. Poxonae barapomonae pexutoroto tane, barapomonae nanta xeina xua juntucuru jebounaena taetabo itapatha. ⁴⁰ Daxota barapomonae nayana mũ ucuiba, xua po nainton arewe mene bũpana bobendeca. Po catenano pecabobotsi catena, barapo catenano isanaxoreca. Nexata paparuwa duta wera naetotha. Barapo wera pebũxũtha duta. Jera nainya cacuita caputabiya ira. ⁴¹ Ichitha barapoxonae barapo nae ichaxota tsewa tuwũtha naxatatabarena. Bũxũ naxatatabuncua bichocono. Petafe fotaba maratsacatha.

⁴² Soldadomonae bepara jutebei pomonae peteiquebi jiwichi, tsipei poxonae mentha othopaena mexeya itara dũcũpaenawei. ⁴³ Ichitha soldadomonae pia pentacaponaein tatsi, bapon Julio, ichipa xua Pablo asũ popona. Daxota Julio jopa yabara jume copatsiyo xua jutebinchi

pomonae peteiquebi jiwichi. Bapoxonae Julio itoroba pomonae yaputane xueiba, copiya pepatsinexa tsane pepa iratha. ⁴⁴ Pomonae xua jopa xueibiyo napaewan cobena xueibiya. Matautano barapo jera pepan cobena xueibiya. Daxota daxita panenebiya pepa iratha.

28

Meje yabara poxonae Pablo Malta tunaetotha patopa

¹ Poxonae po tunaetotha papanenebiyan icha-monae pana tsipaeba: “Apara Malta tunaeto”, jei. ² Malta tunaetopiwi beta pana matenta wei-weinaya waba. Bichocono ema duna. Ema pana atsana. Aqueno. Daxota barapomonae pin isoto itutaeta. Bapoxonae barapomonae pana waba: “Antha panonopenare”, jei. ³ Pablo isoton nota po isoton tsewa. Poxonae barapo isoton pepa isototha bebebeya, barapo isotontha jomo athabe jopeina poxoru bichocono atou. Pablo cobe sinaducuatsi barapo jomo. ⁴ Malta tunaetomonaepiwi, Pablo cui tainchi xua jomo cobe sinaducuatsi. Barapomonae nantiya natsipaeba, najei: “Barapo pebin apara pon jiwu pejutebin. Bequein panepa pepa mar mentha ichitha barapo nacom, po nacom pewan Justicia, bapon itoroba jomo pesinarucuaenexa tsainchi, xua bapon jopa pepoponaenexa tsane”, jei barapomonae.

⁵ Ichitha Pablo nacobe nantaba jomo isototha. Saya axaibi tsuncuae Pablo. ⁶ Daxita barapomonae Pablo cui necotumeinchi xua cobe put-sunanaya yawa icha iratha jopiyaena petupaein. Bayatha cui wenaewatumena. Poxonae baxua

jopa daichiyo, daxota equeicha ichawa nanta xeinarуца: “Metha moya bara Pablo nacom tsecae”, jei bapomonaе.

⁷ Ichaxota isoto, baxota ainya iran bobena Malta tunaeto peewatsin, bapon pia iran tatsi. Bapon, acoibi po matabibе beta pexaewa pana apata. Baxota yawa pamaitenan. Bapon pewн Publio pon iran pata tan. ⁸ Publio paxa tatsi camatha boca. Domaebatsi. Suibatsino. Pablo barapo tutu bejoniya ichaxota bapon boca. Bapoxonaе Pablo cobe jayabiya tsipaeba Nacomtha. Bara bapon axaibi tsanaya. ⁹ Poxonaе baraxua exana Pablo, daxita Malta tunaetomonaе, pomonaе peatenewi, baxota pata. Iru Pablo axaibi exanaru daxita barapomonaе. ¹⁰ Malta tunaetomonaе pana baru cui itura jina nawita. Bapoxonaе poxonaе equeicha pawaraparуцапан jeratha, pana nepu catsiba xua xoxi pata nantawenonaenexa poxonaе weratha pawarapan.

Meje yabara poxonaе Pablo Roma tomaratha patopa

¹¹ Poxonaе acoibi po xometiyobe payapucae-wan barapo Malta tunaetha, barapoxonaе pawarapan. Pawarapan weratha po naetha po nae barapo Malta tunaetha ayawabo tsuncuae. Barapo nae Alejandria tomara werena peponae nae. Barapomonaе barapo naetha petafetha cuareta naewiyo be jitonyobe. Saya canaxoba pia nacombe. Icha nacom pewн Cástor. Icha nacom pewн Pólux. ¹² Siracusa tomaratha pajebounan. Barapo tomaratha acoibi po matabibetha paenan. ¹³ Barapo

tomara wepawarapiyan, Siracusa tomara weya. Bapoxonae Regio tomaratha papatan. Icha matabitha joibo wexubiye Puteoli tomara bepana yanacaicha ainya merawibe. Baxota papatan Puteoli tomaratha. ¹⁴ Baraxota pacaxiban pomonae iru pejume cowuntsiwichi Jesús. Barapomonae pana waba: “Cae semanatha pana baru enare”, jei. Bapoxonae equeicha Roma tomara bepawarapiyan. Pecaer payiyan. ¹⁵ Pomonae iru pejume cowuntsiwichi Jesús, Roma tomaramonaepiwi, cou pana yabara jume tane xua imoxoyo papatan. Daxota cou ichamonae pana siwa dendena pecaerena. Foro de Apio tomara beparena. Ichamonae Tres Tabernas tomara beparena pia pana taetsi. Poxonae Pablo barapomonae tane, Nacomtha tsipaeba. Pablo juntu coyene sadujei xua juntema pepoponaewa poxonae tane pomonae pejume cowuntsiwichi Jesús. ¹⁶ Poxonae Roma tomaratha papatan, soldadomonae pia pentacaponaein tatsi, copata xua Pablo bara saya pepoponaenexa icha botha, xuano xua saya caein Pablo peyapu eenaenexatsi soldadomonaepin.

Meje yabara poxonae Pablo Nacom pexeinya jume diwesi paeba Roma tomaratha

¹⁷ Poxonae acoibi po matabibibe yapucaewa, Pablo najume caruta ichamonaetha petawabinexa tsainchi Roma tomarapiwi, pomonae judiomonae pia pentacaponaein tatsi. Poxonae barapomonae pata, Pablo barai barapomonae, jeye:

—Tamonaē, jopa abe exanaēinyo wamonaetha pomonaē judiomonaēxae. Matautano bequein jopa abe exanaēinyo wamo susato jiwi piamonae pia coyene cuitha tatsi, ichitha barapomonaē newaetaba. Matautano jiwi pecubi botha necapona Jerusalén tomaratha xua romanomonaē pia pentacaponaewi tatsi pia xantha tatsi. ¹⁸ Barapomonaē, romanomonaē, neyabara yainyaba nawita xua icha abe exanan. Ichitha barapomonaē neyaputane xua jopa abe exanaēinyo. Daxota barapomonaē ichipa xua saya tana necopatabiwa tsane. Romanomonaē aichaxaibi xua jemeicha saya nenacui cayantomata xua tana nebexubiwa tsane tsipei pinae jopa abe exanaēinyo. ¹⁹ Ichitha judiomonaē neapusiwa xua jopa taponaeewa tsane. Daxota bewa wūcaein xua taponaeewa tsane romanomonaē itorobiya pia pepa peewatsinchi beya, xua tana neyabara paebinexa tsane icha metha abe exanan. Baxota ponan bequein jopa xeinaēinyo xua po coyene tayabara paebiwa tamonaē xua abe exana. ²⁰ Daxota paca wabatsi tha paca cataetsi xuano xua tha panejume taeicham. Waxainchi israelmonaēxaetsi wūnaē ewatatsi pon Nacom itorobicapaba. Tajume cowantsixae baxua daxota anoxuae penainto tamaxutha ducua, jei Pablo barapo pentacaponaewitha.

²¹ Barapoxonaē romanomonaē Pablo baraichi, jeichichi:

—Jopa painta patopaeyo carta Judea nacia werena xua xam necayabara tinaewa. Po judiomonaē, Judea nacia werena pata pomonaē

patamonae, barapomonae jopa abe cayabara pae-biyo. ²² Paichichipan paca jume tainchi xua jinya coutha nanta xeiname. Poxoru daxita nacuan pajume tan, xua Jesús pia pena pecuidubi coyenewan tatsi abe yabara paeba, jei barapo judiomonae pia pentacaponae tatsi xua Pablo tsi-paebatsi.

²³ Pablo muxu tsipaebatsi po mataqueitha xua patsina. Barapo mataqueitha Pablo pia botha tap-atatsi pin bicheito. Pablo baya tamropata pitaba xua tsipaeba barapomonaetha, beya yapentha. Pablo jume daunweya yabara cueicueijei barapomonaetha po diwesi po coyene xua Nacom waba jiwi petanaexanaenexatsi piamonae tatsi poxonae Jesús jume cowantatsi. Matautano tsipaeba barapomonaetha Jesús yabara xua Jesús apara pon Moisés yabara paeba pia peitorobi coyenewatha. Matautano Jesús apara pon Nacom pia peitorobi jume pepaebiwi yabara tina pia petinae diwesintha. ²⁴ Xua Pablo po jume diwesi paeba, ichamonae jume cowanta poxonae cataunxuaeru ichamonae jopa jume cowantsiyo.

²⁵ Barapomonae be ainya bicheitobe natsicotane. Daxota bapomonaebe tamropata notarucapa xua peponaewa. Pablo namchi, jeye:

—Po diwesi Nacom pia Pejumope tanaxu tatsi cata xua Isaías catatsi xua bapon petsipaebinexa xua wamo susato jiwi petsipaebinexatsi, barapo diwesi po diwesi pexeinya diwesi, xua jeye:

²⁶ ‘Ponde, barapomonaethano jande:

Pajume taneme ichitha jopa xapain payabara jume yaputaem pocotsiwa pajume taneme.

Pataneme painya itacueretontha ichitha

jopa xapain payaputaem pocotsiwa panecotame.

²⁷ Barapomonaē najuntū coyene ararana exana, jopa peichichipaexae xua pejume taewa.

Matautano antūfaetabiya jume tane.

Barapomonaē baraxuan exana,

poxoru jopa betaeyo peitacueretontha,

poxoru jopa bejume taeyono pemuxutontha,

yawa poxoru pejuntū coyeneintha jopa beyaputaeyo.

Barapomonaē jopa ichipaeyo xua tana netsita

xeinaewa icha juntū coyene xua daxota jopa

neitacūpaeyo xua tayabara jūntemainawa

abe pia peexanaē cuiru coyenein tatsi’,

jeyei Nacom pia Pejumoŋe tūnaxū tatsi xua

Isaiās cueicueijeī exanatsi pinaē, jei Pablo.

²⁸ Pablo cataunxuae cueicueijeī, jeye:

—Anoxuae xuano bexa tsaneno payaputaē-

name xua pomonaē jopa judiomonaē naexanaeyo

jume taena Nacom pia pecapanenebiyae diwesi.

Bara barapomonaē beta jume naitaewatsina.

²⁹ Poxonaē Pablo najume weta natsixibarūcūpa

judiomonaē. Poxonaē pona barapomonaē yabara

najume matsontsonoba xua Pablo paeba.

³⁰ Pablo Roma tomaratha popona ainya

weibe. Pia botha eca xua saya tanacowaeicha

eca. Barapo botha daxita matenta weiweinaya

wabeiba pomonaē pesiwa poneibixaetsi Pablo.

³¹ Pablo tayapu xanepanatsi xua pepoponaewa.

Barapoxonaē Pablo barapomonaētha yabara

tsipaeba po diwesi po coyene Nacom waba

jiwi petanaexanaenexatsi pijimonaē tatsi

pomonaē itorobiya peewatsixae. Matautano

yabara cuidubano xua Jesucristo yabara, pon

Pecanamataxeinaein jiwi. Romanomonae
pia pentacaponaein tatsi Pablo jopa cui
matawentichi.
Baja Lucas.

**Nacom Pejume Diwesi po diwesi pena jume
diwesi xua Jesucristo yabara tinatsi
New Testament in Cuiba**

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022
e9c4c3a0-6dec-54a4-aaba-fb395e5eddc7